

## **ASO LULU, 22 SETEMA 2021**

*Na toe faaauau Taulumaga a le Fono Aoao Faitulafono i le itula e 6.47 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono. Faamalo le onosai i le paia o le tatou Palemene. E faataatiaese tatou galuega i le taimi ua sola o lo o tau faamaea mai le saunoaga a le Minisita o Leoleo ma le Ola Toefuataina faapea foi le Matagaluega o Faiga Palota.

**Afioga Leaana Ronnie Posini:** Lau Afioga i le Fofoga Fetalai....

**FOFOGA FETALAI:** Tulai mai le sui usufono mamalu.

**Afioga Leaana Ronnie Posini:** Faafetai tele lava i lau Afioga mo le avanoa. Leaga sa ou taua foi le mataupu lea i le Matagaluega a Leoleo. Ae o le ala lea na fia maua ai se... fia malamalama foi lea o lea ua e saunoa e le o aafia le Minisita i le faatonuina o leoleo i se faaiuga a leoleo e tutoatasi lava. A o lau matau ou te le toe fia oo i ai, ae o le matou agai mai lea i le Aso Lulu i i, na taofia ai lea e leoleo, na matou fesiligia ai lea po o le a le tulafono. Ae faapea mai leoleo, e leai se tulafono, a o matou e alu i le faatonuga. O le mea lena lea e taua ai i lau saunoaga, ia malamalama lelei pe mafai ona tapa foi e ita lea o le a o atu e loka ita, po o le a le tulafono. A o le tali lea a leoleo fai mai, e leai se tulafono, a o le faatonuga lea e o ai matou. Ou te le o manino la po o le faatonuga a lau Afioga i le Minisita po o se isi faatonuga. Ma le agaga faaaloalo.

**FOFOGA FETALAI:** Ia, o lea ua maua le finagalo o le sui usufono mamalu. Ia saunoa mail au...

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai mo le faasaoina o le taimi o le Minisita, pe maua se avanoa.

**FOFOGA FETALAI:** Sa e lauga i le... o lea ou te vaai atu e le o i ai lou... O se mea e fia faasao po o se mea fia faamalamalama?

**Afioga Sulamanaia Fetaiai Tauiliili Tuivasa:** O se mea e fia faamalamalama sa ou lauga ai. E momoli le agaga faafetai i lau Afioga i le Fofoga Fetalai...

**FOFOGA FETALAI:** Ia, faau mai pea ia te au leaga o lea o le a sui le mea tatou te alu ai o le a tatou alu sao loa i le Tulafono Tumau. O le a le mea lena e fia faamalamalama? Tau mai?

**Afioga Sulamanaia Fetaiai Tauiliili Tuivasa:** O lau lauga lea sa... leaga sa taua i lau lauga.

**FOFOGA FETALAI:** O le a se mea e fia faamalamalama?

**Afioga Sulamanaia Fetaiai Tauiliili Tuivasa:** O le fia faamalamalamaina o le tulafono lea na faatino... leaga o lea ua saunoa sao le Afioga i le Minisita na te le i faatonuina alii malu o le malo. O le popolega la o lou sui usufono ina ia mafai, o lea foi na saunoa le sui usufono lea... a faapea la o lea na faatino lava le tulaga foi i le auaunaga a le Matagaluega o Leoleo e aunoa ma se faatonuga...

**Susuga Hon Laauli Leuatea Polataivao Fosi:** Lau Afioga i le Fofoga Fetalai malie lava e fia maua se avanoa.

**Afioga Sulamanaia Fetaiai Tauiliili Tuivasa:** A o lou faalogologo atu i le saunoaga a le Afioga i le Minisita i le tulaga lea i le pulega a alii ma faipule. E lagolago tele lenei itumalo i alii malu o le Malo o i latou ia. Ae o le popolega lava lea e popole i ai lou sui usufono, ne i pei tatou e pei o Fiti, aua o lea lava ua malamalama lou sui usufono, e le i i ai se tulafono foi ma se faatonuga foi a le Afioga i le Minisita e faatino ai le auaunaga lea a malu o le Malo. A o le popolega ne i te i ua i ai se mea e tupu i le Palemene lenei pei o le atunuu lea o Fiti.

**FOFOGA FETALAI:** Ia, o lea ua maua. O lea ua maua.

**Afioga Sulamanaia Fetaiai Tauiliili Tuivasa:** E pei o i ina lea e avatu ai sina, lea sa ou lauga ai foi... aemaise o le naunau mai o afioaga foi ma itumalo, ae o lea ua maua, e faafetai atu i le Afioga i le Minisita. E silafia foi o tatou o oe o le Minisita o le Vaimauga. Ia faafetai lava sa usitaia e alii ma faipule o le Vaimauga le tuualalo atu i ai, ae sa pei o lea sa fesiligia e

Leaana, sa fesiligia foi malu o le Malo, o le a le tulafono lea... lau Afioga i le Fofoga Fetalai...

**FOFOGA FETALAI:** Ia, o lea ua matau atu e vasaga lava lua talanoa lena e te lua talanoa mai ai. O le mea lea, o lea ua manino, o lea ua malamalama. Ae se i tali mai le Afioga i le Minisita, ia ona...

Se i tulai mai lau Afioga i le Minisita mo Faatoaga ma Faigafaiva.

**Susuga Hon Laauli Leuatea Polataivao Fosi:** Lau Afioga o si mataupu lava lea. Se lau Afioga e ava tele i lau Afioga i le Fofoga Fetalai. O lea lava e matau ua uma ona faataatia lau faaiuga e le mafai ona tatou toe foi i tua. Ioe lau Afioga, o lea lava e tautalagia mai pea le aso pogisa lea e taumafai e faatea atu. Ni a fa au i lou finagalo lau Afioga i le Fofoga Fetalai na ona ou tuutuama i lou finagalo, o lea lava e tuutalaloa aso ia e fesiligia ai le faamaoni o le Minisita o Leoleo.

Lona lua lau Afioga faamolemole, ou te faatu atu le lafo, *Ina ia aveese ai tuuaiga mataga ia na fai nei lava ia te au, faapea ua ou faaogaina le Minisita o Leoleo e aveese ai tagi ia te au i le faamasinoga.*

O la e silasila le Atua lau Afioga, e le sao lea mau lau Afioga i le Fofoga Fetalai. O lea ou te faatu ai le lafo, ina ia aveese faamaumauga ia ma faamaumauga a le Palemene, e sese.

Ma lou agaga faaaloalo. O le lafo lena faamolemole.

*Faaluaina e le Sui Palemia ma le Minisita mo Galuega, Felauaiga ma Atinae Eseese.*

**FOFOGA FETALAI:** O le lafo ua tuuina mai ina ia aveese ia faaupuga mai totonu o faamaumauga...

**Susuga Hon Tuilaepa Fatialofa Auelua Sailele Malielegaoi:** Faamolemole lava i lau Afioga po o le a tonu lava upu ia? O upu a ai ia o le a aveese? O upu o le...

**FOFOGA FETALAI:** O upu ia na saunoa i ai le Taitai o le Itu Agai i le taimi ua sola.

**Susuga Hon Tuilaepa Fatialofa Auelua Sailele Malielegaoi:** O lea la ou te talanoa atu, e sao upu ia ou te talanoa i ai, e sao upu ia ou te talanoa i ai. Ma ua faatele foi ona ou talanoa i ai.

**FOFOGA FETALAI:** Alaala mai i lalo. Ia ma le isi foi mea, e tuu atu foi le avanoa ia te oe o le sui usufono matua, o le Afioga i le Taitai o le Itu Agai, ae le mafai ua lautele mai lau faamalamalama, ma le isi mea...

Alaala mai i lalo lau Afioga i le Taitai o le Itu Agai, alaala mai i lalo. Alaala mai i lalo lau Afioga, alaala mai i lalo.

Ia, o lea ua faatu mai le lafo ma e leaga o lea foi na maua e le Nofoa. O le mea lea, o lea foi ua faaluaina.

*Na faamaonia le lafo.*

Upu na faatonuina e aveese mai faamaumauga o le saunoaga a le Taitai o le Itu Agai: [*“E leaga o le mea lea na tatalo mai ai ia te au, ou te faaaoga lou malosi faa-Minisita o Leoleo e taofi ai le case lea ma le toaina lea.”*]

**FOFOGA FETALAI:** Lau Afioga i le Minisita, ia, faauma maia, leaga o lea ua e toe tuu maia ae a na faauma lau saunoaga analeila. Ia afai o se mea... ia.

**Afioga Hon FAUALO HARRY JEFFERY SCHUSTER:** Faafetai i lau Afioga. Ua leva ona ou fia oo i le mea aupito taua o lau lauga, ae ou te tali faaaloalo atu lava ona o le ava... E leai, e leai sau faatonuga. O leoleo, e tai pei lava leoleo o le structure foi lea a le militeli, e sau mai le pito i luga le faatonuga e alu i le pito i lalo. E le fesiligia foi la e lalo le sau o le faatonuga mai luga. E le o se faatonuga a au. O tapenaga a leoleo, e tapena e leoleo i mea ua masani ai leoleo, e le iloa e au po o a tapenaga a latou. E fai lava e latou. O le tali la i lau fesili le sui usufono mai Safata 1, o le faaiuga lena o le faaiuga a leoleo.

Lau Afioga i le Fofoga Fetalai, faafetai mo le avanoa se i faafetaia ai si ou itumalo. Tulouna le paia i Alosina, Fuaifale o le Aiga Salevalasi, le Matua ia Faaolesa ma Onofiatele, ia, tainane le faletonu ma vainalelepa ma upu ia te oe Tuisamau. Faafetai tele i le aai i Apia, faasolo atu i Tamaligi, Aai o Niue, Maluafou, Tufuiopa, Malifa, Motootua, Leufisa, Leifiifi, Lalovaea, Tuloto, Matafele, Saleufi, Taufusi, Palisi, Alamagoto, Sogi ma Mulinuu. Ia, lau Afioga i le tamaitai Minisita o Tupe, ia e 20 itumalo, e tau faasoa la le miliona a tatou lea e tufa, ae se i oo i se isi taimi.

Faafetai foi i faafeagaiga i fatafaitaulaga eseese o lo o asuina le vai o le ola i le itumalo, i le Ekalesia EFKS i Apia, Aai o Niue, Leufisa, Sogi ma Mulinuu. O le Ekalesia Faapotopotoga a Iesu i Apia, le Ekalesia Katoliko i Mulivai, Matagaluega i Taufusi, Saleufi, le Mauga i Vaea ma Palisi, Ekalesia o le Au Paia o Aso e Gata ai i Motootua, le Ekalesia Asofitu i le laumua i Lalovaea faapea le Ekalesia Asofitu Tutoatasi i Saleufi. Le Ekalesia Peace Chapel i Vaimea ma le Harvest Centre i Saleufi ma le Assembly of God i Tufuiopa.

E oge upu ma oge taga i se tulaga e faafetaia ai le tou faaeaea i le tou tofia ai o lou nei tagata faatauavaa e avea ma outou sui usufono. Faafetai, faafetai, faafetai tele lava, o la outou pule lea. O le mea lava e gata ai le malosi, o le a ave i ai le malosi atoatoa ma le mafaufau i le tautuaina o le tatou itumalo.

Mo i tatou sa tatou tauva mo le tofi o le tatou itumalo, lau Afioga i le Matua ia Faaolesa Katopau Ainuu, lau Afioga Maugaalii Mualia, lau Tofa Vaea Eli Tuiletufuga, e le i faigofie le tatou tauvaga, ona o tatou tatou te omai uma i le nuu e tasi, ae tatou te aiga uma foi. Ae faafetai lava ia te outou le tausinio, faafetai foi ia outou le tausinio faatamalii, o lea ua maea le tatou tauvaga, ua oo i le taimi tatou te galulue faatasi ai e atinae le tatou nuu ma le tatou itumalo.

E faapitoaugafa sau faafetai i lau Afioga i le Matua Faaolesa Katopau Ainuu i lou tauaveina foi o le tofi i le 5 tausaga ua tea atu, na e faaeaea foi i le tatou nuu ma le itumalo, sa avea oe ma Minisita o Faamasinoga. Malo le tautua, malo foi le galue.

Faafetai foi i le mamalu o le itumalo o lo o aumau i atunuu i fafo, faafetai tele i la outou tapuaiga, la outou tatalo ma le lagolago. E fia faafetaia foi nai ou aiga faapea foi le aiga o si ou toalua o France, aemaise uo ma aumeamamae i Samoa ma atunuu i fafo. Faafetai tele mo la outou lagolago, tatalo ma alofaaga mo le faamoemoe. Ia alofagia e le Atua outou luma.

Lau Afioga i le Fofoga Fetalai, e faauma atu le lauga i ni saafiafiga e faauma atu ai lenei avanoa. O le tagata Saina ma le atunuu lenei o Saina, e i ai le latou ofo alofa i se atunuu pe a i ai se tulaga foi lea e avatu ai se faamalosi. O Saina, o se tasi lenei o atunuu matautia i le lalolagi o tagata Saina, ona o Saina na muamua lava gaosi le mea lea o le asikulimi. E ai asikulimi i le taimi na uluai gaosi ai le asikulimi, o la e susunu e le isi tagata foi lea mai Europa le Malo o Roma i le taimi lena e le i oo le talaiga a le Ekalesia i Europa. Ma o le ofo alofa a tagata Saina e faapea, a faapalagi e faapea, may you live in interesting times. Ia o si au tamai malamalama i le faa-Samoa, talosia ia e ola ma e soifua i taimi tauga lelei e tupu ai ni mea matagofie.

Lau Afioga i le Fofoga Fetalai, e vivii le loto i le Atua. E mafai ona ou faapea i le taimi lenei o lou olaga, ua ou ola i ni taimi tauga lelei ua ou vaai foi i ni suiga matagofie. O nei suiga lau Afioga, ua i ai taimi ua tofi e Samoa le tamaitai Palemia muamua lava i Samoa ma le Pasefika. Ia, lau Afioga i le Sao Faapito lau Afioga Fiame Naomi Mataafa, i lou ola tautua ma auauna ia Samoa, e 25 ou tausaga faatoa e sau i le Palemene, o lea ua e pale i le tofi, o le maualuga o lenei tulaga ua e ausia. E le gata i lou ausia o le tulaga o oe le tamaitai Palemia muamua, a ua e ausia foi le tulaga ua e oo i le tofi na muaimalae ai lou tuua ina ua faatoa tutoatasi Samoa. Se o nei tulaga, e seasea ausia. I le atunuu o Kanata, se tasi o atunuu o le Taupulega na muai muamua lava tutoatasi, faatoa tupu nei i le taimi lenei se tulaga

faapea, lea ua Palemia ai Hon Justin Judo, a o lona tama o Pierre Judo na Palemia i Kanata po o se taimi o le 1975. I Amerika, ua 200, o le tausaga lenei e faailoga ai le 245 tausaga talu ona tutoatasi Amerika mai ia Peretania ae faatoa faalua ai foi la ona tupu le mea lea i le ausia e se atalii se tofi na uu e se tama, i le ausia lea e John Adams sa Peresetene i Amerika i le 1797, a o lona atalii o John Quinsy Adams sa Peresetene i le 1825. Ia na tupu foi lea lata mai nei lava, o George E. Bush ma lona atalii o George W. Bush. I lou ausia o lenei tulaga maualuga, ua e siia ai le Aiga Salevalasi aemaise suli o Tuimavave. Malo lava ia te oe le faaea aiga. Ia, ma ua saafi foi le Aiga Salevalasi ma suli uma o Tuimavave i lou ausia o lea tulaga. Ia saga faaaupega pea oe e le Atua, faatutumu e le Atua ma faaauau ai pea lau tautua e pei ona i ai.

Ou te viia foi le alofa ma le agalelei o le Atua. O le isi suiga taugamalie ma le matagofie ua ou vaaia i le Kapeneta lenei, e toa-3 tamaitai. I le 12 o matou, 1/3 o le Kapeneta o tamaitai. Ma e faafetaia ai foi lau Afioga i le Palemia i lenei foi tofiga ua e faaeaea i tamaitai, ua tofia ai foi le Afioga ia Mulipola e avea ma tamaitai Minisita muamua i le tatou atunuu. Malo lava, o se mea matagofie lenei mea. Ae i ai foi moomooga ma le faanaunauga, e i ai le tulaga ua tatou manao e siitia le aofai o sui tamaitai i totonu o le Palemene, o se moomooga manaia ma matagofie i lou sui usufono, ou te matuai talitonu lava i le tulaga lea leaga a ou vaai i le tulaga lea, e amata ia tatou le mea lea, e amata ia tatou i le tatou fai atu i o tatou afafine, a faapea e te fia alu i le Palemene a Samoa, na o le Atua lava e taofia oe. A tatou tutu ma faaolaola le afi lea mai lava i teineiti lalovaoa lea e i ai i le taimi lenei, tupulaga o lalovaoa, ona olaola ai lea o le faamoemoe lea. Aua e faigata ona ausia le faamoemoe lea ia au lava ia, o lou faanoanoaga lea, o ou lava ia manatu. O le faigata ia, e i ai alaafaga o le tatou atunuu, e faigata ona matai fafine. E faigata la i lou mafaufau ona faavasega, e te manao i le isi mea, ae tapu mai le isi itu e tau tupu ma faaolaola le manatu lea i o tatou tagata. Ae a tatou tutu ma faaolaola le mea lea, ona maua ai lea e so o se tamaitai, na o le Atua lava e taofia ia pe a fia sau i inei i le Palemene o Samoa.

Faafetai lava i le Pule o le Statistics. I le tulaga o lo o i ai nei, o le faitauga aupito lata mai o tagata Samoa e 52% o alii ae 48% o tamaitai. Tailo i ai i le pule a le Alii, ae i lou mafaufau, ou te fia vaai i se taimi ae faapea foi le aofai o le Palemene, e tutusa le aofai o tamaitai ma alii e talia e lou mafaufau ou te fia vaai i ai. Ia ae tailo, ou te le iloa pe ou te oo ia Samoa, pe ou te ola i lenei taimi. Ae talosia i le lumanai e tupu ai le tulaga lea. Ae vivii foi lou loto i le Alii i Lona alofa ma Lona agalelei ia te au lava ia. Lau Afioga i le Palemia, faafetai tele i lou faatuatuaga na e tofi mai ai au o se tasi o au Minisita. O se faatuatuaga maualuga, ae ua faagaetia foi lou tagata, ona na amata mai lou sau i le polokiki, o le tele ia o lou faaaloalo i le HRPP le Afioga ia Tuilaepa ma le HRPP. Ae na mafua ona ou alu i le

polokiki, ona sa matou talanoa ma lou tei lea o Lealailepule, o Palusalue ma Papalii. O le aualii lea na o atu o la e ou te faamasino. Ia o le faamasino faatoa e litaea lava i lou oo i le 68 guarantee. Ia ona o atu lea fai mai, se omai tatou o e fai le Opposition. Sa iloa la e le aualii lea i lou mafaufau, e faapena lou mafaufau, ou te manao i ai ia i ai se Opposition i totonu o le Palemene o Samoa ona o lau vaai i ai ua malosia tele le HRPP. O lea la na ou sau nei, o lou lava loto o le Opposition, i le tele o lou faaaloalo i le HRPP, ae sa tele ia te au le taua e tataua lava i lea taimi ma lea taimi ona i ai se Opposition i totonu o le Palemene o Samoa. Ma e i ai foi le taimi a te i ua see mai le Opposition i le faigamalo, a o la e i ai ni tagata ua uma ona koloni e omai e Opposition. Faafetai i lou alofa le Atua. Na amata i o. O le mafaufau lea e i ai, o la e lava e mafaufau faapena i le itu lena, leaga o le itu lava lena na faasagasaga mai ai, a o lea ua te i lava ua oo mai i i ua faigamalo. Faafetai i le Alii o lea ua soo le circle na ou oo mai ai. Ia o le tulaga foi lea e i ai po o le a lava le valaau a le Alii a ua matua malie lava le loto. O lea foi ua masani i le nofo atu i i. Faafetai i le Atua.

Lau Afioga i le Fofoga Fetalai, faafetai tele lava mo le avanoa. Manuia tele lo tatou po. Faamanuia le Atua ia tatou uma. Faafetai.

*Na faaalua le agaga fiafia o le Maota i le patipati o latou aao i le maea ai o le Saunoaga Talifuaitau a le Minisita mo Leoleo ma Falepuipui.*

**FOFOGA FETALAI:** Ia, ua faamalo saunoaga i lau Afioga i le Minisita mo Leoleo ma le Toefuataiga aemaise foi le Ofisa o Faiga Palota. Ia malo faafetai. E talitonu foi o lea ua maua lelei e le Maota tulaga foi aua lau Matagluega ia aemaise foi le tele o fautuaga ua tuuina atu. Faafetai o lea lava ua e saunoa manino, o lau Afioga lava o le alii o le Tulafono, ia o lo o manino lava i tulaga uma ma tiute e pei ona i ai le Matagluega. O le mea lea, ia faafetai. Lea ou te talitonu foi o lea ua faamalieleina le tele o sui usufono i saunoaga foi ma faamalamalama aua lau Matagluega, o le mea lea, malo faafetai, aemaise foi o lou soifua tautua i le Palemene, o lea ua maua. E tatalo pea i le Atua ia faapena ona fesoasoani pea i lau Afioga i le faafeagai ai ma tiute ma faiva ma galuega. Malo faafetai.

Ia, a o le i oo atu i le Minisita o le a sosoo, e leai, e avea foi lenei taimi e ao ona ou fesoasoani atu i le Palemene, ona ua i ai mea ua tau tulai mai ma ua avea ma tulaga ua tau solia ai tatou Tulafono Tumau. E pei lava ona ou fai atu i le taimi ua sola, o le va fealoaloai ona o le manatu tele i le mamalu o le Palemene ma outou afioga o sui usufono mamalu. Ae i ai foi le manatu i le isi itu, e lelei foi le tatou o i tatou Tulafono Tumau a le tatou Palemene o i ina foi e faatonufofua ma faigofie ai le tatou galuega, aemaise lava le mea lea o le faauilavea. E lelei lava lou faitau atua o le Tulafono lea i tatou faauilavea. Tulafono Tumau 82(1), e ao i se sui usufono o lo o fia faauilavea ona talosagaina le faatagaga mai le Fofoga Fetalai, ma e tataua

ona ia faaalua manino le uiga o le faauilavea, po o se mea e fia faasao, se mea e fia faamalamalama po o le sailia o se faamalamalama. Afai e talia e le Fofoga Fetalai le faauilavea, o le a tatau loa i le sui usufono o lo o saunoa ona alaala i lalo. O le aualea lenei tatou te ui ai.

Ma ou te manatu foi i lenei afiafi, e taua foi se faamanatu a le Nofoa. Ia, e lelei lava le tatou o i tulaga mamalu ma Tulafono Tumau a le Palemene, ae faigofie foi le tatou galuega ma le fesopoai ai foi a tatou faamatalaga ma oo atu i nisi tulaga. O le mea lea, o le tulaga lenei o lea ua ou faamanatu atu, ma o lea o le a faatino ai le tatou galuega i toega o le tatou galuega mo lenei foi aso, ae ina ia faafaigofie ai le tatou galuega. O le mea lea, faafetai lava i a outou Afioga i le lagolago mai pea i le Nofoa e tusa ma le faaauau pea o le saunoaga a le Minisita. A maea, o lea lava ua manino i luma nei e tusa ma le faamaumauga o le tatou Fono ia i latou na faali o latou finagalo, ia o i ina tonu lava o lo o i ai le avanoa o le faauilavea. Ia ui mai pea iinei e faigofie ai le tatou galuega. Ou te talitonu e le o ni mea fou i a outou Afioga, a o le taumafai lava ia tausisia tatou Tulafono Tumau.

O le mea lea, o le agaga lenei o le Nofoa e faamanatu atu. Ae tulai maia lau Afioga i le Minisita o Tupe, ou te talitonu o lau Afioga o le auga lea o le tatou faamoemoe. O le mea lea, ia tulai maia lau Afioga i le Minisita o Tupe aua lau saunoaga aua foi nisi o mataupu sa laga e le paia o le mamalu o le Maota i sui usufono mamalu o le Palemene. Lau Afioga i le Minisita o Tupe.

**Afioga Hon MULIPOLA ANAROSA ALE MOLIOO (Minisita o Tupe):** Faafetai i lau Afioga i le Fofoga Fetalai. Atonu o le tou silasila lona lua mai lea i lou tulai atu. O lau uluai tulai i totonu o le tatou Maota Fono, o le folasia lea o le tatou Tala o le Tupe. O lona lua lenei, ma e lua foi vaega o lau folasaga. O le vaega muamua, ia leaga e faigata le faaaloalo ua tuuina mai. Lona lua, ia o le a ou tali i fesili ua maea ona tuuina mai e le mamalu o sui usufono aemaise foi o le saofaiga a le Kapeneta.

Lau Afioga i le Fofoga Fetalai, ou te see lava ae lilia, ou te tu foi ae popoe, e tautala foi ma le faaeteete, e faigata ua paia ma mamalu Tiafau o le malae o le faautugatagi a Samoa. Tulou le afio o le Fofoga Fetalai o le Maota, o le foe na toese aua le sa folau o Samoa. Tulou le afio o lau Afioga i le Palemia o le Malo Tutoatasi o Samoa lau Afioga i le Sao Faapito Fiamē Naomi Mataafa Mulinuu II. Tulou lau Afioga i le Sui Palemia Tuala Ponifasio. Tulou le afio o Afioga i alii ma tamaitai Minisita faapea foi Minisita Lagolago o le Kapeneta. Tulouna le paia ma le mamalu o sui usufono filifilia aua le Fonousu o le Malo Tutoatasi o Samoa. Ae le vaea foi le falaooto aua le paia ma le mamalu o le Vaega Faaupufai o lo o agaia le Malo, i le susu o lau Susuga i le Taitai, Tuilaepa Sailele Dr. Aiono Malielegaoi, faapea foi le susu o lau Susuga i le Sui Taitai ma le Vaega Faaupufai.



Tulou le afio i lau Afioga i Le Ao Mamalu o le Malo ma lau Masiofo, aemaise o Sui o le Fono a Sui Tofia. O le paia lava lea aua Tama ma Aiga, Tumua ma Pule, Aiga i le Tai ma le Vaa o Fonoti. Tulouna le paia i Taitai o Ekalesia ma le paia o le aufaigaluega o nono i le Atua aua Samoa. Ae le faagaloina le tapuaiga a Tutuila ma Manua. O le paia lava lea aua Sua ma le Vaifanua, o Fofu ma Aitulagi, Saole ma le Launiu Saelua, Tama a le Manua ma le Tootoo o le Faleula. Tulou, tulou, tulou lava.

Ae ou te le i taumafai e avatu se vaega o le sao o lenei itumalo aua upufai o Malo, e muamua lava ona ou pai atu i le paia o lou itumalo o Palauli Sisifo po o Palauli 1. I le afio o Letelemana ma Leaupepe, afio le alo o Lilomaiava, le mamalu ia te oe le falelua. Afio le Matua le Tauavamea, afifio le uso o Leilua ma Faliuga, Leitualamavae ma le tama a le fale, faapea le nofo a ituaiga i le Ailaoa.

Afio lau Afioga i le Sao Faatupuinati, afio le Tuuauato ma le falesefulu o Pesefeamanaia, afio alo o Lilomaiava ma le nofo o usoalii, alaalatai e na tai i upu ia Gagaemalae. Afifio Aiga, alaalatai i laua i le Matua ia Tuato ma Tuitolovaa ma le mamalu o le faleupolu o tofiga a Salemuliaga. Afifio suafa ma sa Laulu, alalatai Faatoafea ma le nuu e faigata. Afifio le aiga paia, aiga Salevalasi. Alalatai le tautalaga ia Faiumu faapea le falefa ma le faigata.

E fia paia foi le agaga faafetai ona o le aufaigaluega tofofi a le Atua i totonu o lou itumalo, e amata mai i Fuailalo seia paia ia Taga. O a outou tatalo ua manuia ai lou tagata faatauvaa. Ia utupupuina mai lagi la outou tofa aua lo outou valaauina mo le Atua ma le Talalelei.

E fia faamau foi le agaga faafetai i komiti a tina, faletua ma tausii saoa ma saotamaitai. E faapea le malosi o nuu atoa, aemaise foi o le mamalu o e o lo o i ai manaoga tumau. Faafetai o la outou pule lea ua ou sapaia faatua eleele. Ia alofagia e le Atua Pulepuletelete, o outou tiute ma faiva alofilima o lo o feagai ai aua le manuia o le tatou itumalo.

E le faagaloina lou aiga, le tofa i le too o le fua, Molioo Pio Molioo ma le ma fanau. E faafetai mo lau tapuaiga. E le faagaloina foi si ou tina, mama, sa e tulivae i le ao ma le po aua se manuia o lau fanau. O lenei ua ou saofai atu i le Maota Fono o Samoa. E faafetai atu i ou aiga i totonu o lo tatou atunuu faapea aiga o lo o i atunuu mamao. O aiga o lou tama faapea aiga o lou tina, faafetai, faafetai, faafetai tele, mo la outou tapuaiga ma le tatalo.

Ae ou te le i alulua, se i ou afe ane e momoli mea i Matautu Sa. Ao se faasao i le Atua o Malo, ua lauiula ai, ae pou i toa le aso. O le aso sa faataumamate i ai le tofa a le tupu, ae a se foelafo o tulafale pe tua ma ni a.

O le upu moni ua le tauilo mauga o ao. Ua tilofia aolele talu galuega a le Silisiliese. A o le aso fai mai le fai Salamo. “O le leo o le alaga fiafia ma le Olataga, ua i ai lea i faleie o e amiotonu. Ua se toa le aao taumatau o Ieova, ua maualuga le aao taumafai o Ieova, ua se toa lava le aao taumatau o Ieova.”

O le upu moni, ua malie o, ua malie malo, ua inu malie lo ta galala sa i le ala, ina ua faataulealea le Atua mo oe, ma au le tagata faatauva.

E le na ma le laina, e ui lava ina matagi taumuaina le folauga, a o faataumuaava le sa o le Faigamalo, aua le tiuga i aau mamao, se i saili ni lelei ma sue ni manaia mo Samoa. Ae le afaina, fai mai le Salamo a Tavita. “Ua liua e ia le afa ma malu, ua taoto ia te Ia le aupeau, ua na taitaiina foi i latou i le taulaga na latou loto i ai.” O le Atua sa tautai folau, o le Atua foi sa pisia i vasa ma taia i tia, ina ia ae i manu faiva o le aiga tautai. Se i fai se faasoa tuafoe ma se faasoa paepae, leaga e faigata lau taliuta ma lau otolaufai, oe Samoa le atunuu pele i le loto.

Ae le mafai ona galo ananafi na solofuea ai le ala ma galu tuia ai le vasa. Le ananafi na sautia ai i malae le u na fana i le vateatea, ma ifo i puanea le tao na velo i le maninoa. Se i tau so ta ai, i tapalega ma togialugaga aua so ta taeao.

A lea ua lagona le leo i Tiafau le malae o le faautugatagi a Samoa, ina ua ta lagi se vii, Samoa tulai ma sii ia lau fua, o lou pale lea. O lana matalalaga o lana fenu, o lana lauie tauave, o lana tutua, o lana ie, o lana tata ma lana upeti. Na mamanu ai so ta pale ma so ta titi, e te saasaa ai, aua faalagamaea a Samoa.

Ua a nei? Pale ua pale, titi e ua titi, ina ua tago i ula ae tagai i malo. O le faafetai lea i nai outou tuua ma ni o matou matua, o e na latou laaina ni uluai laa, ina ia e saoloto ma ou fiafia.

A o le aso, o se taeao sa atofa mo au, seia ou luilui malie le agatonu a tamalii, e pei o le faiva o tausala. Ma ou tala le fau e pei o faiva o manaia. E leaga e faigata saunoaga a sui mamalu le Tala Faatatau o le tupe lea ua i le Maota Fono a Samoa.

A o le upu lava i si ou itumalo, ua atue le faga i puna, ua malie o le faga i foa. Aua o lea ua laulausasala le faiva o le aiga tautai, e ala i saunoaga a le Kapeneta aemaise o sui mamalu o le Maota.

Ae ua ou manatua le tatalo a le Perofeta o Ieremia, “Ieova e ia e aoai mai ia te au, tau lava ina ou faia ma le faatatau.”

A o moomooga ia o le loto se i faamalie lou tilialualu mai, aua galuega fai, aemaise o le atinaeina o lo ta atunuu, e ala i le a itumalo ma lea itumalo. A o upu taua ia i le tatalo a le Perofeta, “aoai mai au ina ia ou faia ma le faatatau.”

A ia malie afenoa foi le tofa ma le uta, i sui filifilia a le atunuu aua le Fonousu a Samoa. A alu alu le faasoa a le Matagaluega ua papau le laulau. Ona ou faapea atu foi lea, ia fati magalo ia le ava nai taga, aua se tofa ma se faautaga a lenei Maota.

Ae tau ia ina ou faamanatu, o upu lava nai ou eleele, e le o ni palapala malo na ou sau ai, a o ni malo ia maua ma tau so ta ai.

Ua faamalo i lau susuga i le Taitai o le Vaega Faaupufai e Puipuia Aiatatau tatau a tagata. Lau susuga Tuilaepa i lou tulai mai i tausaga ua

mavae. Ua uma ona ou faailoa atu i le Fono a le tatou Matagaluega i le tatou ekalesia. E le po lau vaai o oe o se taitai, sa avea ma faasinoala mo Samoa. Sa e tulai mai e tautua Samoa i so o se vaega. A lea ua tulai mai Samoa. A lea ua iloa au galuega, faafetai o lau pule lea.

O lau afioga, faapea ma le afioga ia Lautafi, ia ma au. O lupe faalele ia o le tatou Matagaluega Katoliko i Siusega. O lona uiga, e tele faamanuiaga i totonu o la tatou Matagaluega.

E faamalo mo galuega e tele sa faatino, ma e tautua ai ia Samoa.

Lau Afioga i le Palemia, e faaleoina le agaga o le faafetai, ona o lau faatuatuaga ua e tofia ai, se tamaitai muamua mai Palauli i Sisifo po o Palauli 1, e avea ma uluai tamaitai Minisita o Tupe. E faafetai i lau faaeaea, ma e i ai lou talitonuga, o se faamanuiaga foi lea i lo matou tulai mai.

O lea e afio atu le afioga ia Matamua, faapea foi Faimalotoa ma lou ia foi tamaitai faatauvaa. O le tulai mai o lau Afioga i le tamaitai Palemia muamua o Samoa, aemaise foi o le vasa Pasefika. O se tu faamatie foi lea, i tamaitai uma o Samoa. Ae a faletua o faafeagaiga, ae a taupou sa ma monike. Ae a tamaitai uma o Samoa, faafetai i lau faaeaea. Ua iloga foi alagaupu o le tatou gagana. Fai mai e a? O i tatou o pae ma le auli. O i tatou o togiola mo aiga, o i tatou o malu o aiga.

O lea e momoli atu ai ma faaleoina le agaga faafetai, e tusa ai foi o lou faatuatuaga ua tuuina mai ia te au.

E le mafai ona ou alu loa, ae ou te le faafetai i la matou Matagaluega o tupe. O lea ou te pese, a o le fausiaina o nota o le pese, sa galulue ai le Matagaluega. O lea foi e ala ai, ona tagitagi lou leo i totonu o le Maota o le Palemene, ona sa tuufaatasi e le matou Matagaluega. O matou aufaufautua, aemaise ai foi le komiti o le Vaega Faaupufai o tupe i totonu o le Faatuatua Samoa ua tasi. Sa o matou galulue i le po ma le ao. Sa o matou taape pe o le ta o le 11:00 i le po, ma le matou Matagaluega. Ona o le taumafai ina ia tapena ia ona tulaga maeaea le tatou Tala o le tupe. O lea ua maea atu le vaega muamua o lau folasaga.

Atonu o lea ua oo mai i le vaega sa fesiligia ai foi le Minisita o Tupe i le tele o vaega uma e pei ona i ai i totonu o le Tala o le tupe.

O le sui usufono mo Vaisigano 1, ia atonu na tele lava a tatou saunoaga ma fetalai, i le tatou \$1 miliona. Sa fesili le sui Minisita o Vaisigano 1, faafetai ua taoto le tai \$200 a itumalo, ae o le fesili. O fea le tai \$1 miliona sa tatou faatino, ae o lea ua tai \$200,000. A outou silasila i totonu o le tatou paketi i lalo o le Matagaluega o Tina ma Tamaitai, o lo o tu matila mai ai i ina le \$11 miliona. Ma o le sini autu o le polokalame leni, o le atinaeina o itumalo, e fuafua o le a faamatuu atu ai le vaavaaia, ma le faatinoina o atinae a itumalo, e faatinoina lava e i latou. E tusa ai ma aiaiga o le faamatuu atu o leni fesoasoani, mai le Malo.

O le tausaga faale-tupe 2021/2022, e \$11 miliona o lo o faatatauina mo le set up o le tatou Project Management Unit, i totonu o le Matagaluega o Tina ma Tamaitai. E faapea le vaegatupe e faatino ai le vaega tapenapena o lenei polokalame, e fua i aiaiga faataatitia. O le a fuafuaina le faamatuuina atu o se vaegatupe faavae, e fua i aiaiga ma le itumalo. O nei vaega, e tatau ona faamalieina ae le i totogi atu se tupe i tua.

1. Avanoa le seleni e \$200,000 tupe faavae mo itumalo taitasi e amata ai ona faatino loa le tuufaatasiga o le District Development Committee. O le fund e demand driven e le okometi.
2. Sainia le aiaiga ma le faaaogaina o le vaegatupe e faamatuu atu e le Malo po o le Funding Agreement.
3. Faatino ia aoaoga, e manaomia e le PMU ma faaaoga ia polokalame o lo o i ai i totonu o tatao seen plans ma tatou district plans. Ia iloa ai po o le a le atinae a le itumalo.
4. O lo o fuafua e na o le \$200,000 e mafai ona avanoa mo itumalo taitasi i le tausaga 2021/2022 lenei, ae faatoa totogi atu pe a fai ae faamalieina uma tulaga ma aiaiga o le polokalame, e pei o le faatuina o le district committee ma le faatinoina o aoaoga faatulagaina. E taitai e le Matagaluega o Tina ma Tamaitai faatasi ai ma le Project Management Unit.
5. E fuafua le tausaga lenei 2021/2022 o le a tapena ai itumalo, aua le faamatuu atu o le \$1 miliona i le itumalo i tausaga faale-tupe o i luma.

Sa fesili le sui usufono mo Salega 1, 8% lea na tufa a le NPF. O le fesili, o fea le isi 4%? Afai ua toe faafoi i totonu, o le a le mea e le toe aumai ai ua lata le lotu tamaitai.

O le pasene o le saofaga mo le tausaga faaletupe 2021. Sa faalauiloa i le aso 28 Iuni 2021 mo le tausaga lena. Ua le mafai ona toe faatino se isi pasene o le aufaisaofaga. Mo le silafia e le Palemene, sa faalauiloa e le komiti faatonu, le totogiina atu o cash payment mo le tausaga faale-tupe 2020/2021, i le aufaisaofaga, ona o le tulaga pagatia sa i ai le atunuu, ona o aafiaga o le Koviti-19.

E le o se mea masani lea a le NPF le totogi faapea o cash dividend i le aufaisaofaga. Ae sa faatino lava ona o le tulaga pagatia o le tamaoiga ma sa manaomia ai se stimulus e toe uunaina ai.

I le aotelega, e tusa ma le \$73.2 miliona le tupe na totogi atu i members i le 18 masina, faatoa maea atu nei. E le i faatinoina muamua se tulaga faapenei i le tala faasolopito o le NPF. E faapuupuu atu se faamatalaga, i sui sa fesiligia lea mataupu. E pale mai le Malo lenei, ae tapunipuni mai loa faitotoa o le NPF, ona ua matuai maoae le tupe ua totogi atu i le vaitaimi lava lenei.

O le fesili i tatou aitalafu. Atonu sa toatele lava ni sui usufono na fesiligia tatou aitalafu piliona. O le tulaga o lo o i ai le aitalafu a le Malo i le taimi

lenei, e \$1 piliona. O le totogiina o nei aitalafu, o lo o faaoga ai tupe maua a le Malo i tausaga uma. E tusa ma le \$71 miliona le tupe o lo o faaagaga mo le totogiina o nei aitalafu i le tausaga faaletupe 2021/2022. E tusa ma le \$71 miliona se vaegatupe manaomia e toe totogiina ai nei nonogatupe, po o le debt servicing, mo le tausaga faaletupe, o lo o faatalanoaina nei, 2021/2022.

O lo o maualalo le tau e totogi ai aitalafu i le taimi lenei, ona o se faamama avega e taua o le Debt Service Suspension Initiative. Mo atunuu e tusa ai ma le maliega i le va o atunuu malolosi po o le T 20 lea o lo o faatinoina ai le tuusaunoaina o le totogiina o aitalafu mo le 12 masina.

A maea lenei faamama avega e ono oo atu i le \$99 miliona le aofaiga o tupe, tupe alu e totogiina ai aitalafu a le atunuu.

E tusa ai ma le faafesili na tuuina mai, pe faapefea ona faatinoina polokalame o lo o taua e le Malo, pe a fai ua oo atu i le \$1 piliona le aitalafu a le atunuu. E pei ona silasila atu i le Tala o le tupe, e tusa ma le \$635 miliona tupe maua o lo o aoina i totonu lava o le atunuu.

O le vaevaeina o lenei tupe, o lo o faailoaina atu e faapea. \$100 miliona e faaalu i le totogiina o aitalafu. E \$535 miliona o lo o totoe mo galuega faatino a le Malo, e ala lea i ana Matagaluega ma Faalapotopotoga. E ui lava foi o lo o mafai ona service le aitalafu lea ua oo i le \$ piliona. Ae i ai le popolega ona o nei nonogatupe o lo o faatino i foreign currencies, ma e i ai lava le risk, ona o le fesuaiga o le exchange rate, ma le devaluation o le \$, e mafai ona alu ai i luga le tului ma tele ai le principal o le totogiina o le loan.

O le isi foi tulaga, a fai ua ausia le tapulaa lenei o le ausia o le 50% o le tamaoaiga, o lona uiga, ua mole si tatou menty. O le a le mafai ona toe fai se isi nonogatupe, seiloga e toe sii atu i le 60% le tapulaa. Ae le o le tulaga lelei lena, o le a amata nei ona faatino fuafuaga mo le toe iloiloaina o faiga faavae ma tapulaa o nonogatupe, ina ia mautinoa ai, e mafai ona tuutiitia a tatou aitalafu. O le autu o le manatu lenei ua ausia le 50%.

Sa fesili ia sui usufono o Aana Alofi Nu 3, i scholarship scheme i le Iunivesite. O lo o faatautaia e le Ofisa o Tupe i le NUS ia scholarhip scheme, e mafai ai ona fesootea ma galulue faatasi Matagaluega ma le NUS, i le faavasegaina o lenei fesoasoani.

Sa fesiligia foi, ia tatou tupe ma alagatupe ia e ave i le ADRA, ia e sao lelei lava. O lenei fesoasoani o lo o galulue ai le Malo ma nisi o faalapotopotoga laveai, e pei o le ADRA, o lo o latou faatinoina lea tulaga, e fua i taiala ua maea ona talanoaina, ma malilie i ai i le faasoasoaina o lenei seleni. Ae ia tino mai ni fale mo e limavaivai, e lelei lona fausiaina, aemaise lava i taimi o timuga ma matagi malolosi.

Sa fesiligia foi e le sui mo Faasaleleaga Nu 2, le tusigaigoa, le \$50. E faailoa atu, e le i ready mai le tulaga o le tatou National ID System, ona o lea e faatali le faatinoina o le tulafono e faatino ai. O le lipoti o lo o aumai,

ua uma nei ona tufaina le tai \$50, ae o lea e faatali se lipoti ma seleni sa tufatufaina, e tusa ai o lea polokalame.

Sa fesiligia e le sui usufono mo le Vaa o Fonoti, le \$250,000, lea e tuuina atu i taligalu. O lenei vaegatupe, o lo o tuuina mai lava i Matagaluega o lo o vaavaaia nei vaega. Sa fesiligia foi e le sui usufono mai Vaa o Fonoti, le tuutiitia. Ua matauina i le Tala le tupe, ua faaitiitia mai le \$18 miliona i le \$17.7 miliona le fesoasoani mo aoga. Ma e matau mai e le sui usufono lea, le alofa i fanau a le atunuu.

O le tali, o le fesoasoani masani lava ia a le Malo mo aoga, e \$14 miliona. Ae na siitia i le \$18 miliona i le tausaga na tuana'i atu nei 2021/2021 e tusa ai ma le vaega lua, o le fesoasoani a le Faigamalo sa i ai, e tali atu ai i aafiaga ona o le Koviti-19. E talu ai ona o le naunautaiga e fesoasoani atu i le totogiina o faiaoga, o lea ua finagalo ai le Faigamalo fou, ia faaauau ai pea i le maualuga ua faamauina, e tusa ma le \$17.7 miliona.

O le \$300,000 ua tuutiitia ai, ua faasafua atu lea i nisi o vaega a le Matagaluega o Aoga, e siitia ai galuega patino i le tapenaina o silapasi o aoga uma a le atunuu.

O lo o taumafai atu lava, e tali atu le tele o fesili sa tuuina mai.

Sa fesiligia e le sui usufono mo Aleipata Itupa i luga. Ua matau ua tele le pau i lalo o le Tala o le tupe mo le Matagaluega o Galuega, po o se mea o le \$12miliona po o le 15% lea mai le tala o le tupe talu ai.

O lo o siitia le tupe o le tala o le tupe a le Matagaluega o Galuega mo galuega faatino. O le pau e pei ona taua e le sui mamalu, e mafua i le pau o grants mo le LTA ma le Samoa Water Authority, ona o galuega sa faatatauina i le Tala Faaopoopo o le tupe. O lea tausaga lea faatoa mavae atu, e faatinoina ai ae le i faia le palota tele.

O le isi foi fesili sa tuuina mai e le sui usufono mo Aleipata Itupa i luga. Sa ia faapea ai, o le social sector lea ua ave i ai le faamuamua, e le tupu tele ai se tamaoaiga. Aua e i ai le manatu, a tele ni tulaga faapea e ave i tua, ona i ai lea o le agaga o le atunuu, o le a nofoai ae le gaoioi ma galulue, ona o lea e i ai faamanuiaga e avatu e lo tatou Malo.

E fai lava si faanoanoa i le faamatalaga a le sui mamalu, e faapea ua ave le faamamafa a le Malo i social sectors, ma e le tupu ai foi se tamaoaiga. Ae i ai lou talitonuga, o ni tagata soifua maloloina, soifua aoaoina ma fiafia, o le fatu lea o so o se tamaoaiga malosi e faamoemoe i tagata, e le faamoemoe i auala Ma a matauina foi, ua tele faafitauli, pe a matau i ai lo tatou soifua maloloina. Ua siitia le tinoputa, ua alu foi i tua le tulaga tau i le aoaoga.

Ae le gata foi i lea, ua tele le sauaina o tina ma tamaitai. A tatou vaavaai foi i ai, ua fau isi falepuipui, o lona uiga e tau mai i ina, o lo o siitia pea ia faafitauli ia, e ono afaina ai le nofo filemu o le tagata.

A tatou vaavaai foi i le Toomaga mo e puapuagatia, e siitia le numera o le falepuipui, toe siitia ai alo ma fanau o lo o sauaina, ma o lo o tumu ai le tatou apitaga i Tuanaimato.

Na saunoa foi le sui usufono mo Samatau ma Falelatai, o lo o ia fesiligia ai, ia le autu o le Tala o le Tupe, ia poupou, atiae ma faasoa tatau le tamaoaiga mo le siitia o le soifua manuia o tagata uma o Samoa. O lo o faapea mai le sui usufono, aisea ua poupou ai, aisea? O le anavatau a le Vaega Faaupufai lenei, o lou aiga, o lou atunuu, o lou talitonuga faakerisiano ia ma lau aganuu, ia o le tatou matafaioi faatasi lea.

A poupou se fale, o lona uiga ua vaivai lona faavae. O lea foi ua o tatou vaai i vaega uma ia, aiga o le aganuu ma le faakerisiano, e pei ua atagia mai ua solo i tua. Ma o se tasi lena o vaega o lo o taumafai e momoli atu i le autu o le tatou Tala o le Tupe. E faapefea ona poupou? E faapefea ona atiae? E faapefea ona faasoa tatau ia le tamaoaiga? Ma siitia le soifua manuia o tagata uma o Samoa. O le tali, o le tatou galulue faatasi. O le tatou feoeoeai, o le tou tuualalo mai, ia faapena ona tau ai lau o le faamoemoe, e tusa ai o le Tala Autu o le tatou Tala o le Tupe.

Ia sa i ai foi nisi fesili i le tatou vaalele, o lea ua maea ona tali atu ia le Afioga i le Minisita e ona le vaalele. Ia o le tulaga i le tatou vaalele o le a ou talanoa lava ona o le matou foi tiute ma le matafaioi o lo o aafia ai ia le tatou seleni. Ia, atonu foi o lea na saunoa foi ia le Afioga i le Minisita, ia e toe tasi lava ia le matou feiloaiga ma le fonotaga ma le matou Komiti, ia ona fai loa lea o se faaiuga, ia ma tuuina atu i luma o le Laulau a le Kapeneta.

O le taimi lea i le tatou vaalele, i le nonogatupe o lo o i ai i le taimi lenei, e \$35 miliona. Ia ma e matau atu, o le tele o miliona nei, ia o lo o faatupe mai i le UTOS. Ia mo le silafia, o le UTOS o se tasi foi lea vaega e i lalo o lau portfolio, ma ou te popole tele. E i ai le talitonuga, e tatou te aufaatasi, e matua aoga le vaalele. Ae o ni matou... o ni options sa ou vaavaai i ai, ioe, muamua, faafetai i le Faigamalo e tusa ai foi o lenei foi aseta taua, e mafai ona atiae ai ia le tamaoaiga.

Ia o lona uiga, e tatau ona aumai le vaalele. Ia ae e i ai foi isi options sa ou mafaufau i ai, e tatau ona toe faafoi ia le vaalele. Ia ae o le vaalele, o lea ua i i i Brisbane. O lona uiga, o lea ua agai mai ia le vaalele. Ia sa ou talatalanoa lava i le Afioga i le Minisita, se vaai ia tatou, matou tupe ia e i totonu o le UTOS, ne i te i ua uma atu ia le UTOS, ae toe talosaga mai i le NPF e toe fai atu ia ni nonogatupe, ia ma aafia ai ia vaegatupe a o tatou tagata. O lou popolega na.

Ia o isi options sa ou talatalanoa ai i le Minisita, ia se i vaai pe le i ai se aufaivaalele i o i Brisbane, ae trade in ai ia le tatou vaalele, ae aumai ai ni tamai vaalele se tolu, ae service ai le tatou agai i Tutuila, alu agai i Asau, alu i Maota, tatou faaoga ai le mea na o le trade in. E le na o taavale e trade in, e trade in foi vaalele. Ae o lou popolega na faaMinisita o Tupe, o

le aafiaga o le tatou tamaoaiga, ona o le aitalafu o lo o tulai mai i le taimi lenei. Ia atonu foi o lea sa maua ia faamaumauga, ia sa tele foi le gau o le tatou vaalele muamua. Ia o lou popolega lena ae o lea ou te vaai atu, o le isi \$35 miliona na e mafai ona fai ai ia tatou tai miliona i o tatou itumalo.

Ia o nisi o fesili sa tuuina mai, fai mai o tofogi o avetaavale a Minisita e \$34,000. Ia mo le silafia, o avetaavale o lo o faafaigaluega nei e sui usufono mamalu o le Kapeneta i le va o le \$12,000 i le \$15,000 i le tausaga. E le aofia ai alauni masani e tai \$8,500 i le tausaga. O lona uiga, e leai se avetaavale o faafaigaluegaina nei i le \$34,000.

O nisi o fesili sa tuuina mai, o aiaiga mo le tufatufaina o le \$10 miliona e fesoasoani ai i pisinisi e aofia ai pisinisi feoloolo, ma pisinisi laiti ua aafia ona o le tapunia o femalagaiga ma isi aafiaga o le Koviti-19. Ia mo le silafia, o lo o galulue ia le Matagaluega o Tupe ma le Matagaluega o Pisinisi o Alamanuia ma Leipa, i luga o aiaiga o lenei fesoasoani, ina ia faamautinoa ai le mafai ona oo atu ia lenei fesoasoani i pisinisi uma o le atunuu, e ono manaomia nei vaegatupe. Ma o le a faalauiloaina nei tuutuuga ma aiaiga, i le maea ai o nei tapenaga, i luga o le faamalumaluga a le Kapeneta. Toeitiiti lava uma, onosai mai.

O le faamamafa o le a ave lea i pisinisi laiti, small to medium enterprises. Ma o le a galulue soosootauau ai Matagaluega ua taua ina ia faamanino ia ituaiga pisinisi. Mo le silafia, e tusa ma le 4052 pisinisi i totonu o le atunuu sa resitalaina i le Matagaluega o Pisinisi, Alamanuia ma Leipa i le tausaga 2019. E tusa ma le 3,606 i Upolu 446 i Savaii.

E tusa ai ma se suesuega sa faatinoina e le Chamber of Commerce i le 2020, sa faailoa mai ai nisi o pisinisi vaega taua e latou te manaomia ai ia se fesoasoani a le Malo. O nei vaega e aofia ai Faiga Faavae ma Tulafono faatonutonu o fesoasoani faapitoa mo Vaega Tumaoti, o fesoasoani tau tupe, faaleleia o atinae tetele, tulaga ma aoaoga ma le siitia o le tomai o le aufaigaluega, fesoasoani mo atinae tau faatoaga, siitia tau soifuaga faasoifua maloloina. O nei vaega uma o le iloilo totoa i ai le Malo, aua le faasoaina tatau o lenei fesoasoani. O le naunautaiga, ia faasafua lelei ia fesoasoani mo e aafia i lenei vaitaimi o faigata, o lo o aafia ai ona o le Koviti.

Tufatufaina o le \$5 miliona, e fesoasoani ai i faletalimalo uma. Ua maea tapena foi ia le Matagaluega o Tupe ma le Pulega o Tagata Tafafao Maimoa mai i Fafo, le faatinoina o lenei fesoasoani, e aofia uma ai faletalimalo ma beach fale uma o le atunuu. E tusa ai ma le resitala o Tagata Tafafao Maimoa mai i Fafo, e tusa ma le 153 pisinisi tau fale apitaga i totonu o le atunuu, ae o le matau a le Matagaluega o Tupe, e i ai nisi o pisinisi e le o aofia ma o tulaga nei o lo o galulue faatasi ai paaga uma, o lenei vaega maoti, e faamautu lenei lisi, ina ia mafai ona faaoo atu le fesoasoani a le Malo.



Ia lau Afioga i le Fofoga Fetalai, ia atonu pau ia o nisi o fesili sa ou faamaumauina. Ae e i ai lou talitonuga, o le tele o tali a isi vaega o Minisita, ia o lea sa tali atu ai nisi o fesili sa faatulai mai ia e le tatou Itu Agai, ia aemaise foi ia nisi o tatou sui a Minisita.

**Afioga Hon Tapunuu Niko Lee Hang:** Lau Afioga i le Fofoga Fetalai....

**Susuga Hon MULIPOLA ANAROSA ALE MOLIOO:** Ia momoli le agaga o le faafetai i lau Afioga i le Fofoga Fetalai, faamalo foi le tauatai i le tatou Maota Fono, ia faafetai.

**FOFOGA FETALAI:** Ia faafetai o le mea sili lea ua faafogafoga ia le paia o le Maota i le Tala Autu o le Tupe. Ia aemaise lava ia le Minisita o Tupe lea e faafeagai ma lenei galuega tele.

O le ala foi lea na talanoa atu ai i lo tatou Maota ina se i maea lelei le... ia ona maua foi lea o le avanoa o lo outou mamalu. Ae o lea ua uma ona ou talanoa atu, manatua lelei, o le Tala o le Tupe, o le Tala i le Tupe o le Faigamalo ua i ai nei.

Ia ua uma ia tatou lauga faalauaitete, ia ae o le avanoa lenei, o se faauilavea i se mea e fia faasao ma se mea e fia faamalamalama.

**Afioga Hon Tapunuu Niko Lee Hang:** Lau Afioga i le Fofoga Fetalai o se mea e fia faamalamalama lau Afioga.

**FOFOGA FETALAI:** Oi o le mea lena ae ui mai pea i le Nofoa, ona avatu ai lea o se faatagana. Ia ae ua le toe manaomia ia tatou lauga foi ia e faalautete aua e pule lava ia le vaega lea i le latou Tala o le Tupe. Ia na ona... o i ai se mea o faaletonu i le tou faafogafoga mai, ia ma se mea na outou laga, e le o sao ia ma faamalamalamaina.

Ia tulai mai ia lau Afioga i le sui usufono mamalu.

**Afioga Hon Tapunuu Niko Lee Hang:** Leai o ni nai mea laiti lava ia e fia faamalamalama mai e le Afioga i le Minisita e pei foi ona taua i lau lauga ia le tupe lea e \$500,000 lea e faalelei ai ia tapenaga o Lipoti Faaletausaga ma tulaga faapena. Ia ae manatu e le o faatauaina e le Afioga i le Minisita lau tuualalo, e aumai lea tupe e sefe e fai ai nisi galuega, ae mafai ona ofo atu ia lau auaunaga e free, free of charge. Ia pe a manao ai, ia ae e le afaina.

O le isi mea lau Afioga, sa fia au lava lau lauga i le nonogatupe lea na aumai i le lipoti a le... lea e faapea ua amo e latou le aitalafu na fai e le HRPP. Ao se mea foi lea lau Afioga e fesoasoani i lau Afioga i le Minisita,

ia toa lona loto ma faaauau pea mea nei o nonogatupe. E leai lava se mea e tatou te tua i ai, o lea foi e vaai atu e deficit le tatou Tala o le Tupe.

O le a la le faamoemoe? O lea foi e vaai atu ua sau grants. O leua alu uma i le faaaogaina o tatou tupe totogi. O la ua faaopoopo i a tatou tupe maua. Ia ae lea e deficit le mea. Ia ao lau tuualalo, aua e te fefe e fai ia nonogatupe. O nonogatupe ia na fai mulimuli a le HRPP, 2016/2017, lea na fai ai le tatou malaevaalele, tatou falemai, Ofisa o Faamasinoga, ia ma isi galuega tetele. Ae o lau tuualalo ma lau fautuaga, aua e te fefe e fai mea ia o aitalafu. E pau lava le mea taua e te tagai i ai pe mafai ona o tatou totogiina.

O le mea lea e faatusa i le tatou GDP, e 11 % i le 12% e faaalu ai. Ae ou te leiloa la po o le a le... leaga o lea ua e saunoa mai e a foi nei, e tau taofiofi mea ia o aitalafu. Ae o aitalafu ia na o matou faia lea ua outou inherit ina, o mea na faalelei ai ia lo tatou atunuu. O le tele o atinae tetele na faatupe i nei tupe, aua na o matou vaavaai atu foi, e le lava ia tatou grants ia na aumai e fai ai ia galuega tetele ia. E faamoemoe tatou i nonogatupe, e pau le mea e taua lau Afioga, ia mafai ona totogi ia le aitalafu.

A fua la i le 11% lea e fua i ai, e na o le 11 sene mai i le tala e tasi mai i le tatou tupe maua i le tatou tupe maua masani. O le tuualalo i lau Afioga ae aua e te palaai e fai loan, ma le faaaloalo lava.

**Afioga Fuaava Suluimalo Amataga:** Lau Afioga i le Fofoga Fetalai...

**FOFOGA FETALAI:** Mo le faasaoina o lou taimi, o lea se i faasolosolo atu nai... leaga o lea sa lauga uma lava i le tatou Tala o le Tupe, onosai mai lau Afioga i le Minisita. Tulai mai le Afioga i le sui usufono mai i Aleipata Itupa i Luga.

**Afioga Fuaava Suluimalo Amataga:** Faafetai i le Afioga i le Nofoa mo le avanoa, ia ona o lea ua taua mai lenei itumalo e tusa ai foi ma se manatu vaivai, e tau ia faapea o se manatu faatauva. Ao faafofoga mai ia lou itumalo, atonu e tau faamanino e faamalamalama le agaga o le faaupuga sa fai, e pei lava o aiga foi ia e leai lava se tupe e maua, e le mafai foi ona fai se loan e le aiga i le Bank. Ia e maua loa nai seleni ona mafai ona loan le \$10 ae a mafai ona totogi seia oo lava i luga o le \$100. Ia se i oo lava i luga o le taimi lenei ua oo i luga i le fia afe la ua i ai loan.

O le tulaga foi lea o le agaga o le taumafai atu, o le uiga o le faamatalaga e pei foi la ua agai le faamuamua agai i le Social Sector, ae pei ua tau faataatia ia le Economic Sector. O lea foi sa lauga nisi o sui usufono o le matou vaega, e pei e tau faauouo mea nei e lua. O lea foi e i ai le faaupuga sa saunoa nisi o sui usufono, o le wealth, means health. Pei se mea foi lea faapena. E le mafai ona tutoatasi e tulei na o le Social Sector, ia ae o atu

faatasi ma le Economic Sector foi lea, e fua la lea i fesoasoani o lo o ave i le tulaga lea, ina maua ni returns i tulaga ia i mea tau investments ma faapena i le Economic Sector, e maua ai foi seleni e fesoasoani i a tatou Social Sector.

Ia o le uiga lena o le tau faamaninoina o le tulaga lea e toatasi ae taatia le isi Sector faamolemole, faafetai.

**FOFOGA FETALAI:** Ia malo faafetai, ia ou te vaai atu e pei ua malilie...

**Afioga Leaana Ronnie Posini:** Lau Afioga i le Fofoga Fetalai...

**FOFOGA FETALAI:** Ia tulai mai lau Afioga Leaana..

**Afioga Leaana Ronnie Posini:** Faafetai tele i lau Afioga i le Minisita, i le folasaga malamalama foi. Masalo e pei o lea ou te maua atu e te le i...

**FOFOGA FETALAI:** O se mea e fia faamalamalama pe o se mea e fia faasao?

**Afioga Leaana Ronnie Posini:** O le mea e fia faamalamalama, ona e le o afea e lau Afioga i le Minisita lea sa ou taua i ai lea e matau o lea o le a tau faatumaoti ia vaegatupe e ave Ofisa o le Faamasinoga ma le Ofisa o le Fono. E pei o lea na ou fesili i ai pe o a ni mafuaaga tataua ua ala ai ona eseese ia vaegatupe ia, ia pe o le a le mafuaaga? Ma le agaga faaaloalo.

**Afioga Sulamanaia Fetaiai Tauilili Tuivasa:** Lau Afioga i le Fofoga Fetalai e fia maua se avanoa...Ioe e fia faamalamalama lau Afioga i le Fofoga Fetalai.

Ou te faafetai i le Afioga i le Minisita, e le faigofie ia lau matafaioi o i ai. Ae o le faafesili ona sa ou lauga ai, o lea ua e tautino manino i le aofaiga o pisinisi lea o le a ave i ai tulaga faapena, na aumai faamaumauga mai i le Ofisa o le Leipa.

O le popolega lea e i ai lou sui usufono o le Matagaluega o Tupe Maua o lo o i ai uma o lo o resitala ai pisinisi uma i totonu o si o tatou atunuu. Ia ae e pei o le popolega ina ne i aumai le lisi lea mai i le Ofisa o le Leipa, manatua foi o le Leipa e resitala ai na o mea ia o Kamupani.

Lua foi lea e taua i le faamama avega ia mo mea o Turisi, ia o lea foi e te tautino e aumai ia faamaumauga le aofaiga o Turisi i o le Matagaluega o Turisi. Ae sa ou faapea o le Matagaluega o Tupe Maua ma Tiute, e aumai uma o i ina e resitala uma ai mea tau pisinisi lapopoa, pisinisi laiti, pisinisi feoloolo.

Ia pei o sina o le uiga o lau faamatalaga ne i te i ua misi ai nai isi pisinisi na e le o maua mai i le Ofisa o le Leipa, ia ma le Ofisa o le Turisi, ia ae agai sao lava i le Matagaluega o Tupe Maua ma Lafoga o le latou matafaioi lena o le resitalaina uma o pisinisi. Ma lou faaaloalo lava.

**Afioga Peseta Vaifou Tevagaena:** Lau Afioga i le Fofoga Fetalai...

**FOFOGA FETALAI:** Faafetai, malo le... ia tulai mai ia le sui usufono o Faasaleleaga Nu.5. lea na muamua tulai mai. Ia se mea e fia faasao pe se mea e fia faamalamalama?

**Afioga Peseta Vaifou Tevagaena:** O le mea e fia faamalamalama toe fia faasao lau Afioga i le Fofoga Fetalai.

**FOFOGA FETALAI:** Ia se i fai pe moni, ia saunoa mai.

**Afioga Peseta Vaifou Tevagaena:** Ne i mea ua pau i le Afioga i le Minisita ia lau lauga ananafi ona sa mamafa lava lou tuuina atu o le tupe lea. Faafetai mo le Tala o le Tupe, aua o lea ua ou tilotilo atu i le Tala o le Tupe ia e le tele aua e le tele ni masina o le Tala o le Tupe lea ua faataatia. O lona uiga, e le tele tele foi se tupe o lea e sau ai i totonu o le Tala o le Tupe.

E pau lava lea o le mea ou te manao e faasao mai pea e lau Afioga i le Minisita, e faigata leaga o lea e faafofoga mai ia le atunuu ma lou itumalo. O le sao tonu la o le tupe lea sa folafola e outou o le \$1 miliona o le poloketi? Ae e le o le \$1 miliona foi lea e tufa?

Lua penisione, o le sao tonu o le penisione lea sa folafola e le \$300 ae \$200 le penisione e maua i le masina? Leaga o le \$200 le penisione lea sa folafola e le Vaega Faaupufai lenei. Ia e pau lava lea lau Afioga i le Fofoga Fetalai.

**FOFOGA FETALAI:** Faafetai, ia lea ua manino, lea ua malamalama. Ia tulai mai ia le sui usufono o Faleata Nu.3.

**Tofa Lealailepule Rimoni Aiafi:** Faafetai lava i lau Afioga...

**FOFOGA FETALAI:** O se mea e fia faasao po o se mea e fia faamalamalama?

**Tofa Lealailepule Rimoni Aiafi:** O le mea e fia faamalamalama, ae uma ae ua faasao lau Afioga.

**FOFOGA FETALAI:** Ia se i sau la pe moni lau...

**Tofa Lealailepule Rimoni Aiafi:** Faafetai, e malie lau Afioga e pau lava pe moni lau Afioga na e saunoa mai o le Tala a le Tupe a le Vaega lea? Ia lau Afioga o le Tala a le Tupe a lo tatou Malo.

**FOFOGA FETALAI:** Ia e sao ae ma tapena e le vaega le la.

**Tofa Lealailepule Rimoni Aiafi:** Ia ae faafetai i lau Afioga. O le mea lea sa faamamafa i ai lau talanoa lau Afioga i le Minisita, faafetai mo lau... lea na tau saunoa ai le Afioga ia Tapunuu, o le tatou faamaumauga o le tatou aitalafu, e le i oo i le 50%. O lea lava e i lalo o le 48%, o lona uiga o lea e i ai le avanoa mo atinae.

O le mea lea ou te alofa ai i lau Afioga, lea ua e saunoa i le vaalele, ae o lea foi ua folafola mai e taofi ia le uafu, taofi le maketi, taofi ia fogafale lea na fuafua e fai, ou te le iloa la i lau Afioga, aua o lea ua tele ia le Capital Investment lea ua taofi, Infrastructure. E le iloa la pe faafefea ona fesoasoani i lau Tala o le Tupe ia ma galuega ma tulaga uma faapena.

Sa ou faapea e te finauina i le vaega lea aua o mea ia e fesoasoani ia te oe. Ae o mea ia i le tatou aitalafu lau Afioga, e le i taitai ona oo i le mea e tataua ona i ai. Ia ma le isi mea o na e silafia, o taimi nei i atunuu uma lava o le lalolagi e tataua ona aitalafu. E fesoasoani i le tamaoaiga o lea e tele ia le faaletonu lea e i ai.

O lea e tuu mai o fuainumera lea e aumai e lau Afioga i le pepa lea, o Physical Strategy Changes, e oo atu i le tausaga lea ua pau i lalo i le \$900,000 ia le tatou aitalafu. O lona uiga la o lea e faasolosolo i lalo, ua pau mai i lalo i le 41%, 42% GDP. Ia o nai vaega na ne i te i ua faapea ou te le fia... e pau lava le mea lea ou te le fiafia i ai lau Afioga, o le faapea mai, ua tapuni le faitotoa. Ua pei foi lea ua oo mai ua le toe mafai ona fai se galuega ona o aitalafu ia na fai e matou.

Ae lau Afioga, e leai, toetiiti lava 7 tausaga leai ni loan na faia e le Malo no borrowing policy lea e i ai, ae e alu lava ia le Malo e le mafai ona taofia. Ia ma le faaaloalo lava.

**FOFOGA FETALAI:** Ia faafetai, ia ou te iloa la e...

**Afioga Hon Loau Solamalemalo Keneti Sio:** Lau Afioga...

**FOFOGA FETALAI:** Ia tulai maia ia lau Afioga i le Toetaufanua a Malietoa, ia saunoa mai.

**Afioga Hon Loau Solamalemalo Keneti Sio:** Ia e laitiiti lava se mea ou te tulai atu ai. O le mea e fia faasao. Ou te matau atu i le saunoaga a le

Minisita, o faapea mai, ua alu i tua ia aoaoga. Ia manino lelei leaga o la e faafofoga ia lo tatou atunuu.

O le tala ua alu i tua ia tupe o le tatou aoaoga, ae o la e alu i luma ia aoaoga. Leaga o la e le i saunoa le Minisita, ina ne i te i ua sese lona finagalo, ma le agaga faaaloalo.

**FOFOGA FETALAI:** Malo, faafetai, o lea ua manino le...

**Tofa Mauu Siaosi Puepuemai:** Lau Afioga i le Fofoga Fetalai...

**FOFOGA FETALAI:** Ia, tulai mai ia le sui usufono o le Vaa o Fonoti. O le mea e faasao po o le mea e fia faamalamalama?

**Tofa Mauu Siaosi Puepuemai:** Ia o mea uma ia e 2 lau Afioga.

**FOFOGA FETALAI:** Ia, e tasi le minute.

**Tofa Mauu Siaosi Puepuemai:** Ia ona o la sa taua e lau lauga ia le \$250,000, o lea e faamoemoe le Malo e ave i se Komiti foi lea e toe tauiloilo ai ia le tapenaga o taligalu ia ona suesuega. Ia ae o lea e i ai le manatu maualuga o leni sui usufono, e talitonu lava o la e i totonu o Matagaluega e pei o le LTA, ia ma isi Matagaluega na, ia le tomai faapitoa, e latou te faia ia suesuega ia, aua o le upu moni e le natia, o lea lava e faagasolo ia tatou galuega. Ia ae o le faasaoina o lea seleni, ia ma le toe faamaumau, ne i te i ua pau e le Afioga i le Minisita, ae aumai ia le \$250,000 lea, ia e fai ai se isi vaega o le taligalu o le Vaa o Fonoti ia, ma le agaga faaaloalo.

**Tofa Ale Vena Ale:** Lau Afioga i le Fofoga Fetalai...

**FOFOGA FETALAI:** Ia malo, tulai mai le sui usufono o Faleata Nu.4.

**Tofa Ale Vena Ale:** Lau Afioga i le Fofoga Fetalai, faafetai mo le avanoa. Ua ou tulai atu ma le faaaloalo tele, o le mea e fia faamalamalama. O lea ua pau i lau Afioga i le Minisita o Tupe, masalo e na o au lava le tagata na matua fesili atu lava i lau Afioga se i e aumai se faamalamalama, aemaise lava e uiga tutusa ma mataupu ma le sui usufono o Faasaleleaga Nu.5 le Afioga ia Peseta. Ia atonu o le a e tali mai ai.

Ae ua ou tulai atu, leaga o lea sa afea e le Roadshow a le FAST ia le itumalo leni o Faleata Nu.4. Ua ou tulai atu la e fesiligia lau Afioga aua o lea e faamaumau e le tatou vaega... ia le \$1 miliona lea e... e foliga mai la,

o le a ou le talanoa i isi itumalo e 50 ae o le itumalo lava lenei lea sa outou afifio atu foi ma fai ia le tou faalauiloa lau afioga.

**FOFOGA FETALAI:** O lea ua maua o le \$1 miliona lea e te fia malamalama ai.

**Tofa Ale Vena Ale:** E pei la e atagia mai, ua... o le a nofo aitalafu la e le gata i le aitalafu i folafolaga, ae o le a aitalafu la le isi \$800,000 ae o lea ua uma ona faataotooto ia fuafuaga i le \$1 miliona. Ia lau Afioga faafetai.

**FOFOGA FETALAI:** Ia malo, faafetai. Ia tulai mai ia le sui usufono o Falelatai ma Samatau. O se mea e faasao po o se mea e fia faamalamalama?

**Afioga Lupematasila Galumalemana Tologata Togia Tile Leia:** Faafetai mo le avanoa, ia o le mea e fia faamalamalama.

**FOFOGA FETALAI:** Ia se i saunoa. Te i fo i ua e toe pai i le \$1 miliona lea ua uma ona i ai isi sui usufono ia.

**Afioga Lupematasila Galumalemana Tologata Togia Tile Leia:** Faafetai i lau Afioga i le Minisita i le tali manino i fesili sa tuuina atu. Ae e pau lava ia si vaega e fia faamalamalama atili, ia o le saunoaga a lau Afioga ua tau mole si tatou mea i le tele o aitalafu.

Ae mo le silafia, 7 tausaga talu ai, e le i toe faia e le Malo ni aitalafu. Ae o le tele o poloketi tetele ia sa mafai ona faatino, sa faatino i grants, o tupe sa faameaalofa mai i fafo. O fea e sau ai tupe ia? E sau i le lelei ona faatino o galuega a le Malo.

Ou te tautino atu leaga o au lea sa vaai le poloketi lea o le Power Sector Expansion e \$100 miliona Amerika. O le lelei ona faatino o le poloketi lena, na mafai ai ona toe offer mai e le Faletupe o le Atinae o Asia le isi \$100 miliona le isi poloketi tele lea o le faatanoa i Alaoa.

O le mea lea o lau fautuaga ma le fesoasoani e avatu... [.....] o latou la e i ai le tomai ma le agavaa e fesoasoani tele i le Malo, e toe aumai ai nisi grant e faatino ai ia tatou poloketi. Ia faafetai.

**FOFOGA FETALAI:** Ia, ou te fesoasoani atu i le sui usufono, ia aveese au upu ia faapea ua tutuli ia tagata faigaluega. Aveese upu ia ma faamauga a le Fono. Aua le toe saunoa se sui usufono i upu ia e leai se mea o tupu.

Upu na faatonuina e le Fofoga Fetalai e aveese mai faamaumauga o le saunoaga a le sui usufono mo Falelatai ma Samatau: [*“Aua le tutuliina tagata faigaluega.”*]

**FOFOGA FETALAI:** Ia, tulai mai lau Afioga i le sui usufono mai i Satupaitea.

**Afioga Hon Lautafi Fio Selafi Purcell:** O le mea e fia faamalamalama ma fia faasao.

**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Ia onosai mai lava ia le sui usufono o Satupaitea se i tulai mai le Afioga i le Minisita po o se mea e fia faamalamalama

**Tofa Hon Olo Fiti Afoa Vaai:** Se ou te nofonofo lava ma ou faalogologo ma ou faanoanoa. E pei se Fono a tamaiti. O le mea foi e fai ma tau fai ma le ava. Ae fesiligia fai mai o mea e faasao ma fia faamalamalama. Aua le faataalogaivai le tatou Fono.

O le mea na e faufautua atu. O le mea o le taavale masau e masau sau lava te i ua lavea.

**FOFOGA FETALAI:** Ia...

**Afioga Fepuleai Faasavalu Faimata:** Lau Afioga i le Fofoga Fetalai...

**Afioga Hon Loau Solamalemalo Keneti Sio:** Lau Afioga i le Fofoga Fetalai, e le taugamalie ia le saunoaga a le Afioga i le Minisita a le Minisita. Ou te le iloa po o ai lea e agai i ai ia lana ote. E le o matou o sau fanau, fuafua lelei le faiga o faamatalaga.

**FOFOGA FETALAI:** Ia faamalie atu i le sui usufono. Ia onosai mai le sui usufono ua see ia lo tatou sa. Ia tulai mai le sui usufono o Satupaitea. Onosai mai ia le sui usufono o Salega leaga o lea ua tulai mai le sui usufono o Satupaitea sa muamua.

Ia o se mea e fia faamalamalama po o se mea e fia faasao. O tatou o sui usufono matutua, ia tau faamatutua mai ia tatou...

**Afioga Hon Lautafi Fio Selafi Purcell:** Ia o le mea e fia faamalamalama. Ua ou malamalama i saunoaga i Afioga i Minisita ia e toalua o Galuega ma Minisita o Vaalele.

Ao le saunoaga a le Minisita o Tupe lea ua toe confuse ai ia lou mafaufau. O lea la... leitioa a tuai ona aumai le vaalele, leaga o lea e... e na ona ou



fia iloa lava, pe aua e le mafai ona o tatou trade ina ni vaalele e le o se tatou vaalele. O le vaalele a le Kamupani i o i Europa. Ua tele foi a tatou tupe ua alu, e taunuu mai le vaalele i i Brisbane. Ae o lea ua ou faalogo atu, e ese foi le isi angle lea o le a tau fai e trade in te i ua o tatou falepuipui uma ai. Ma le faaaloalo.

**FOFOGA FETALAI:** Ia o le a ua maua i Minisita ia o Leatinuu ma Olo e talanoa pea ia le mataupu. Ia atonu o la e faailoa manino mai e le Minisita o Tupe, ia le mea o lo o sau ai le seleni. Ia ae o lo o faatalanoa pea le mataupu i le agai i luma i le faamoemoe. Ae la ua uma ona saunoa le Minisita o Vaalele.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai....

**FOFOGA FETALAI:** Ia tulai mai lau Afioga i le Taitai o le Itu Agai, pe o se mea e fia faasao po o se mea e fia faamalamalama...

**Susuga Hon Tuilaepa Fatialofa Auelua Sailele Malielegaoi:** E alu uma lava mea e lua. Ae o lea ou te tulai atu lau Afioga i le Fofoga Fetalai, o mea muamua e agai uma atu ia matou fesili i lau Afioga. Ae se i onosai mai ia Minisita, o le galuega faa-agai, o lea se i maua se avanoa foi e faatopetope atu ia nai fesili ia, mo le tulaga fia malamalama.

Ao lou tulai atu lau Afioga i le Minisita, lau Afioga i le Fofoga Fetalai, lau Afioga i le Minisita o Tupe, lea na avatu ia lau faamalo i le tatou Fonotaga a lo tatou Matagaluega, sao. O lea foi la ua ou toe tulai atu, e momoli atu ia lau faamalo. E le faigofie ia le galuega o feagai ma lau Afioga. Ma ia maua pea le onosai aemaise o taimi lea e agai atu tatou i le tele o nei faamai feagai ma tatou. Ae lea foi e tatou te agai atu e tatou te le ma iloa le faaiuga o lenei tausaga. Tatalo i le Atua ina ia aua ne i afatia i tatou.

E 18 tausaga sa ou Minisita o Tupe. Ma e le faigofie nei mea e taumafai e faafeagai ma mataupu e tau fofu ai faafitauli o le atunuu. Feagai ma Tsunami, feagai ma afa, ma e le faigofie. Ia ia te oe le lototele. Ia ia te oe foi le loto onosai, ma ia sagai ane ai o le tai. Ia avatu e le Atua ia te oe mafauauga, le tofa, a o feagai ai ma faafatiamai, i le tele o faigata e ono faafeagai ma i tatou. A fesili atu foi Minisita o lenei itu e fia malamalama, ia ia te oe le onosai. E faapena foi ma le Kapeneta.

Ae o au toe faamanuiaga, ia sagai ane ai o le tai. Ia maua lau tofa, ma ia avatu le Atua ia te oe le mafauauga lelei, ina ia faaosofia pea moealuaga aua le faafeagai ai ma faafitauli e feagai ma le tatou atunuu. O ou mama na.

**FOFOGA FETALAI:** Saunoa maia lau Afioga i le Minisita, e faauma mai lau saunoaga. O lea ua faamanuia atu le tama o lea Itu o le Maota. Ua leva foi lona soifua i le Minisita o Tupe, o lena ua ia te oe faamanuiaga, ae faauma mai loa le lauga mulimuli lena o lau Matagaluega o lea ua e tali.

**Susuga Hon MULIPOLA ANAROSA ALE MOLIOO:** Lau afioga i le Fofoga Fetalai, o lea lava sa ou tapena e taliuma fesili ia, aepeitai ane ona o lea ua faamanuia mai le Taitai o le Itu Agai, o lea o le a ou le tali ai. Ae o lo o soifua pea le matai lea o taatia mai. A i ai foi se paganoa i tua, ia tatou talatalanoa ai, o lo o tele au tali ia e tuuina atu i le tele o fesili sa tuuia mai, ma le faaaloalo.

**FOFOGA FETALAI:** Malo lava, faafetai foi i le faapalepale o lo tatou Maota. O le Taitai foi o le Itu Agai, o le tama matua ua leva ona tautua i le Ofisa o Tupe ma le Matagaluega o tupe. O le mea lea, amuia oe o lea ua faamanuia atu le Taitai o le Itu Agai ia te oe lau Afioga i le Minisita o Tupe, aua laia e te masalosalo i faamanuiaga.

O le mea lea, malo faafetai o lea ua faafofoga le Maota, o lea foi ua faamanuia atu le aumatutua ia te oe. Ia o ou mama na. O le taimi lenei, o le tuu atu i le Afioga i le Minisita o Tina ma Tamaitai ma Agafesootai, e tulai mai. Aua foil au talifuaitau aua foi sui mamalu o le Palemene na laga ni mataupu i lau Matagaluega.

Ma le agaga faaaloalo lau Afioga i le Minisita.

**Afioga Hon LEOTA LAKI LAMOSITELE (Minisita o Tina ma Tamaitai, Atinae o Nu'u ma Afioga ma Agafesootai):** Faamalo faafetai i lau Afioga i le Fofoga Fetalai, mo le avanoa.

O lea mea muamua lava e fia sii atu le viiga ma le faafetai i le Atua i lenei afiafi, ona o Lona faatasi mai ia i tatou ma o lo o faasolosolo lelei faasologa o tatou galuega e pei ona tofia ai i tatou.

Ou te talitonu foi ua vela le fala, ae o le a taumafai atu ai foi, e avatu foi se faamatalaga e tusa ai foi ma le tulaga sa aumai ai foi nisi o mataupu e auala mai i lenei foi Matagaluega.

Lau Afioga i le Fofoga Fetalai, faapea lau Afioga i le Palemia, o le sui Palemia, le mamalu o Minisita o le Kapeneta, faapea foi Minisita Lagolago.

Liliu ane i lea Itu o le Malu, lau Afioga i le Taitai o le Itu Agai, faapea foi lau fetalaiiga Lauofo o le sui Taitai, ma le mamalu o sui usufono o le la Itu o le tatou Maota nei, malo le soifua.

E faatalofa atu foi i le Ofisa o le Fono, i latou o lo o...lau susuga i le o lo o vaaia le Ofisa o le Fono, mamalu o le aufaigaluega. Ae o lo o alalatai le paia ma le mamalu o alii ma tamaitai o lo o faauluulu i ai Matagaluega a le Malo, faapea foi Faalapotopotoga tumaoti. Malo le soifua.

Ou te talitonu o lea o le a taumafai atu se faamatalaga e faatatau foi agai i mataupu o lo o faapea ona lafo mai ai le avega foi i si a matou Matagaluega.

E faatalofa atu i le vaega o le Matagaluega o Tina ma Tamaitai lea o lo o matou faatasi i lea afiafi. Ia faapea foi le Ofisa sili o Fuainumera Faamauina, le afioga ia Aliimuamua, ma lana aufaigaluega, o lo o faatasi mai, tapuai mai le tatou lauga o lenei afiafi.

O le Vaega muamua, o le vaega lea i le \$1miliona. Ou te talitonu o lea ua uma ona avatu le tali e le Minisita o Tupe ma o le a ou le toe oo i ai. Ou te talitonu o lenei ua matua manino lelei ia le folasaga. A o sina au faapoopo laititi lava. Atonu e tasi lea tatou atinae, o lea sa amatamea mai le Matagaluega a le Malo, e auala lea i le tapenaina o fuafuaga mamao o atinae. O lea sa alo atu i ai le Matagaluega i le vaitaimi lea...e foliga mai na faamaea le galuega lea o le tapenaga fuafuaga mamao ia mo atinae o itumalo, i le tausaga e 2016/2017. O le maea lea o le galuega lea, e le i toe faaaaua, ona teu loa lea o fuafuaga ia. A o fuafuaga mo le lima tausaga. O lea ua uma lelei le lima tausaga i le tausaga lenei, ae le i faaaogaina ia fuafuaga mamao ia.

E ala ona ou fia paia le mataupu lea, ona o fuafuaga mamao ia, o lea e fuafua e faaoga lea e tatou komiti o itumalo, mo latou fuafuaga i le faaaogaina o le \$ miliona lea o lo o tatou tilotilo agai i ai.

O lea sa taua foi e se tasi o sui ma Vaimauga, po o le a le mea ua le faaoga ai ia fuafuaga ia. Ia manuia, le finagalo, e tusa la o lea o le a toe faaoga. Ae pau lava le faalavelave, e tusa ua uma le aoga o fuafuaga na sa i ai i totonu. Aua ua uma le 5 tausaga lea na tuu e faatino ai le galuega lea. O le tuualalo la, o lea o le a tatou toe o e toe iloilo ia fuafuaga ia, ina ia mafai ai ona outou toe silasila i totonu o fuafuaga sa outou tapenaina, po o i ai lava ni vaega o i ai, o talafeagai ma outou itumalo. O lo o i ai i le ofisa ia lipoti uma o fuafuaga ia, mo nisi o outou e finagalo e fia silasila i ai, ona faafesootai lea o le matou Ofisa, ina ia mafai ona maua atu ai ia fuafuaga ia.

O le taiala lenei ia outou e mafai ai ona outou faapea. O le faaaogaina la lea o tatou tupe lea. E pei ona faamatala atu e le Minisita, o lea e faatulaga le auivi mo le faatinoga o le galuega, e auala atu i le Project Management Unit, PMU.

O lona uiga e i ai le taimi, e fai ai a tatou faatalatalanoaga, ina ia faasolo atu foi i tua i itumalo, ina ia ao manogi mai e aumai o latou sao, po o a tonu ia ni vaega tetele e mafai ona latou tilotilo iai. E faatino ai le faagaioiga o le latou seleni lea. E pei ona logo atu e le tamaitai Minisita, o le miliona e faatoa maua i le tausaga fou, le tausaga lea 2022/2023.

Ia manuia lelei, a na faapea matou te malo mai i Aperila, e mua la. Ae vaai foi, o le tosomaiga lea ua toso mai, ua uma le afa o le tausaga. E le mafai la ona avatu le miliona, ae uma ifo le tausaga ae le mafai ona outou

faaogaina. Aua e le faapea e na ona tuu atu lava ia oe, e alu loa tufa le vaega lea. E leai...

O lea ua uma ona faamatala atu aiaiga e tataua ona faatino ai. O le mea la lona, e tai pei uma o atinae a le Malo ua outou masani ai, e faatulaga lelei le auivi, ina ia mafai ai ona puipuia lelei le tupe lea, ona faatoa amata loa lea ona avatu.

E le gata i lona, o nisi o outou e fai le tapenaga, ina ia filifili faalelei outou komiti o le a i ai i totonu, o le komiti lea o le itumalo. O nisi o i latou e lava le tomai ma le silafia i mea tau atinae. E pau lava le fautuaga lea e avatu, ia faatau le sao o tamaitai i totonu o komiti ia. O le taiala lea o lo o tilotilo i ai, le tatou Malo, ia afa tamaitai, afa alii i totonu o komiti ia. Aua o lea ua maua atu nei i le vaavaai atu foi i el tapenaga.

O le tele ia o le sao o tamaitai i totonu o atinae ia e fuafua e fai. A faapea la, o se faataitaiga, a faapea e 10 le komiti lea o le a filifili, o lona uiga la, e 5 tamaitai 5 alii. Aua o le matau atu, e tataua ona taitai e le sui usufono le komiti lea. O lona uiga o le sui usufono lava o le taitaifono. A o vaega uma ia ua outou filifilia o sui mai nuu taitasi ia o lo o fau ai outou itumalo.

E i ai itumalo e tetele, e i ai itumalo e laiti, o lona uiga a tele lau komiti o le a tele foi le tupe e alu ai. Aua e tataua ona totogi ni alauni o tagata ia, e pei lava ni tagata faigaluega. O lona uiga, o lea o le a maua ai le tupe a tagata ia i totonu o itumalo. A faapea la e toasefulu tagata i totonu o le komiti, ae 51 komiti, ia itumalo. E 510 ia avanoa faigaluega ia ua maua i totonu o komiti ia. Aua e totogi lava le alauni masani i masina. E le taulia ai pulenuu, o pulenuu lava latou ia, o latou galuega lava ia o lea laa fia.

O isi tapenaga e tilotilo i ai, e tataua ona i ai se ofisa autu o itumalo e ave uma ai i ina galuega e faagaioi mai ai i totonu i ina. E matau atu i ai, pe 2 pe 3 ni tagata faigaluega ai, aua o latou na e lagolagoina galuega a le komiti ma mea faapena. A faapea foi la e toatolu 3 ae 50, ua 150 foi ia tagata faigaluega.

O le agaga lea e tau fai atu ai, o lea o le a tatou taumafai e faaagavaa ia tagata o lo tatou itumalo, ina ia mafai ona latou tilotilo totoa, po o a ituaiga atinae o lo o i totonu o le itumalo. E mafai ona fai i le vaegatupe lea ua avatu. Aua e miliona lava i le tausaga.

E pau lava lenei o le tausaga ua le miliona ai, ona o tulaga ia ua uma ona faamatala atu. Ae o le \$200,000 lea e avatu, lea o le a tapena ai mea ia. Ia faatu le ofisa, tofi tagata faigaluega ia tumau, pe toatolu, ma vaai se mea e fai ai. Ia faatau atu kesi ma mea faapena, ina ia mafai ai ona faatu le ofisa. Ona tofi loa lea o lau komiti. E manatua la, e emo loa Oketopa, e tusa o la ua i ai le seleni i totonu o le Matagaluega o tupe. A o lau tapenaga lea e taumafai e fai, pe oo atu ia Aperila i le tausaga fou, ua tataua ona sauni uma loa ia komiti i le taimi lona. O se faataitaiga lona o le mea lea e faataatia atu ai le alafua e alu agai i ai le tatou atinae lea. E le se mea ula le mea, seivagana ua e le manao ai. A e le manao ai, ona e logoa mai lea o au, ina

ia mafai ai ona faasoa le \$200,000 lea i se isi itumalo, pe a faapea o lo o manaomia. O le faataitaiga, afai ae te i ua uma uma ona sauni uma mea, ae la pe totoa ai sina... pe \$40,000, e i ai lava nai tamai poloketi laiti e mafai ona tilotilo i ai le komiti a ia faauma i ai le tupe lea a o le i uma le tausaga lenei. Faataitaiga pei se study centre, aua o mea ia o lea tatou te agai i ai. O le mea lea o le faatau o se pasi, aua o le tele ia o le pasi a lo tatou Malo la e tutu. A faapea la o le pasi mai le itumalo o Vaa o Fonoti e aumai ai tamaiti aoga mai Anoamaa. E pei o se faataitaiga lena.

O poloketi o la e te iloa e mafai ona faatupe mo le lelei lautele o totonu o tagata o le itumalo. E oo foi i playgrounds mo tamaiti o Primary school, aua o le tele lava e tasi lava le malae e taaalo uma ai le Year 1 e tau i le Year 8. Ae le iloa pe tataua ona avatu ni mea e faamasani ai tamaiti e taaalo.

E tusa o le uiga o lau tala, mafaufau lelei po o a ituaiga atinae e fai i seleni ia ua totoa, atonu foi e faataitai ai i ina la outou tilotilo i le miliona lea o le a oo atu. Ae le i oo atu foi la le miliona, a ua uma ona fai a outou fuafuaga, aua o a outou fuafuaga na e aumai i i, i le ofisa o le matou Matagaluega e mafai ai foi ona tatou galulue faatasi ai lea i le faasoasoina atu.

Ou te iloa e le matua tele tele ni tulafono, e pau lava le mea ia, o le autu atoa o le mea lea, o le faamaoni. O le faamaoni o le itumalo i le faatinoga o galuega ia. A o le agaga o le tatou mataupu ina ia generate ia ni tupe maua mai totonu o le itumalo. A o le o lena foi, o le mea lea e tau faapapalagi o le common good. O le a se mea lelei e fesoasoani i totonu o lo outou itumalo, e tasi lena mea e aoga i ai.

O le tele ia o le mau atinae e mafai ona maua mai i le tatou atinae lea, ae o le a faasolosolo atu lava le faiga o tatou faatalatalanoaga, e pei foi ona i ai le tatou Ofisa lea o le PMU lea o le a nafa ma le faufautua, ina ia mafai ai ona faaoga e itumalo le vaegatupe lea mo a latou atinae.

O isi mea, o isi mea e mafai ona tilotilo i ai itumalo, e avatu e faasafua atu i tua latou te faia galuega ia. E pei o le moaina o vao a le itumalo. E moa lava e le nuu ia a latou vao ona avatu lea o le tupe, ia e masani ona moa ai vao ma le tou nuu. O lona uiga la, e faatau foi le moavao a le itumalo mai seleni ia e avatu i le tatou miliona lea.

Lona lua, e faalogologo atu i togalaau ia e fai, aua e \$ miliona, aua e tofu lava le nuu ma le... e tufa ia laau i nuu ona toto laia.

**Susuga Hon Tuilaepa Fatialofa Auelua Sailele Malielegaoui:** Lau Afioga i le Fofoga Fetalai, e a pe a se i slow down, se i tau faalemu mai. O penitala, e tusi ai foi ma penitala. O penitala, o note book, o kesi, e lavea ai foi ma mea e fau ai ofisa? E lavea uma ai lava a? Ae faapefea le fanua e fau ai?

**Afioga Hon LEOTA LAKI LAMOSITELE:** O mea uma lava na.

**FOFOGA FETALAI:** O lea ua fautua atu, ia faa-slow laititi, ia manino lelei. E aoga foi le fautuaga. Pe se mea faaopoopo i o, leaga o lea ua uma ona fai le tatou tala i mea ia.

**Afioga Hon Valasi Luapitofanua Toogamaga Tafito Selesele:** O lea ou te au i le fautua a le Taitai o le ITu Agai. Ona talu lava ona fai le saunoaga a le Minisita, ua matua ofo lava Peseta. Ua na o le ata ma soisoi. Ia faalogo lelei alii, faafofoga mai Loau ma...e le o se mea ula le mea lea.

**Susuga Hon Tuilaepa Fatialofa Auelua Sailele Malielegaoi:** O lea e pisi matou e tusingisi, ae leai lava ni mea a le aualii la e tusingisia.

**FOFOGA FETALAI:** Faaauau mai ma faifaimalie lau saunoaga, ia manino lelei le faaaogina o le miliona lea.

**Afioga Hon LEOTA LAKI LAMOSITELE:** Lau Afioga i le Fofoga Fetalai, e leai ni mea o tusingisia e le vaega lea, ua matua tauloto uma lava e le vaega lea ia mea ia e fai. O mea ua leva ona saunia e le tatou Vaega Faaupufai aua le aso leni. E pei foi o le faamamaina o le falemai. E mafai lava ona ave i itumalo ia e ona falemai, e o ifo latou e faamama, ia ave foi i ai le tupe i ina. E po o le kiliaina o laau a le EPC lea, e mafai foi ona fai e itumalo mea na. Vaavaai la outou i le tele o galuega lea e o atu i Apia fai, ae o la tatou te nonofo ma tilotilo i ai, a o la e mafai lava...O lona uiga e tele avanoa e maua e tagata faigaluega. E te le toe sau i Apia i se pasi, e tele lau tupe e sefe pe a faapea o la o le a e nofo i totonu o le itumalo e faigaluega ai. E maua lou avanoa tou te fiafia ai ma lou aiga. E te le toe alu atu ua po, aua e tasi lona mea e ala ai ona tupu le faalavelave.

E i ai vaega e tataua ona tilotilo i ai tatou itumalo. O le faaleleiaina o agavaa o tagata ia. Ina ia mafai ai ona latou faia faaleleia, faatinoa galuega e tataua ona i ai. E tasi lona polokalame, e i ai i totonu, e lagolago atu ai le tatou Matagaluea, o le faaleleia o agavaa o tagata uma ia i vaega eseese ia ua taua atu.

Ou te masalo, o se faamatalaga lea...

**Susuga Hon Tuilaepa Fatialofa Auelua Sailele Malielegaoi:** E faafesili atu lava, i le agavaa lea, o lona uiga e o atu foi nisi e fai ni aoaoga i tua, e fai ni training? Ma le fesili lona lua, po o silafia e le Minisita o Faatoaga mea na.

**Susuga Hon Laauli Leuatea Polataivao Fosi:** Have a break. E taamilo, taamilo, taamilo ae faaiu mai lava ia te au. O lea la ua tatou vaai i ai, ua alu le vaiaso leni o outou soisoi ma outou ula. You still don't get it. O lea la o

le a fai atu le upu a tamaiti, “ia wanty laia.” Ia o lena, it’s something new, decentralize. Toe ave le malosiaga i nuu i tua. Atonu o lena tou te ofo tou te le talitonu. A o le mea lena o lea e tupu. Faalogo lelei ia Leota, carry on...

**Afioga Hon Tapunuu Niko Lee Hang:** Lau Afioga i le Fofoga Fetalai, pe maua se avanoa.

**FOFOGA FETALAI:** Se i maea lelei mai, leaga ua mafua ona tulai mai le Minisita ona o lea ua taua e le Taitai o le Itu Agai. Ae se i maea lelei, ona tuu atu lea o le avanoa i lau Afioga.

**Afioga Peseta Vaifou Tevagaena:** Lau Afioga i le Fofoga Fetalai, leaga o lea na tau lou igoa. E momoli lava le faafetai i le afioga i le Minisita, o lea ua faamalieina lenei sui usufono. O le mea sili e leai ni miliona, e na o poloketi, faafetai tele lava a e lailoa.

**FOFOGA FETALAI:** Lau Afioga Tapunuu, saunoa mai

**Tofa Hon Tapunuu Niko Lee Hang:** E pau lava le mea ou te faafetai i le folasaga manino, malamalama. Ae i ai faasalalaua foi ia a le Digicel. A fai ni faatosina, sau ma le faaupuga lea, conditions apply. E leai se mea faapena, o lea ua talatala mai conditions, ae ua uma ona folafola le miliona e tusa taeao pe a pasia le Tala o le tupe.

O lau fesili lena. O la ua faafofoga mai itumalo, e na o le \$200,000 le mea lea, ae le avatua foi. E tapena ai isi mea ia ua e saunoa i ai. Faafetai o lea ua malamalama, faafofoga mai itumalo e leai se miliona e maua, e na o le \$200,000.

**Susuga Hon Laauli Leuatea Polataivao Fosi:** E leaga o au lava lenei sa ou tulai e folafola le miliona. Malie ia Papalii, e le i ai ma se upu e tufa, e faaagaga. O le upu lea o lea na talai. O lea foi na toe tulai mai Peseta fai mai o le penisione e \$300. Se o le talaiga lena a le Tautua Samoa lea na fai.

Malie foi Afualo i le tau o le suafa o lena itu o le aiga. E leai sa matou upu na tau ai le \$300 e tala faalua i le masina. E \$200 ma le \$100 for disability. A lea e malamalama. Se ae malilie ia.

**Susuga Hon Tuilaepa Fatialofa Auelua Sailele Malielegaoi:** O lea ua matou malilie lau afioga. O lea ua matou malilie, a o le faalavelave, o le a le mea ua tau ai fua le Tautua ae le o i inei se Tautua.

**Susuga Hon Laauli Leuatea Polataivao Fosi:** Ia ua lava ia lea, alo ia lau Afioga....

**FOFOGA FETALAI:** Faaauau le saunoaga a lau Afioga le Minisita.

**Tofa Hon Faimalotoa Kika Stowers Ah Kau:** Lau Afioga i le Fofoga Fetalai, sina minute lava se tasi. Faamolemole o la ta faafesili.

E faafetai atu lava i le Afioga i le Minisita i le tele o taimi na alu i le faatulagaga o le ... E pau lau fesili, o le \$200,000 lea o le a faaalu i le faiga o le atinae lea. E fia la se mea e allocate mai i le \$200,000 lea, o le mea ou te popole ai, ona la ua faafofoga mai itumalo e pei ona e saunoa. For an example, e 10 ni komiti, e 5 tamaitai...na ona ou oo atu lava i Savaii, o fusuaga mea, po o ai o le a i totonu o le komiti, aua o lea ua faalogologo mai, o lea o le a totogi komiti i le mea lea.

E i ai nai au fesili ia na...o le vaega o pulenuu ia na ta fesili ai, pe o aafia ai sui o tina, pe na o pulenuu lea o le a aafia ai? I te i ua fesili mai ma tuliloa mai ta ita, pe faapefea le itupa o tina.

**FOFOGA FETALAI:** Tulai mai lau Afioga i le Minisita.

**Tofa Hon Tapunuu Niko Lee Hang:** Lau Afioga o se mea e fia faasao i le saunoaga ia Laauli. O e manatua Laauli o au na faasaoa lau saunoaga, e te le i taua mai na tufa se tupe. A o lau saunoaga tonu lava lea ua e saunoa mai ai, e faasoasoina ma fuafuaina e le Faigamalo le faasoaina o le miliona. O le isi au fesili. O ai la e aumai ai le tupe? O matou o faipule, lea e aumai ai le \$200,000 lea? Aua ou te le iloa po o ai se tagata o lea e te saunoa mai i le faamaoni.

**FOFOGA FETALAI:** O la ua manino le saunoaga a le Minisita. E faamuamua lava outou faipule, o outou o faipule e taitai i itumalo. Aua le popole, o la lava e fai aiaiga o nei mea uma.

Saunoa mai le Minisita.

**Afioga Hon LEOTA LAKI LAMOSITELE:** Faafetai lau afioga i le Fofoga Fetalai. O lea ou te mulimulitai lava i lau tulafono foi lea, se i uma lau lauga ona faatoa tali lea o fesili. Faamalulu atu i le mamalu o le tatou Maota, tuu mai la le avanoa se i faauma lelei atu ai, ona tatou fesili mai laia. O lea la o le a tatou see atu i le isi mataupu na laga mai. O le fesoasoani lea e ave i fale komiti, e \$2.1 miliona. Sa i ai le finagalo faapea sa ave foi le isi vaega tupe i le vaitaimi lea na fai ai tatou campaign, lea na tufa ai le tai \$3,000 i le fale komiti. O le mea la lena e tau o le tufa. Aua e te mautinoa lava na tufa. Aua na ou vaai lava i ai na tufatufa e loomatutua i le fale komiti o le matou nuu ia tupe ia. A o le tupe lea e faaagaga mo fale komiti ia, o le tupe e taumafai e faatotoga lelei ai ia fale komiti.



O le vaai taulai a lo tatou Malo, e tasi lea fale e taumafai e pei se evacuation community centre. E agai i ai tamaitai ma nisi foi vaega o nuu, e fai agai i ai a latou polokalame. O le tele o fale komiti la e i tua, e le o lelei le faatotogaina o fale komiti.

**FOFOGA FETALAI:** Ua ou vaelupeina le saunoaga a lau afioga, talu ai ona o lea ua tatou taunuu i le tatou malologa, se i toe ae mai le tatou malologa ona faaauau lea o lau saunoaga. O lenei taimi ua tatou taunuu i le tatou malologa,

Ou te faasilasila atu, o le a faataatiaese Galuega a le Fono Aoaofaitulafono mo lana malologa e 15 minute.

*Na faataatiaese Taulumaga a le Fono Aoaofaitulafono mo lana malologa i le itula e 8:45 i le po ma toe faaauau i le itula e 9:12 i le po.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofaitulafono. Faamalo le onosai i le paia o le Palemene, atonu ua maua foi le malosi faaopoopo e toe faaauau ai le tatou galuega.

E faataatiaese taulumaga a le Fono Aoaofaitulafono, o lo o saunoa le Afioga i le Minisita mo Tina ma Tamaitai, Atinae o Nuu ma Afioga ma Agafesootai. Ia o le avanoa lenei mo le faaauauina o lau saunoaga lau Afioga i le Minisita.

**Afioga Hon LEOTA LAKI LAMOSITELE:** Faafetai i lau Afioga i le Fofoga Fetalai. Ia e pei ona ou talanoa atu analeila, o lea tatou te i fesoasoani ia e ave i mea o fale komiti. E pei ona ou taua foi, o nisi nei mea e taua tele i totonu o nuu faapena foi i totonu o itumalo, aua e pei e tapuvaetasi i ina auaunaga o polokalame a le Malo faapena foi ma polokalame ma auaunaga a nuu. O le vaaiga la i ai mo le lumanai, o le toe faaoga faalelei fale komiti ia ina ia mafai ai ona latou faatinoina ma le atoatoa tiute ma galuega e mafai ona fai ai. Ae o le taimi lenei, e le o tulaga lelei tele le vaega lea, ona o le utiuti lava o le seleni o lo o maua e tamaitai o lo o latou vaaia fale komiti. E manatu la le tatou Malo, e tatau ona faamalosi i ai ina ia mafai ai ona faatino nisi o latou polokalame ia. Ia o mea taua lava ia e le o i ai i totonu e tatau ona i ai, o se mea o pusavai foi lele e pei o panadol, o nai vaitale ma nai mea faapena. Aua o le tele o tatou nuu pe a faapea i le leva o le po, pei o i la e tau sulu atu i ai e tau sue mai ai sina fualaau po o se vai manava, po o... o mea foi nei e faatau mai luga o le counter e le tau prescribe ina, lea e teu ai la i totonu o vaega ia.

O le isi mea e tatau ona tatou o i ai aua o lea tatou te taumafai lava e tuutuu i lalo mea o le tatou soifua maloloina i mai ia o lo o tatou aafia ai, o

la e ou te vaai lava i ai o la e mafai lava ona fua e nisi o alo ma fanau le masini foi lea e fua ai le blood pressure, e faapena foi ma le masini fua suka. O mea na, aua o lea sa faataamilo foi le polokalame foi lele a le tatou soifua maloloina e taumafai ina ia faatino mea ia, e fai ma motumotu, a le o lena foi e le regular i le avatu uma, ona o nai faafitauli foi lava o lo o i ai i totonu o le auunaga. Ae mafai la ona fesoasoani i ai le nuu pe a faapea e fai ni aoaga lelei a tamaitai la e latou te leoina fale komiti, aua na o le pau lava le mea o lea sa matou faataitaia foi, pau lava le mea o le fai i ai i le vaega lea, 130 luga, 80 lalo. Na o le ova lava i luga ma mea ia, alu loa e vaai le fomai. Ia maua e latou le tomai lea e mafai ai ona latou faia le mea foi lele o le primary health care. I lena la auala, e le tau faatalitali i ai le tatou nuu se i omai le tamaitai tausisoifua po o le au fomai, o la e mafai lava ona latou faia pe a faapea e aoao lelei latou i vaega lea. So, o isi la mea ia e tatau ona faatau i le seleni lea o le a maua atu, ia faaopoopo atu foi i ai ma se pusaaisa e tuu ai vai, o se ogaumu e mafai ai ona tapena ni nai kuka foi ia i totonu pe a o atu tamaitai e fai se latou falelalaga po o a lava ni latou polokalame a o la e ua atoatoa uma mea ia. Afai foi e lava ai, ia faatau se TV e fai ma matamata ai i le aoauli ina ia maua ai foi le mea o le awareness agai i ni polokalame e mafai ona avatu. E pei la o le agaga lena o le fesoasoani lea e ave agai i fale komiti.

Ia, ona ou oo mai lea i le mea lea o le faiga o faleapitaga mautu lea e i ai le \$2 miliona lea ua uma foi ona taua e le Minisita o Tupe. Ia, aua o le matou Matagaluega foi e mataituina i latou o lo o lavevea ai i le vaega lea o le au matitiva ma le le tagolima. O lo o i ai le polokalame lea o lo o faaauau nei e le NGO lea latou te faia, ou te masalo o lea o le a avatu le \$2 miliona lea e faaauau ai polokalame ia. A oo la i le taimi o lea o le a fai ai tatou komiti ia o atinae, e tatau la i nuu nei ona latou tilotilo i totonu o latou alaalfaga, po o ai lea e lavea ai i i le mea lea, o i ina la e maua ai le sootaga ina ia mafai ai loa lea ona maua uma le avanoa o i latou e fia maua se fesoasoani i le fesoasoani lea, aua o le fesoasoani foi lea a le tatou Malo, o lea o le a faataamilo loa i le \$2 miliona i tausaga ia e 5, tusa e 5 a, ae \$10 miliona la pe a tuufaatasi. A o lea e auauai atu i le tai \$2 miliona ina ia mafai ai ona faatino le faamoemoe lea.

Ona tatou oo mai lea i si vaega lea sa latou talanoa mai foi i le ie Samoa. Ia, o lea e faaauau lava e le tatou Malo mea sa faaauau mai foi i tausaga ua tea ona e taua foi le atinae lea. Pau lava le mea lea e tau tilotilo atu i ai, o le faalautele o le polokalame lea ona o lea e musumusumu mai le Minisita o Tupe, o le latou nuu, o le siapo lava le mea e pito sili ona tele ai le latou foi tamaoaiga. Tusa la e faalautele la e le na o le ietoga, ie Samoa, a o isi measina foi o la e tatou te tilotilo atu o la e mafai ona aoao ai foi ni alo ma fanau a le tatou nuu ma le itumalo. Aua o mea uma lava ia, a misi mai le ie Samoa a o la e maua tupe i le siapo po o nisi foi measina e mafai ona aoao ai i lalo la o le tatou polokalame lea. O le taumafaiga e ave le faataua i le

quality. Ona ua ou tilotilo i ai, a faapea e le o atu le Matagaluega e vaai i le taimi e tatau ona o atu ai, ia, a e alu atu la e faatau lau ietoga, e te iloa lelei lava, e ese lava le ninii na amata mai ai ese le ninii ua faaii ai, ona e te iloa lelei lava ua lape le supervision lea e tatau ona o atu ina ia faatonutonu lelei i latou o lo o faia le falelalaga. A le o lena foi, e faatulaga mai le ie, e pei ua pio faapea. O i ina la e iloa ai foi aua ua tatou iloa uma lava le fua e fua agai i ai ma le tupe e tatau ona alu agai i ai. A o le aua autu, aua a lelei le quality o le ie, o lona uiga la, e maua foi le tupe lea e manaomia. O le faaitaiga lelei lava o le women in business aua ua leva ona latou faia le polokalame. Ia, atonu o le isi lena auala e tau tilotilo i ai le tatou Malo, o le faaoga o paaga ia ua leva ona latou faia le galuega lea ina ia mafai ai ona tulei le faatinoga o galuega ia i luga o le mea lea tatou te manaomia.

Ona ou oo mai lea i le vaega lea sa latou taua le disability benefit i le vaega lea o le manaoga tumau po o le manaoga tuga lea o le a fuafua e ave i ai le \$100 i le masina. O le taimi nei la, o lea ua galulue le tatou Matagaluega i le faamaopoopoga o le lisi o i latou ua uma ona resitala i lalo o faalapotopotoga tuga ia o lea ua uma ona resitala. E tai pei o le Fia Malamalama, Loto Taumafai, Ghosen Trust, ia ma isi uma, o le Sosaiete a le Au Tauaso, aua e le te i te i resitala, o le Senese. E le te i te i resitala tagata ia i totonu i i, ona o disability. O la ua i ai le tuga o lo o i ai ia latou. Ia se i tau faamaopoopo ai la le tatou lisi lea ona iloa ai lea o le aofai o tagata e agavaa i le fesoasoani lea. Ou te masalo o le matou faitau pe lata i le 3,000 le aofai o tagata. A o le taimi nei i le tulaga la e faitau mai ai nei, pei lava o la e le i oo i le 2,000 le numera o tagata o lo o maua ai i le vaega lea.

Ae o isi la fesoasoani o lo o taumafai foi lea e i lalo o le tatou Tala o le Tupe e ave agai i ai i le vaega lea mo faalapotopotoga lava ia, ae ave la i ai le mea foi lele o le budget support. Aua o le tele o faalapotopotoga nei, e le iloa po o fea le mea e o e sue mai ai seleni e fesoasoani ai i le tausiga o tagata nei, aua e ese le faigata o le tausiga o tagata nei. E sili atu le faigata i lo le gasegase lea e tausi i le falemai, ona o lena tou te silafia. Ae le gata i lena, e faapitoa foi ituaiga aoaoga e tatau ona latou maua ina ia mafai ai ona latou tausia nisi foi o tina ma tamalii o lo o i ai i totonu o le vaega lea.

Ia, e tau faaiuiu atu le... ona o mataupu lava na laga mai, o le tatou National Id project lea ua uma ona saunoa foi i ai le tatou Minisita. Ia manatua foi la o lea e faapea atu masalo i le lipoti lea e aumai, e tausaga atoa lava lea ua delay ai le faatinoga o le vaega lea. O le mafuaaga ona o la e tau tapena le mea foi lele o le legal framework o le auivi faaletulafono. Ae ou te le iloa i ai i le taimi lea na fai ai le filifiliga, o le loia e sau mai New York i Amerika. Ia a o la e la e poloka mai i le Koviti-19, ia ou te iloa lava e le iloa po o afea e oo mai ai, o le mea lena o lea ua tuutuu ai i tua le vaega lea. Na pau lava le mea lea ua uma ona fai i le poloketi lea, ua uma ona tusi mai le tusigaigoa lea na fai, lea foi la na tufa ai foi le tai \$50. Tusa

la toetiiti lava o faatasi le \$50 lena ma le \$3,000 lea na tufa ma fale komiti. Ia, o lea la ua uma nei ua maua le tai \$50, a o lea la ua faatalitali ma le aofai o tagata nei, ae o lea e le iloa po o le a le taimi e faatino ai, ae i ai lava le agaga maualuga, masalo po o le tausaga fou faatoa amata ai ona toe faagaioi le tatou vaega lea.

Ia, o le isi mea e sosoo ai, o lea foi e tilotilo i le isi vaegatupe lea e ave e support ai mea o NGOs. O NGOs la ia, o NGOs, o lea e patino lava i mea o social development. O nisi o NGOs ia, o le mea lava e tasi. O lea lava e tau struggle lava nai NGOs ia i faalapotopotoga a tamaitai, faalapotopotoga a autalavou, ia e lavea ai foi la ma le health NGOs e tai pei o le cancer society, o lea foi la e lavea ai ma le METI. Tusa o nisi la NGOs, aua e tai pei lava o le vaegatupe lea e tufa i faalapotopotoga foi a le aufaipisinisi, le vaega lea e i ai le Chamber, o le Small Business Hub. O lea foi la e tau tilotilo foi le tatou Malo, aua o isi ia mea e tatau ona faamalosi, aua o latou nei o lea e lagolagosua mai i le tatou galuega e le o mafai ona oo atu i ai le malosi o le tatou Matagaluega.

Ia ma le mea mulimuli, i le fesili lea sa aumai i le siitiaga o totogi o sui o nuu ma sui tamaitai o nuu. Ia, o le tulaga foi lele o le tilotilo atu foi a le tatou Malo, o le tele ia o galuega a sui o le nuu ma sui tamaitai. O le matua tele lava. Ou te lagona o le tele o nisi o latou, toetiiti lava 7 aso o le vaiaso e faigaluega ai. A o le aso muamua lava na ou faafeiloai ai ae faapea mai, ua ova ma le 10 tausaga e le i toe siia matou totogi. Ua le iloa po o le a le mea o le a fai, a o le faiga o matou lea e fai ai nei e matautia. Ou fai atu, sole, ia faatali mai se i ou alu e vaai po o i ai sau tupe o i ai e mafai ai ona sii tatou totogi. O le siitaga la o totogi leaga o lea sa fesili mai ai se tasi o sui usufono. O le isi la mea... O le taimi lenei, o le totogi la e i ai e \$250 le sui o le nuu i le 2 vaiaso ae \$200 le sui tamaitai. E eseese, e maualuga atu le aualii ia i lo le sui tamaitai. Ia atonu o la e afio mai le tamaitai Minisita sa i ai foi i le Matagaluega lea, po o le a le mea ua eseese ai, a o tatou lea e taumafai e promote atu, e empower i luga tatou tamaitai, a o lea e pei e foliga mai e solomua i le tatou Matagaluega le faaeseesega o le vaega lea a. I le matou la tilotilo i ai, e le o sao lea mea. O le mea la lea o lea ua fai ai loa le tonu, o le a sii i luga i le \$300 i le lua vaiaso mo i latou uma. E \$200 le alii \$200 foi tamaitai. Aua a ta tilotilo atu foi i ai i totonu o tatou alaafaga, e tele atu galuega o lo o fai e sui tamaitai i lo le isi aualii, i le vaega lea o sui o le nuu. Ia atonu o la e faalogologo mai, ou te iloa o se faiga tutusa lea, aua o lea e ogatasi lava ma le tatou faamoemoe lea e i ai o le siitia i luga o le tulaga o le i ai i totonu o tamaitai i a tatou faiga filifiliga ma tatou galuega e fai.

Ia, ou te talitonu la, aua o vaega ia sa laga e nisi o sui usufono i le matou Matagaluega.

Ona ou faaiu atu ai lea e faapea, e tatou te mau eseese i le mea foi lea sa laga mai e nisi o sui usufono o lea ua matou faamuamua le soifua

manuia ae faamulimuli le atinae. Masalo o fuainumera lava mea e aoga le tatou tilotilo i ai, ona fai ifo ai lea e outou le faaiuga poo o le a se mea e tatau ona i ai, aua o tatou uma lava, e taumafai lava e faapaleni foi lele a tatou fuafuaga ina ia apoapo uma vaega eseese o le tatou siosiomaga, ina ia mafai ona maua ai e tatou le tulaga lea tatou te manaomia.

O le manulauti a le Vaega Faaupufai Faatuatua i le Atua Samoa ua Tasi i le taimi lea na omai ai, o le taumafai lea ia siitia le soifua manuia o tagata, o le faapapalagi foi lele o le standard of living. Po o a la tatou aga e fai, a le siitia le soifua manuia o tagata, e tele lava la le faaletonu a. E eseese a la fua e masani ona fua i ai. A o fua la ia i nisi o faailoilo ia e iloa ai, o le mea lea o le mativa ma le le tagolima. E i ai le lipoti lea ua maua i faamaumauga a le tatou atunuu, e 22% le aofai o tagata o lea e lavea i lalo o le laina lea e i lalo ifo o le laina e tatau ona i ai tagata e le o lavea ai i le mea lea. O se fuainumera tele lea fuainumera. A faapea e 215,000 le aofai o tagata Samoa lea e i ai nei, o lona uiga e 47,300 le aofai o tagata lea e i lalo o le poverty lea ua uma ona define mai. Ia a faapea e toa-7 tagata i le aiga, o se vaimea o le 6,800 le aofai o aiga lea e lavevea i i le vaega lea. O le tatou galuega la, o le tatou taumafai e aveese aiga ia e i i faaalu agai i luga, ina ia tatou maua le upu foi lea o le equity, ina ia... e le o le equality a o le equity, o lona uiga o lou fiafiaga e tutusa ma le mea foi lea ou te manao ai ina ia tatou fiafia faatasi. E pei la o le mea lona o lea foi sa faaalai nisi o finagalo lea e faapea mai, ua alu lava i luga le GDP, a o lea foi e alu atu ai i luga ma nai isi o tatou fuainumera ia, e pei i lalo o le soifua maloloina e 30% i latou ua lavea i le toto maualuga, suka, nunu, lea e taua o le NCD. E 65% tagata ua lavea i le tino puta. Ia o lea tatou te iloa lava i totonu o le tatou fale lenei, e iloa ai foi i totonu o le Maota lenei le tulaga lea. E 130 le aofai o tagata la e ua oo i totonu e faamama le toto. O la e alu alu lava i luga i tausaga uma. Ia, faasolo atu lava lea e 450 le aofai o i latou o lo o i totonu o le toese i le taimi lenei, o la e foi e alualu i luga. Faasolo mai le itu tau aoga, e 25% drop outs mai le tausaga 13. E maualuga tele lea fuainumera. 20% le drop outs mai le tausaga 11. A fua la i fuainumera ia, atonu aua tatou te finau ai i fuainumera leaga o fuainumera moni lava fuainumera ia. Ae tatou mafaufau lelei po o le a le auala e tatau ona tatou faia ina ia taumafai e faaleleia atili ai tatou fuainumera na. O le mea la lona lea ou te fai atu ai mai le amataga, o le fua i le soifua manuia ma le fuaga o le atinaega o le tamaoaiga, o se galuega luitau lona i le tatou Malo o le taumafai e faapaleni le aofai o tatou tupe ia e maua ina ina mafai ona o faatasi le tulaga lea. Vaai, na o le 12% o i latou e faigaluega, o lea e i le formal employment. O lona uiga, o le toatele o tagata i ae i lalo ifo e le o i totonu o le formal employment ona o le leaga o latou skills, e le o lelei agavaa ae le o lelei foi ni latou qualifications foi lele, ona latou le mauaina ai lea o galuega e tatau ona i ai ona e le au i ai le latou silafia. O ituaiga fuainumera ia e tatau ona tatou tilotilo lelei i ai ina ia mafai ai ona fausia se

fuafuaga e tatou te iloa lelei mai ia tatou uma nei e i totonu o le Maota lenei, ina ia mafai ai ona tatou ausia le mea lea, o le soifua manuia.

Ia, o le faaiu atu o lau tautalaga i lenei afiafi, e faamalo atu i le Afioga i le Taitai o le Itu Agai po o le Susuga foi ia Tuilaepa sa avea ma Palemia o le tatou Malo, taitai i le HRPP mo tausaga e tele. E tele atinae lelei a le tatou Malo ua tulai mai, talu mai ona tulai le tou Malo. Ia, o matou foi la lea ua tulai atu, ia, tatou te taumafai tatou te galulue faatasi, ina ia tatou atili ai ona lelei le tatou tamaoiga ma le soifua manuia o tatou tagata.

Ia o le a tuu atu la le avanoa se i... ona ou fia faauma atu sau tala i lou itumalo faamolemole.

**FOFOGA FETALAI:** Faafetai. Ia, malo faafetai saunoa i lau Afioga i le Miinsita, e le toatele lava foi nisi, o lea ua ia te au le lisi, sa taua lau Matagaluega.

Ia o le avanoa lea...

**Tofa Lenatai Victor Faafoi Tamapua (Vaimauga 2):** O le mea e fia faamalamalama lau Afioga i le Fofoga Fetalai.

**FOFOGA FETALAI:** Ou te le o vaai atu i lou suafa i i. Na e...

**Tofa Lenatai Victor Faafoi Tamapua:** Ia o lea sa taua mai Vaimauga e le Afioga i le Minisita.

**FOFOGA FETALAI:** Ia saunoa mai le sui usufono mamalu. O se mea e fia faasao po o se mea e fia faamalamalama?

**Tofa Lenatai Victor Faafoi Tamapua:** Ia tatou o ia i vaega na e lua. Ma le faaaloalo lava.

**FOFOGA FETALAI:** Faapuupuu mai.

**Tofa Lenatai Victor Faafoi Tamapua:** Faafetai mo le avanoa. E momoli atu le agaga faafetai i lau Afioga i le Minisita e tusa ai foi ma le folasaga manino, aua tasi lea vaega sa laga foi e lou nei sui usufono i le komiti lea atinae o itumalo. O lea la e faalogologo atu i lenei afiafi, o lea ua manino lau folasaga i le tulaga lea o le a fai komiti, fai totogi, toe fau se ofisa, ma le seleni e fai ai poloketi, nai atinae i totonu o le itumalo. E pei o le matou itumalo, e 10 nuu o lo o i ai. O lea la ua manino mai nei i le afiafi lenei, ua le \$1 miliona, a ua \$200,000. A ou tilotilo i cost ia, o lea la ua manino foi ia te au e tusa ai ma le folasaga e \$200,000 e faatino ai vaega ia i le masina. Po o le sao lea lau Afioga i le Minisita? Ae a faapea e leai, ia ua ou see ese la, e \$200,000 i le tausaga. O lea ua ou vaevea le \$11

miliona i le 51 itumalo. Ae matau atu e \$215,000 a o lea e tau le \$200,000 faamolemole. Aua o lea sa taua foi i lau folasaga, e toe iloilo fuafuaga ia ua faataatia. O le fuafuaga o Vaimauga Nu.2 sa faatu ma faavae i le 2017, 2017 i le 2027, e 10 tausaga. Ia atonu o le taimi lelei lenei e toe iloilo le matou fuafuaga. O le talosaga, o le a le mea e le faasau le \$15,000 lea se i fesoasoani i le komiti e latou te iloilo ai le fuafuaga o lea ua maea ona faataatia aua o lea o le a atoa le 5 tausaga e pei ona e taua. Ia o members foi o le komiti lau Afioga i le Minisita, ia o le sui usufono lea e taitaifono, o le pulenuu, o le sui tamaitai. Ia e i ai nisi afioaga i totonu o si o matou itumalo, e le o i ai ni sui tamaitai, o lea la e faipaaga ai foi ma nisi o Ekalesia i totonu o afioaga ia, e pei o Vaivase ma Vaivase-uta. O lo o i ai foi le talosaga o lo o aumai i le matou nuu lea o Vaivase-uta mo se matou sui tamaitai. Ae pei lava o lea sa taofi se i faamaea faiga palota ma...

**FOFOGA FETALAI:** Ia, se i saunoa mai le Afioga i le Palemia.

**Afioga Hon Fiamē Naomi Mataafa:** Lau Afioga i le Fofoga Fetalai, ou te faatu atu se lafo, *Ina ia faaopoopo se 5 minute o le lauga faalauaitete a le sui usufono lea e saunoa mai.*

**FOFOGA FETALAI:** Ia, o lea ua tatau ona manino mai le sui usufono mamalu, o lea ua oo mai lau faafesili. O lea foi ua uma ona faamalamalama e le Minisita ae leaga o lea sa e toesea i sina taimi, ae o lea ua manino lava le \$11 miliona lea mo le taimi lenei, ae o lo o i ai le faamoemoe i le lumanai. Pe afai e le i maua e lau Afioga le tulaga lea.

**Tofa Lenatai Victor Fafoi Tamapua:** Faafetai. Ia ua lelei, pau lea. Faafetai mo le avanoa.

**FOFOGA FETALAI:** Faafetai. Malo faafetai. Ia tulai mai lau fetalaiiga Lauofo.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, faafetai mo le avanoa, ae fia faamauina foi le faafetai i le Afioga i le Minisita e tusa ai ma le polokalame lea e faaoga i ai le \$11 miliona po o le \$200,000 i le itumalo, faamoemoe agai i le lumanai ona faaoga lea o le \$1 miliona i le itumalo.

Ae o lau Afioga i le Minisita, masalo e le o po malae i lau Afioga, ona o lea foi e le i leva ona maea atu le faiga o komiti foi faapea faaitumalo. O le matou itumalo sa ou taitai komiti ai, e faapena uma lava le tele o itumalo sa i ai, e taitai komiti le sui usufono o le itumalo ona i ai lea ma pulenuu o afioaga taitasi. Masalo o lena e te silafia, o tulaga sa faataoto mea o taiala, district plans ma tulaga uma faapena.

O le mafuaaga ua ou pai ai i lea vaega muamua, ona o le tele foi ia o luitau sa i ai i lena foi faiga, a o lea foi la ou te tau vaavaai atu, e pei e tau faapena teisi lava le model lea e saunoa i ai lau Afioga ma folasia mai i luma o le Maota Fono i lena afiafi. Ae talosia le agai i luma, atonu o lena foi ua e silasila lau Afioga i le tele o luitau sa tulai mai i lena poloketi, ina ia aua ne i tulai mai i le faamoemoe lea pei ona i ai aua o se faamoemoe taua, ma e lelei.

O le tulaga lea o le fesili atu lau Afioga, o le tulaga foi lea sa e saunoa i ai i le \$3,000 lea sa tufa i komiti a tina i afioaga taitasi, sa i ai lava vaega faapitoa sa faaoga i ai. O le isi afioaga o lou itumalo sa faalelei ai le latou fale komiti. O lea foi la e faalogologo atu, e aofia ai foi la i le poloketi lena se faiga faapena. O le afioaga o lou itumalo sa fau ai le latou flea maketi foi lea i luga o le aualatele, i autafa o le aualatele auala la mea o fua o faatoaga ma vaega faapena.

**FOFOGA FETALAI:** Ia, o lea ua maua atu lou finagalo.

**Tofa Hon Lauofo Fonotoe Nuafesili Pierre Lauofo:** O lau fesili la lau Afioga, o le lipoti i ai? O ai e accountable i ai pe report i ai le komiti lea a le itumalo? E i ai se vaega faapitoa i totonu o le tatou Matagaluega po o le a le tulaga e i ai. O lea sa e taua, o le isi vaega e fia agai i ai le fesili e fia malamalama, i mea o poloketi eseese la ia o le a faatino nei i totonu o itumalo, e aofia ai mea tau taaloga? O le uiga o lau tala, o mea o sport equipments. Pei o le mafuaaga lena o lau fesili lea pe ono aafia ai, aua e i ai afioaga, e pei la e i ai afioaga o lou itumalo o le lelei ia o latou au kirikiti foi nei papalagi, ae le taugofie equipments e faaoga i le au kirikiti, ia leaga sa tele ina ou fesoasoani ai i isi matou au ia. Pe aofia ai mea la faapena, pe o le faamoemoe na o mea tau faatoaga, mea tau ietoga. O a uma ia mea tau tulaga, e pei o le tulaga na e fia agai i ai le fesili, ia se saunoaga malamalama a lau Afioga...

**FOFOGA FETALAI:** Ia o lea ua maua, ae...

**Afioga Hon Fiamé Naomi Mataafa:** Lau Afioga i le Fofoga Fetalai...

**FOFOGA FETALAI:** Ia saunoa ia...

**Afioga Hon Fiamé Naomi Mataafa:** Lau Afioga i le Sui Taitai o le Itu Agai, o se tagata ua leva i le Maota. O le ituaiga saunoa lea e saunoa mai ai, o le isi vaega lona 3 o le auiliiliga. O le mea lea e saunoa mai ai, o lea e tatou i luga o tulaga lautetele ma faiga faavae. E faamanatu atu lau Afioga faamolemole.



**FOFOGA FETALAI:** Ia o lea ua maua lau Afioga i le Sui Taitai ia, ae e le o manaomia se toe faamalamalama....

**Tofa Hon Lauofo Fonotoe Nuafesili Pierre Lauofo:** Leai o le fesili lava ia e fia malamalama aua o lea e aofia ai ia faiga faavae, faiga faavae o le poloketi pe aofia ai ma mea tau sports.

**FOFOGA FETALAI:** Ia o lea ua maua lou finagalo o lea sa tali mai ai le...

**Tofa Hon Lauofo Fonotoe Nuafesili Pierre Lauofo:** Ae o au sa lauga i le disability lea sa saunoa ai le Afioga i le Minisita. E tasi lava lau fesili, o mo mea o... aua sa ou fesili foi lea, i le uiga tonu o le upu manaoga tumau. I le tulai o lea la sa e saunoa mo mea o nai tagata foi ia e po le vaai, ia o tagata o ituaiga faapena. Ia o i le Fiamalamalama, a o le fesili, ona e i ai la isi mo mea o gasegase foi ia faaitaiga, o le vaega lea o le vaega foi lea faamama toto se i tulou dialysis pe lavea ai pe aofia ai le vaega lena. Ia ma na i isi tagata foi ia o ituaiga gasegase leaga o lea ua faamauina, e \$100 i le masina a? 100 i le masina.

Ia e sosoo atu ai ma le fesili i le vaega lena, faamolemole, po o le... aua o lea ou te vaai atu e \$3 miliona, o le faamoemoe e na o le tausaga faaletupe nei? Pe o le faamoemoe e faaauau atu lava agai i luma? E pei foi o le penisione? Faafetai.

**FOFOGA FETALAI:** Ia o lea ua maua, ia atonu o lea ua...

**Afioga Sulamanaia Fetaiai Tautilili Tuivasa:** Lau Afioga i le Fofoga Fetalai...

**FOFOGA FETALAI:** Ia o i ai sou...

**Afioga Sulamanaia Fetaiai Tautilili Tuivasa:** fia maua se avanoa.

**FOFOGA FETALAI:** Oi i, o lea e i ai... faapuupuu mai, o se mea e fia faasao po o se mea fia...

**Afioga Sulamanaia Fetaiai Tautilili Tuivasa:** O le vaega o le Tulafono Tumau 82 vaega muamua.

**FOFOGA FETALAI:** I le a? O se mea e fia fasao po o le mea e fia faamalamalama. Tali sao mai i le fesili lea e fai atu ai le Nofoa, ia saunoa.

**Afioga Sulamanaia Fetaiai Tautilili Tuivasa:** Ou te momoli le faafetai i le Afioga i le Minisita. Ia ona o lea ua faaali manino ia le vaega lea sa

tatalo atu ai i le tulaga lea o le siitaga o totogi o nai Pulenuu ma tamaitai faapena. Ae ona o lea e le i tali i le mea sa ou taua i mea ia e pei o faalapotopotoga foi ia e o lava latou e pei la e i ai ituaiga lea se i tulou e i ai nofotane o mea faapena, sa i ai le naunautaiga e mafai ona lesitala uma i lalo o Tina ma Tamaitai.

E oo foi i isi tulaga faapena, ina ia foia ai le tulaga foi ia e pei o le a faaaoga Faalapotopotoga nei e aumai ai i totonu seleni ma mea faapena, ae e le faataunuaina ai ia le tulaga o le auunaga. Ia o lea foi ua taua e le Minisita ia e momoli le agaga o le faafetai i le tulaga lea ua faamatu mai ma faamalamalama mai foi... ae mo le silafia o le itumalo lenei o Vaimauga.1. e 10 tausaga plans foi na faatino ai ua uma ona faataoto foi i itumalo. Sa o atu foi ia le Matagaluega ma... ae pei o lea ua e saunoa mai ua faaleaogaina.

E pei o se tulaga lena ae a faapea e na o le teuteu lava, ia o le agaga lena.

**FOFOGA FETALAI:** Ia tulai mai lau Afioga i le Minisita e faauma mai lau Matagaluega.

**Afioga Hon LEOTA LAKI LAMOSITELE:** Ia o lea ua maua atu lau... ia faamalo faafetai. O le tulaga lea e i ai tatou, o auunaga o mea ia sa ou tolaulauina atu, o ni faataitaiga foi lea o tulaga e ono oo i ai. Ae o lea e le i faamautuina ia taiala.

O le mea lena na ou fai atu ai e fai ia le consultation foi a lea ina ia saofaga uma i ai ia finagalo, ona mautu loa lea o taiala. Leaga e lua ma ia sa saunoa mai ai lau Tofa Lauofo o le fale komiti le isi pito, ia ae o le \$200,000 le isi vaega. Ao mea uma lava na e oo foi i le fale komiti, e faamautu lelei lava ia taiala e le Matagaluega, ina ia mafai ai ona accountable latou i tupe ia e avatu, e fesoasoani atu i ai.

E faapena uma lava ma manaoga tumau ma le Faalapotopotoga o Vaimauga e fai uma lava taiala o lo o galulue lava ia le tatou Matagaluega, ma o le taimi lenei i le faatinoga o taiala, ia ma le vaega lea a le PMU lea e le i faatuina ina ia mafai ai ona faagaioi ia le polokalame. Ia ma le faaloalo.

**FOFOGA FETALAI:** Ia lelei o lea ua faauma mai ia saunoaga a sui usufono ae faauma mai lau saunoaga a lau Afioga i le Minisita. Oi ia onosai laitiiti mai lau Afioga i le Minisita se i...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai ona ua leva ona faatali mai ia le atunuu i fuafuaga nei. O lea foi ua faafogafoga le Maota ua faafogafoga mai le atunuu ao lea foi ua matau e le i maea ona faatino i le atoatoa ia tapenaga o Faiga Faavae.

O le tuualalo, ia faapepa uma mea ia, ma fai se check list o mea e mafai ona faaalu i ai seleni o le a avatu ina ia aua ne i toe faateia ai ia itumalo, ona o lea foi e matau e tatau ona ia sao atoatoa ia faamaumauga. Aua o lona uiga a le faamalieina, ia o lona uiga e le toe faamanuiaina i nisi fesoasoani i le lumanai.

Ia manatua lelei o mea nei e le faapea e atamamai uma ia afioaga, i le faatutumuina o pepa ma le malamalamaaga. O le matua tele o fesili o le a tulai mai nei, ae ia lava tapena le Matagaluega ma faamaumau uma i lalo mea e ono faaalu i ai. Ia tusi uma lava i lalo, aua ne i toe omai sau se loomatua fesili e taga ona faatau mai ai se fuatoto ma ni fuafiva? Mea faapena o lea sa e saunoa i ai. Ia manino uma mea ia, aua ne i i ai se toe fenumiai mulimuli.

Ia o se fesoasoani i le polokalame.

**FOFOGA FETALAI:** Ia o lea ua avatu ia se fesoasoani a le Taitai o le Itu Agai, ia talitonu o lena ua tapena lau Afioga i le Minisita ma le Matagaluega. E aoga foi le fautuaga.

**Afioga Hon LEOTA LAKI LAMOSITELE:** Malo faafetai mo le fautuaga. E pei ona ou taua atu analeila, o mea uma lava ia o lea o le a tuu i totonu o le taiala lea sa ou taua po o le booklet.

Ia e momoli atu le faafetai i le Maota nei e tusa ai foi ma le tatou felafolafoaiga i le mataupu ua maea atu. Ae e fia liliu atu lava tasi i si o matou itumalo.

Faatalofa atu i le paia ma le mamalu o Palauli 2. Ia o lea sa masani ona faaigoa i tatou i le Palauli le Falefa, ia malo le soifua. E faatulou atu i Tapaau e Fa, Tootoo e Fa o le tatou itumalo. Ia aemaise foi ia le tatou alaalfaga i Gataivai mea o lo o Susu ai le Laauli, Paia o le Aiga Salevalasi, ia lau Fetalaiga Tiatia ia tainane foi ia Togiai ma Falaa. Alaalatai Salemuliaga, faamalo foi ma faatalofa atu i si o matou nuu lea o Papa, o Susu Leopoao, Afifio Faumuina, Silafau ma Tamaitai, ia Alaalatai lau Fetalaiga Mauisiisii, ia ae faapea ia Saulutoga.

Faatalofa atu foi i si o matou nuu o Puleia, mea o lo o Susu ai ia Faasuumaleau, ia Afifio Suafa ma Tapaau, Afio Fepuleai, Alaalatai ia lau Fetalaiga Satala.

Ia ona ou oo mai lea i si o matou alaalfaga o Sili ma Gautavai, i le mea o lo o Susu ai le Tagaloa, le Alii o le Nuu, Afio le Aiga Saamituanai, ia Susu le Gafa, ia Alaalatai ia Safune ma Taulauniu.

E le uma foi ia le fia faafetai atu i Feagaiga Taulagi o si o matou itumalo, faapea o latou faletua, aemaise i latou o maua tofiga i le Ekalesia, lau Susuga i le Faatonu Toeaina, lau Susuga ia Leaso ma le Faletua, ia faapea foi le Failautusi Aoao o le EFKS i Savaii i lau Susuga Epati Aмоса ma lou faletua.

Ia e le gata i lea, faatalofa atu foi i saofaiga a tina ma tamaitai o le tatou itumalo, tupulaga talavou, ia faapea foi uo ma paaga o i totonu uma o le tatou itumalo, e fia momoli atu lau faafetai e tusa ai foi ma le tou faaeaea ua outou aumaia ia te au, o lea ua ou seei ai i le Nofoa o Palauli le Falefa, i le lima tausaga.

Ia ou te fia faatalofa foi i nai ou uso sa o matou tauva i le Susuga i le Laulu faapea foi le Afioga ia Faumuina, ia malo le taaalo. Faamalo foi le tauivi, talitonu ia ou te faafetai ma ou faamalo atu ia te oulua, ona ua oulua malolo faatamalii. Ae e i ai foi ia lou talitonuga, o le tatou vaa e alo faatasi. Ma e i ai lou faamoemoe, o le a tatou galulue faatasi i le faataatiaga foi o nisi o polokalame ua fola atu, e lenei Malo mo le alu i luma o lo tatou itumalo.

Ia e mulimulitai ai lau faafetai i le matou aiga uma, i totonu o Samoa faapea foi nuu mamao, ona o le latou fesoasoani mai e tusa ai foi ma lau taumafaiga, ia o lea ua iu ma le manuia lo tatou faamoemoe. Ia faapea ona faamanuia atu pea le Atua ia te outou, ina ia maua pea le ola ma le malosi, e mafai ai ona o tatou fesootai ma o tatou feoeoeai, i tulaga foi o lau taumafaiga e tusa ai ma le tofiga ua ou seei ai nei. Ia viia le Atua.

Ae faafetai i lau Afioga i le Fofoga Fetalai, mo le avanoa sa tuuina mai ua mafai ai foi ona avatu foi se sao o lenei foi itumalo e tusa ai foi ma le tatou faigatonu, ia ma le tatou faiga filifiliga i lenei afiafi.

Ia faafetai atu foi i le mamalu o le Maota i lau Afioga i le Palemia, Sui Palemia, ma le mamalu o le Kapeneta ma lenei foi Itu o le tatou Maota, ia faapena foi ia lau Afioga i le Taitai o le Itu Agai ia ma lena foi Itu o le tatou Maota, ia ma le mamalu o le tatou aufaigaluega a le Fono, ia faapea foi ia le paia ma le mamalu o Faauluuluga o Matagaluega, ia ma Faalapotopotoga Tumaoti ua o tatou faatasi. Ia faapea foi le tapuaiga a Samoa o lo o faafofoga mai, ia malo le soifua. Faafetai.

*Na faaalua le agaga fiafia o le Maota i le patipati o latou aao i le maea ai o le Saunoaga Talifuaitau a le Minisita mo Tina ma Tamaitai, Atinae o Nu'u ma Afioga ma Agafesootai.*

**FOFOGA FETALAI:** Ia ua faamalo faafetai saunoa i lau Afioga i le Minisita o Tina ma Tamaitai, Atinae o Nu'u ma Afioga ma Agafesootai. Ia faafetai saunoa. Talitonu foi lea ua malamalama le paia o le Maota, faafogafoga foi le atunuu i le folasaga foi ma le faamalamalamaina o nisi o mataupu na laga e sui usufono mamalu.

O le mea lea faamalo faafetai, tapena ia aua le agai i luma o le tatou Malo. Ia o lea ua oo mai i le Minisita o Faamasinoga ma Tulaga Tau Faamasinoga, ia lau Fetalaiaga Matamua, Hon Matamua.

**Tofa Hon MATAMUA SEUMANU VASATI SILI PULUFANA (Minisita mo Faamasinoga ma Tulaga Tau Faamasinoga):** Lau Afioga i le Fofoga Fetalai o le Maota, e le vaea le falaooto i mamalu ma paia faale-Malo ua faaee atu i lau Afioga, e ala i le Nofoa Pule o le Maota ua e afio mai ai nei. Ia ee mai i lou nofoaga ae se i taumafai atu se upu faafeiloai, ao se faatalofa ma se faatulou a lou nei sui usufono fou aua le tafatolu o faafeagai o Pulega o le Malo faapea le tapuaiga mamalu a Samoa aoao, ma le tapuaiga a si ou itumalo pele, Faasaleleaga Nu.1. e aofia ai Salelologa ma Tafua.

Tulouna ia le Afio o lau Afioga i le Ao Mamalu o le Malo, lau Afioga i le Tamaiga, lau Afioga i le Tuiaana Tuimalealiifano Sualauvi Vaaletoa Eti Suatipatipa II ma lau Masiofo. Tulouna le Afio o lau Afioga i le Sui o Fono a Sui Tofia, lau Afioga Le Mamea Ropati Mualia ma lou faletua. Mamalu mai le Afio o lau Afioga i le Palemia, lau Afioga i le Sao Faapito, lau Afioga Fiamē Naomi Mataafa faapea le afifio o a outou Afioga i Minisita o le Kapeneta. Susu mai lau Afioga i le Fofoga Fetalai lau Afioga Papaliitele Oloipola Lio Taeu Masipau faapea lau Afioga i le Sui Fofoga Fetalai. Afifio a outou Afioga i Minisita Lagolago, faapea a outou Afioga i sui usufono o le Vaega Faaupufai o le Faatuatua i le Atua ua Tasi.

Liliu mai foi i lea Itu, le Afio o lau Afioga i le Taitai o le Itu Agai, lau Afioga Tuilaepa Auelua Fatialofa Neioti Aiono Galumalemana Dr. Sailele Malielegaoi. Afio o lau Afioga i le Sui Taitai, lau Tofa Laufo Fonotoe Nuafesili Pierre Laufofo, faapea sui usufono mamalu o le Vaega Faaupufai e Puipuia Aiatatau a Tagata.

E le galo foi se faatalofa aua le Afio o lau Afioga i le Faamasino Sili faapea Alii ma Tamaitai o le Faamasino o le Faamasinoga Mauaialuga. Alii ma Tamaitai Faamasino o le Faamasinoga Faaitumalo. Afio lau Afioga i le Peresetene, Alii ma Tamaitai Faamasino o le Faamasinoga o Fanua ma Suafa. Le tapuaiga mamalu a Faauluuluga o Matagaluega ma Faalapotopotoga Tumaoti o le Malo o Samoa, faapea le aufaigaluega a le Malo i ona Matagaluega eseese.

O mamalu sausaugata ia, ma paia faalanugata ia o le Malo o Samoa. Ua mamalu ai le Maota Fono o Samoa i le malae i Tiafau nei. O le malae o le faautugatagi a Samoa, na sunui ai ao o le Malo, aua Samoa ma lana Faigamalo. Sa saili e ni o outou tuua ma matua, o e ua lagomau i o latou tiasa. Nuunuu faatini o tausala i faleupolu o tofiga ia paia ma ia mamalu, aua o le latou gafa tausī lea.

Ae se i ou liliu ane aua le tapuaiga mamalu a Samoa ua potopoto i le Afifio o Tama ma o Latou Aiga, Aiga ma Tama, Pule ma Tumua, Itua ma Alataua, Aiga i le Tai ma le Vaa o Fonoti.

Tainane le tapuaiga a lo tatou motu i Sasae le Afio o Sua ma le Vaifanua, Fofu ma Aitulagi, Saole ma Saleaamua, ma le Launiu na saelua. Afio oe

Tuimanua, Afio Faatui o le Motusa, Tootoo o le Faleula ma le Tama o le Manuatele. Tulou, tulou, tulouna lava.

Ae tu maualuga sau upu faafeiloai, ao se faatalofa aua le tapuaiga mamalu, a Taitai o Ekalesia e fia o lo o i Samoa ma atunuu i fafo. O e o lo o punonou i le ao ma le po, e ala i le tatalo i le Atua, ma o lo o faia pea le latou faiva faaositaulaga, aua se manuia o Samoa ma lana Faigamalo. E talitonu ia lenei usugafono, o la outou tatalo ma la outou tapuaiga mau Samoa ma Taitai o Ekalesia, ua ae malo ai le Palemene o Samoa, ma lana Fonousu o lo o tauaofia nei.

O upu lava a Samoa e fai i le gataifale o le Aiga i le Tai, ina ua to i tua Apolima, ae paia siuava o Manono e faapea, ua to itu Apolima, ua tuanai le atuava, ma le atuvasa ae o lo o ua maua le avafatafata.

Lau Afioga i le Fofoga Fetalai, ua tuanai fita ma faigata sa o tatou auvasaina, i le 6 masina tali ai lea sa feagai ai Samoa ma lona gasegase a malo. Ao lenei ua o tatou feiloai i le avafatafata, i le tai malu ma le tai tafola talu le alofa ma le agalelei o le Atua, sa Na faatautaia maia ia le sa folau o Samoa.

Lau Afioga i le Fofoga Fetalai, ou te fia pai foi i le fefinauaiga a Paulo ma Peteru, ma le ausoo o le Alii e tusa ma le tofiga ma le valaauina faaaposetolo o Paulo. Fai mai soo o Iesu, faapei ona faamauina i lalo o le Feagaiga Fou o le Tusi Paia. Sa faafuafua ma le fiafia Peteru ma le ausoo ia Paulo, po o fea e sau ai ma lona tofi faaaposetolo, atoa ma le Pule ua valaauina ai o ia e talai le Talalelei a lo tatou Alii o Iesu Keriso.

Fai mai Paulo ia Peteru, o oe Peteru ma le ausoo, ma lo outou valaauina, sa filifilia ma tofofi outou e Iesu, ao i ai o Ia i le lalolagi nei. O lo outou valaauina o le valaauina ao i ai Iesu i Lona Itu faaletagata. Peitai o le tofiaina o au, o Paulo lea, ma le filifiliina o au, e fai ma Vaa ma Ipu o le Talalelei ia Keriso, o le valaauina mai ia Iesu, ina ua tuanai Lona toetu mai nai e ua oti.

I le manatu o Paulo, o le valaauina mai ia Iesu, ao i ai o ia i le Agaga. O lona uiga, o lona tofiga, o lona filifiliga ma lona valaauina, o le valaauina faaleagaga. E peiseai e faapena se vaivaiga o lenei usugafono. O i tatou ua avea uma ma Kerisiano i le tuanai o le maliu ma le toetu mai o Iesu. O ni tofiga ma ni valaauina, ma ni filifiliga, e mai ia Keriso Toetu.

O lona uiga o le tatou valaauina, o le valaauina faaleagaga, e ao ai ia i tatou ina faaleagaga, mea uma e tatou te faia. Ia faaleagaga ia tatou filifiliga, ma a tatou tonufai. Ia faaleagaga le faatinoga o la tatou auaunaga ma la tatou tautua o lo o faia mo le Malo ma le atunuu, ae ia taumamao lava i tatou ma le faaletino. Ia faifai malu o tatou faiva ma ia moni ma faamaoni lo tatou faamuamuaina o le Atua, i so o se ala lava, e manuia ai Samoa ma lana Faigamalo.

Ia lau Afioga i le Fofoga Fetalai, se i ou liliu ane i lou itumalo. Lou itumalo e, lou nuu Salelologa ma Tafua, ma ou aiga i Samoa ma atunuu i

fafo, o la outou tapuaiga mau ma la outou tatalo faatauana i le Atua, o lea ua manuia ai se taumafaiga vaivai a lou nei tagata. O lea ua ou seei ai nei i le Nofoa o lo tatou itumalo, mo le Palemene o Samoa. E le lava au upu ma se gagana ou te faaleoina ai lau faamalo ma lau faafetai tele ia te outou. Faafetai i le faaeaea, faafetai i le tou pule. E ui ina faigata, ae sa faigofie lava ma tumalo ona o lau puleto ua faamatuina mai i lenei tagata faatauva. Ia faamanuia le Atua.

Lou nuu e, Salelologa, o Paia lava lea i le Afifio o Tapaau ia Tia ma Luamanuvae ma i Laua Matua. Susu Sua o le Maopu o Nafanua, Tiumalu ma Saunoamalu ma le Matua. Ia faapea foi le Aiga malelega a le Malietoa. Lau Susuga Seiuli ma le Aloalii, le mamalu i lau Fetalaiga i le Tuua. Le Falefia ma le Falesalafai, o oe o le Lologapule na e lave i Manino, e lave i Aava.

Tainane si ou nuu o Tafua, le Afifio o Tuifaasisina ma le Alaala i le Matuatala, Alaalatai le lua toalua ia Ulu ma le Maota, faapea le mamalu o le Toiloto. O lea ua sausau falele ai nei le manu na i le Utufiu, ua fia faaogaina lou nei tagata, se i ou auauna atu ai mo oe ma lo ta itumalo.

E le galo le aufaigaluega paia a le Atua, i totonu o si o matou itumalo, o lo o tui le mulipapaga, o lo o po le fala ma feula le mulila, aua se manuia o lo tatou itumalo ma lana sailiga manuia i le Atua ma Lona Malo. O a outou tatalo ma a outou tapuaiga, ua manuia ai lau taumafaiga. Ou te momoli atu le faafetai tele ma le faamalo, ia faamanuia atu le Atua ia te outou, ma nai o outou faletua ma outou aiga.

Lau Afioga Sili Epa, faafetai mo lau tofa faale-Atua. Ua tau ai i manu lo ta faamoemoe. Ua e faasee tuagalua ae tuuina mai lo ta tofi, ou te tauaveina mo lenei 5 tausaga. Momoli atu lau faafetai tele, ma ia faamanuia atu le Atua i lau Afioga.

Lau Afioga i le Fofoga Fetalaiga, se i ou taumafai e taliina atu, nisi o mataupu sa lagaina mai e sui usufono mamalu. Atonu e na o le Afioga ia Fonotoe, lea ou te manatuaina sa lagaina mai nisi o mataupu. Faafetai mo lenei itu. Muamua, o le faatupeina o Loia fesoasoani, Legal Aid. Ua fesiligia le utiuti o tupe faaagaga a le Matagalua i lenei Tala Faatatau o Tupe mo le totogiina o Loia fesoasoani i Faamasinoga o Soligatulafono. Mo le silafia e lenei Palemene mamalu, e leai se suiga o le vaegatupe lea mai i le Tala o le Tupe i le tausaga ua mavae 2020/2021.

O le aofai lava lea e tasi sa afea lenei mataupu ma le faatalanoaga ma le Matagalua o Tupe, ma ua taoto ai se mataitu o le Matagalua o Faamasinoga. Afai e vave ona uma le seleni sa i totonu o lenei Tala o le Tupe, o le a mafai ona faatalosagaina se faaopoopoga i se Tala o le Tupe Faaopoopo, Supplementary mo le faaauauina o lenei fesoasoani, ina ia maua ai avanoa tutusa a nai o tatou tagata mo le sailiga o le amiotonu.

O le fuataga o tuaoi o itumalo e \$350,000 lea ua i ai i totonu o le Tala o le Tupe a lenei Matagalua. Atonu o lea ua i totonu o le Matagalua

mataupu a nisi o itumalo. O lea la, o tupe ua faaagaga i totonu o le Tala Faatatau o le Tupe mo le faamoemoe lea, ua fuafua e faataunuu ai faaiuga a le Kapeneta ma le Faigamalo ua tuanai, ona o faaiuga o Faamasinoga mo le fuaina o tuaoi o itumalo i tausaga ua mavae. O lea sa fua ai tuaoi o Atua, mai i le va ma Falealili. Le atu Aleipata, Lotofaga ma Fagaloa seia oo i Falefa. E i ai itumalo lea ua uma ona i ai faaiuga mo le fuaina o latou tuaoi. O lea la e i ai o le faamoemoe o le Matagaluega o le a faaogaina ai le tasi lea o tupe. Faataitaiga o tuaoi e pei o Aopo ma Sasina ia ma Letui i le motu i Salafai.

O le isi fesili sa tuuina mai, o le Community Law Centre, atonu o le fuafuaga leni sa taoto mai atonu o lea e silafia e le Kapeneta lea sa i ai muamua. O lea sa taoto mai i le Paeaiga ua tuanai. Sa toesea mai le Tala o le Tupe ua uma atu nei, ma sa toa ai le tapenaga, ona o lea ua toe faataoto i le fuafuaga mamao aoatetele a le Malo ma le lala o le amiotonu mo le isi 5 tausaga o i luma, lea ua toe faatulaga ai ma le Tala Faatatau o le Tupe i leni tausaga. Faafetai tele i le Minisita o Tupe lea ua tali mai mo le faagasologa tapenaina auiliili a le Matagaluega mo le amatalia o leni faamoemoe aemaise o se faavaa po o se model e talafeauga ma si o tatou atunuu.

E i ai ni matafaioi o lo o faatino e le Matagaluega e faasee ese i se vaega e amata ai se Ofisa Tumaoti o le Matagaluega o Faamasinoga e mataitu ma faaleleia atili ai ae le i see atu i se nofoaga tumau. O nisi o tapenaga o lea faatalanoaga faapaaga e aofia ai le sosaiete o loia mo lona faamautuina.

Faamaoti le itutino o Faamasinoga. Atonu o lea sa fesiligia muamua foi le Separation of judiciary, le \$30,000. Ia o le agaga o le seleni lea ua taumafai le Matagaluega e tali atu ai i se finagalo o le Afioga i le Faamasino Sili mo se paketi tutoatasi mo Faamasino. A silasila ane na o le \$30,000 e tapenaina ai ma fai muamua ai suesuega pe alagatatau ae pe faapefea foi ona faatino leni faamoemoe. O se iuga o lea iloiloga e limataitai ai se isi laasaga mo le agai atu i luma.

Fale Faamasino mo Savaii i Salelologa. Ia o lea sa talosagaina e le Matagaluega le \$3 miliona mo le sui maiga o le fale faamasino mai Tuasivi agai i Salelologa o lo o i ai uma ofisa tutotonu o le Maota. Peitai ane o lea ua maoti mai le \$2 miliona aua le tauatiaeina ma le tauamataina o le sifi mai o le fale faamasino i Tuasivi agai i i Salelologa. Atonu e le o po se lilo i le paia ma le mamalu o outou tuai sa i ai, o le mataupu leni sa laga i le 2017 a o lea e oo mai i le taimi nei e le i faatinoina o lea ua maoti mai le \$2 miliona e faatino ai ia gaoioiga uma. Ia, na pau lea o ni mataupu sa laga mai saunoaga i le taimi ua tuanai.

Lau Afioga i le Fofoga Fetalai, o upu masani lava a faifeau e faamavae ai ma le fanau a le Atua pe a tuua se sauniga lotu, ia ia te oe le filemu o le Alii.



Lau Afioga Tuilaepa ma sui usufono mamalu o lena Itu o le Maota, ia faamanuia atu le Atua i lau Afioga ma le mamalu o sui usufono o le Itu Agai. Ia faatamaoagaina pea outou e le tumu atoatoa o le Atua, aua la outou galuega fai o le agaia o le Malo.

Liliu mai i lenei itu o le Maota, lau Afioga i le Palemia ma sui usufono mamalu uma o lenei Vaega ua tulai mai e taitaia le Malo, e i ai se faamalosiau sa ou mafaufauina mo lenei itu, mo le faigamalo, peitai ane, mai saunoaga i aso e lua ua tuanai, leai o lea ua ou iloa nei e aoga foi mo outou, e aoga mo tatou uma lea faamalosiau.

O le faamalosiau, o le faamalosiau... o upu a le aposetolo o Peteru e faamalosiau ai i le au Kerisiano o lo o i Ierusalem, o lo o maua lea i le 1 Peteru 4: f12 ma le f13 e faapea, “Le au pele, aua tou te ofo i le tofotofoga pei o le afi ua oo ia outou e fai ma tofotofoga ia te outou e pei o se mea fou ua oo ia te outou. Ae faapei ona tofusia o outou faatasi i tiga o Keriso, ia outou olioli ai ina ia fiafia outou ma le olioli tele pe a faaalua mai lona mamalu.” Ia fiafia outou ma le olioli, tatou uma, ia tatou fiafia ma le olioli i mea e tiga ai, ia taofimau le amiotonu ma ala o Iesu Keriso, le Alii ma le Faaola. Le fiafia lena ma le olioli o Iesu tatou te manumalo ai i tofotofog e feagai ma i tatou aua le taitaiga o le Malo. Ia fiafia ma olioli i tiga ma puapuaga e feagai ma tatou, aua o tua o na mea o lo o taoto ai le manumalo ma le faaeaina.

E muliai ae le fai ai, o le faafetai ma le faamalo i a outou Susuga i Ofisa Sili o Pulega o Matagaluega ma Faalapotopotoga Tumaoti, le aufaigaluega o le Matagaluega a le Palemene, le malu o le Malo ma nisi ua le mafai ona oo i ai se faafetai ae o lo o faatinoina outou sao taua mo le manuia o le Fonousu a Samoa. Faafetai tele ma faamalo atu, ma ia faamanuia atu le Atua.

E momoli atu lau faafetai ma lau faamalo i le paia ma le mamalu o le Pulega i le Ofisa Sili o Pulega ma le aufaigaluega a le Matagaluega o Faamasinoga, faapea foi le Komisi o le Toefuataiga o Tulafono. Malo le galulue malo le faatoatoa, malo le tauatai mo le tautuaina o le Malo ma ona tagata uma lava. Ia faamanuia atu le Atua.

Ou te faafetai atu foi i nai ou aiga i susuga i faafeagaiga ma faletua faapea le fanau. Faafetai Samoa mai lava i ona ao seia o oi nai fanau lalovaoa, la outou tapuaiga mau ma la outou tatalo. Ia viia le Atua ma faafetaia mea ua outou faia, ma ia faamanuia atu. Ia ma lou faaaloalo lava, soifua ma ia manuia, ae ou ola i le alofa o le Alii.

*Na faaalua le agaga fiafia o le Maota i le patipati o latou aao i le maea ai o le Saunoaga Talifuaitau a le Afioga i le Minisita mo Faamasinoga ma Pulega tau Faamasinoga.*

**FOFOGA FETALAI:** Ia, faamalo faafetai saunoa i lau Afioga i le Minisita mo Faamasinoga ma Pulega tau Faamasinoga, o lea ua maua lelei lou finagalo, aemaise foi o le faamalamalamaina o nisi o mataupu sa laga e sui usufono mamalu. Malo faafetai. E talitonu lava o lea ua manino mea uma i lau folasaga. O le mea lea, faamalo faafetai saunoa. Ia faamanuia le Atua i le Matagaluega ma lau Afioga i le Minisita aua le agai i luma o le tatou atunuu.

Ia, o lea ua oo mai i le Minisita mo Aoga, Taaloga ma Aganuu, Hon Seuula Ioane, o lou taimi lenei. Se i onosai mai lava lau Afioga i le Minisita.

Ia saunoa lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, e tatau ona ou tulai atu e momoli le faamalo i le Afioga i le Minisita, le Afioga ia Matamua. Ou te manatua pea le aso na ou oo atu ai ma tatou auai faatasi i le sauniga o le foi sa e tausialii i ai na avea foi ma sui usufono o lenei Vaega, ou te manatua pea. Ma ou te manatu foi o se aso fiafia lenei i le silasila mai a lou alii, e le taumatea o lo o i le parataiso, o faafogafoga mai i lenei vaega o le po o e saunoa ma faamanuia mai foi i lenei itu. E avea ai au ma sui o lenei foi Vaega Faaupufai e momoli atu ai le matou faamalo, o ou mama na.

**FOFOGA FETALAI:** Ia, amuia lau Afioga i le Minisita, o lea ua faamanuia atu le Taitai matua o lea itu o le malu. Ia, malo faafetai.

Ia ua oo i le taimi o lau Afioga i le Minisita o Aoga, Taaloga ma Aganuu, lau Afioga Seuula Ioane.

**Afioga Hon SEUULA IOANE (Minisita mo Aoga, Taaloga ma Aganuu):** Ua maea ona vasevase le taufa pei o le upu e fai i le tagoau a le tupu, ua maea foi ona faalele le laupuamana, e pei o le tala i le alofisa o le tupu i le taisamasama. O lele foi ua pisi i lagi galu o le manu a ua taiulaula le tai o Nafanua na fili ma pule ai Malo. O lea foi ua pulafia eleele o Samoa i le talalelei ia Iesu Keriso lo tatou Alii Faaola. Tau ia ina ia malie i le faafofoga a le Atua Silisili Ese e tusa o le malosi o lana upu i o outou fofoga aemaise o tatou gutu, e fai lea ma viiga o le Atua i lenei afiafi e oo i le faavavau. Paelago ia la le sa lelepa o tautai matapalapala, ua i luga nei o le gaga, lolo ane i paepaeloa ae see i malae o malo ina ua lotaua le pa i Fualaga i le maota i le soosootuli i le la foi itulagi.

Ee maia lau Afioga i le Fofoga Fetalai aemaise lau Susuga i le Sui Fofoga Fetalai, tainane le ofisa mamalu o le Fono e pei ona tatou i ai i lenei afiafi. Afio lau Afioga i le Palemia, afio lau Afioga i le Sui Palemia ma le Kapeneta faapea foi Minisita Lagolago.

Ne i faagaloina tae o Atua i le alaala mai o lau Afioga i le Taitai o le Itu Agai, tainane le Sui Taitai ma le mamalu o le au usufono, malo le soifua, viia le Atua. O outou lava o lupe na faalele, na fatia mai le fuifui ina ia fai ma sao mo le Malo o Samoa.

O lea ua aemalo le faamoemoe, ua i ai foi le talitonuga, sa e seu i lagatila ua e faapulou malo fai o le faiva. O le Atua Silisili Ese, o ia lava e i ai le mana atoa o le Faavae o le Malo o Samoa, o Ia lea ua taimua i lenei afiafi ma le faasologa o le usugafono.

O le a see lava le aliioaiga ae iite lava i le mamalu mai o ona tua i le manu faailagi o le alofa ma le agalelei o le Atua. A o le upu a Sione Uesile, “O le mea sili ua ia te i tatou le Atua.”

Lau Afioga i le Fofoga Fetalai, o le Matagaluega o Aoga, ou te faaupuina o le Matagaluega mo tagata uma. Aua foi e le tofu aiga ma uafu, e le tofu aiga ma malae vaalele, o nisi foi o aiga e alaala i Apia nei e taumamafa i le maketi, e leai foi ni a latou faatoaga. Ae tasi lava le mea e tutusa uma ai tatou, e tofu le aiga ma tamaiti aoga. O lona uiga, e le fou i la outou faafofoga ma lo outou silasila lou tulai atu i lenei afiafi, o tatou o matua faitama, o tatou o matua tautua i aoga i nuu ma alaalfaga o lo o opeopea ai o tatou afioaga. E le fou la i sa outou faafofoga se faamatalaga o lenei afiafi. Ua tatou iloa uma lava auala e uia e faalelei ai aoga a tatou nuu ma tatou itumalo, aemaise o le Malo o Samoa.

Se i muamua ona fai sau faafetai i le Susuga i le Minisita sa nofo atu i le Nofoa lenei. E i ai foi le talitonuga lau Afioga, ua faigofie lou ulu mai, ona sa i ai lau tapenaga na fai. Malo faafetai.

Ou te faafetai foi i le Afioga ia Aliimalemanu o ia foi sa nofo i le Nofoa o lenei itumalo, e le itiiti foi sona ia sao aoga i le tauveina o upu o Malo e pei ona i ai i le afiafi nei.

Faamalo ma faafetai i le Ofisa o Aoga i la outou tautua e le mate, e le uma. E taumafai pea ma taumafai pea ina ia to manu o le tatou atunuu.

Ae o le a ou oo loa se i tali fesili na tuuina mai. O le manaoga muamua, o le faleaoga o Lepea. Ia, lau Afioga i le sui usufono, o la e ua i luga nei o le laulau tapenaga mo le faleaoga o Lepea. E i ao foi le talitonuga, o le taliga o le faleaoga o Lepea, o le taliga foi lena o faleaoga uma o le tatou atunuu, e muamua tapena le afioaga, tapena le komiti, sauni sa outou tusi ona ave loa lea i le Matagaluega o Aoga. E i ai foi uo ma paaga a le Matagaluega o Aoga e fesoasoani e faatupeina faleaoga, e pei foi ona galulue mai i ai le faigamalo ua tuanai. E i ai le JICA, e i ai Saina, e tele isi faitotoa o lo o tatala mai e mafai ai ona fausia faleaoga. O lona uiga, mo a outou afioga sa outou mananao i ni faleaoga o outou afioaga ma itumalo, o lena ua tau atu le auala e fai. O le galuega a le Malo, o le faafaiaogaina o tatou aoga, o le fai o silapasi ma tapena mataupu e aoao ai alo ma fanau. O le galuega lena a le Malo.

O le galuega a tatou o matua, toe tilotilo ane i meaaoga a tamaiti. Ua uma aso la e alu atu le tamaitiiti aoga ma lana homework, e faale malamalama i ai si toaina ma si loomatua. A o le taimi lenei, e sili atu le malamalama o matua i lo le toatele foi o nisi homework e fai atu e faiaoga. A ua sasao ai lava le faiaoga, aua ua iloa lelei e le faiaoga, e le taitai kea matua i meaaoga a tamaiti. O lea foi le faamalosi i lenei afiafi, matua, tasi lea tatou pitolaau taua e siitia ai aoga ina ia mautu le lumanai o le manuia o Samoa. O lea ua i ai le faleaoga o Lepea, ia sauni po o afea e oo atu ai.

O le isi talosaga, o le tele o nuu, e 12 nuu ae fai mai e 4 faleaoga. O lona uiga a tufa uma faleaoga i nei nuu e 12 i le valatalata lea, o le matuai faigata foi i le Ofisa o Aoga ona faafaiaoga, pei lava ona outou silafia lenei vaitaimi ma le utiuti o le aufaigaluega. Aua foi tusa lava pe iu mai le tama ma le teine mai le kolisi faafaiaoga, ae faafuasei ona aumai se galuega e tele atu ai le tupe i lana taga, ona alu loa lea faamuamua le mea le la, ae tuu lona valaauina na valaau ai. O le mafuaaga lena ua le toatele ai ni tatou faiaoga o lo o galulue nei. Ma o se galuega faigata ma le fita i le Matagaluega o Aoga o lo o tau faafoefoeina lea mataupu, o le tau faamalieina o manaoga o nuu ma afioaga taitasi ina ia fetui le lola o tamaiti ma le aofaiga o faiaoga. Fai mai le isi sui usufono, e na o le faifeau ma lona toalua ma le isi teine e toa-1. Lau Susuga i le sui usufono, o lea ua maua atu nei, e le o se aoga a le Malo le tou aoga, lona uiga o le mission school. Ae pei foi ona ou fai atu, toetiiti lava faiaoga uma tatou. O lena e i ai loomatutua ma teine ua le toe maua ni galuega, aveane i totonu e faafaitau tusi a tamaiti ma faatumu ai lena avanoa. Ma o le galuega fita lena o lea e silasila i ai le Matagaluega ina ia faatoatele ni faiaoga e faamalieina ai manaoga o nuu taitoatasi.

Sa fesili mai le isi sui usufono ia te au, “Seuula, e te matuai e fiu e fai le mea lea o le faasaoga o le 10% o le 51. Ona ou fai atu lea i ai, ou te le fiu, tatou te toe foi lava i le mea tuai na tatou ola mai ai ma tatou aoga ai, na o le faaova lava i le selau, faatele, vaevae ia maua ai lava lea o le pasene tumau.” Ia aua le popole i lea mea. O le CEO o lau Matagaluega, o le polofesa o mea tau matematika. Ia, ae ona o lea e le o i inei, ae se i sau toe faasao ana mea ia.

O le totogi o faiaoga o le ECE, e pei lava ona faafofoga lenei usugafono mamalu, o lea lava ua faataatia i luga o le Laulau a Fono ma luma o le Ofisa o Aoga le manulauti lea e totogi aoga a le Malo ma aoga le lotu ma faasolosolo a mautu lelei aoga ia a le ECE lea faatoa amata, e ono oo foi i ai le faasoa a le Malo.

O le free internet wifi mo Savaii. E le faagaloina le faafetai i le faigamalo ua tuanai atu aua e le fou i totonu o le Matagaluega o Aoga le i ai o le wifi lea, peitai, i le itumalo mamao lea ou te sau ai, e uma loa ona fix e nai tama na o atu, pe le i oo atu i le gate i le aualatele, ae toe pe foi. Ae o lea o lo o i ai le vaavaai mamao a le Matagaluega e toe tapena lelei le mea lea ina ia

tutusa ma faiga ua i ai aoga i le taimi lenei ua faasolosolo atu tatu ina le toe o ni tamaiti aoga i totonu o faleaoga o i ai ni faiaoga, ae iu ina faaoga le faatekonolosi e aoga mai ai o latou aiga ma o latou fale. O lea foi la ua tapena le Matagaluega e faaoga faiaoga ina ia tali lea manaoga.

O le Kolisi o Vaipouli sa aafia mai se tasi o... ou te iloa o lea ua faafofoga manino le sui usufono lea i fuafuaga alualumamao na faataatia ai foi le aoga i Vaipouli, e i ai foi nisi tulaga aua lena e i ai isi kolisi na e latalata atu, ou te iloa o le mafuaaga lea, ae taatia mai lou finagalo atonu e i ai foi se isi mea e aoga i ai lena fale.

O le tele lava o manaoga na tuuina ma ii luga o le Laulau a Fono, ia o mea lava tau faleaoga ma faiaoga. E i ai foi le avanoa lea ua fesiligia ai foi, ua tapena nei le Matagaluega e fai se suiga fou i le mea e tau o le 4 levels, ma ou te iloa e le fou lea mea i la outou faafofoga. E le gata i sui usufono mamalu o le Fono, ae ao foi ona silafia e matua, aua e fesui lava Matagaluega ae tigaina lava matua e faatupe ia mea ma faia pili o tamaiti aoga. Peitai ua tilotilo le Matagaluega, atonu o se isi foi vaega elei le mo le agai i luma o aoga a lo tatou atunuu i lenei vaitaimi. Ua tele fonu e auai ai faiaoga, ia, ona o le tau amataga lava o le faaulufaleina o le faatekonolosi i totonu o aoga. E sili atu na vave o le poto o tamaiti i lo faiaoga. Afai la e popoto faiaoga ma taumafai e ao le mea lea, e tatau ona lelei le tapenaga a faiaoga e tali atu ai i manaoga o tamaiti aoga.

O le OGG po o le One Government Grant lea a le Malo, faafetai foi i le usugafono ma le amanaia foi o lea itu taua o le tatou aoga. Peitai, o lea ua ou tilotilo atu ua i ai se faamanuiaga ua faaopoopo le OGG mo tamaiti o le tulagalua, sa \$100 a o lea ua \$150. O lona uiga, ua i ai se siitaga mo lea foi fesoasoani, ua le gata i le tulagalua, ae faapea foi i aoga a kolisi aemaise foi o aoga o lo o aoga ai nai o tatou tagata e i ai o latou manaoga faapitoa. Ua siisii lava i luga, e le gata ua taugata le soifuaga ma mea e faatino ai aoga, ae faapena foi le faatekonolosi i nei ona po.

O lo o fesiligia pea le free internet, ia o lea ua uma ona fai i ai se faamatalaga. O le agaga lena o le Matagaluega ia faafaigofie le internet mo aoga a le fanau. Ua uma ona lavea i sau faamatalaga le totogi o aoga a Ekalesia, private schools, ECE ma special needs.

Schools advisories. O asiasi aoga. Na aafia mai i se saunoaga a se tasi sui usufono, e tatau ona toe i ai ni asiasi aoga. O i latou ia e tatau ona latou monitor ina pe aumaia ni lipoti tusitusi aloaia i le ogatotonu o le Matagaluega latou te silafia ai foi mataupu o lo o i ai aoga i nuu i tua, aemaise o le motu i Savaii. O lea foi la ua faamanuiaina le talosaga lea, o lea ua tuu atu nei i le PSC e toe faaopoopo nisi asiasi aoga aua aoga a le tatou Malo.

O le fee lea mo le Iunivesite. O le fesoasoani lea mo matua. E ui lava ina anoa aoga a le Iunivesite e tapenaina ai tomai faapitoa o tatou tamaiti aoga, ae le taugofie foi. Peitai, ou te faafetai o lea foi ua i ai le sikolasipi e

mafai ona fesoasoani i pili o tamaiti aoga nei, pe afai e lelei pea a latou taumafaiga ma faasolosolo i luma ma pasi a latou mataupu.

O le aoga a le Matata Eseeese, o lea ua i ai foi le fesoasoani a le tatou Malo. Aoga mo tagata e i ai manaoga faapitoa aemaise o aoga faataitai, o lea foi ua i ai le fesoasoani a le tatou Malo. E i ai nisi fesili na aafia atu i le Minisita o Tupe aemaise foi o le Minisita mo Tina ma Tamaitai o lo o tali atu ai nisi fesili ma nisi manaoga na tuuina mai.

A o lenei taimi, e momoli atu le faafetai tele. E le i toatele tele nisi na fesiligia le Matagaluega o Aoga. Ae i ai lou talitonuga, e pei lava foi ona ou fai atu i le taimi muamua, o le Mataglauega lenei, o le Matagaluega a tatou uma. Pe le lagonaina sou siufofoga i lenei itula afiafi, ae i ai lava lou talitonuga, o oe, o au, o tatou uma, o le tatou sao i alo ma fanau, ia lelei a latou aoga.

Ia, ona faamuta mai ai lea i i o se faamatalaga, seivagana lau Afioga i le Fofoga Fetalai ona ou toe pai lea i nai tagata na lagolago mai ia te au pe a faapea e i ai se avanoa.

**FOFOGA FETALAI:** Tulai mai le sui usufono mo Faleata 1

**Tofa Manuleleua Paletasala T Tovale (Faleata 1):** E le o se faafesili pe o se isi vaega, e pau le agaga o le sui o le agaga faafetai i le Minisita o Aoga. E leaga o la e faafofoga mai le tamaitai pule ma le aoga a le Primary School a Lepea, o lea ua faaleo lo latou manaoga. E momoli le agaga faafetai i lau afioga, o lea ua tali mai lau afioga i le tulga lea e pei ona talosaga ina.

O lea ua faafofoga mai le komiti ma le puleaoga, ia tapena lea o mea ia ua outou faafofoga mai. O lea ua saunoa i ai le Minisita.

A o maua pea le avanoa e momoli le agaga faafetai, i le afioga i le Minisita o Galuega ma Felauaiga, e tusa foi ma le talosaga na momoli atu i vaitafe o lou itumalo. E pei ona silafia le mafatia i tausaga taitasi. Ae faafetai o lea ua vaai o lea ua amata ona faagaoioi le galuega lea i vaitafe. E momoli le agaga faafetai i lau afioga Olo, faafetai tele lava mo le talia o le talosaga a lenei itumalo.

**FOFOGA FETALAI:** Malo faafetai, malo saunoa. Ou te talitonu o lea e matau atu, ua faamalieina le Maota i le saunoaga a lau Afioga i le Minisita.

O le mea lea, e momoli atu le faafetai tele i lau Afioga i le Minisita o Aoga.

**Tofa Seuamuli Fasi Toma:** Lau Afioga i le Fofoga Fetalai.

**FOFOGA FETALAI:** Ia ua toetiiti lava tautuauega.

**Tofa Seuamuli Fasi Toma:** Ona o lea sa afea i lau tautalaga faamolemole ia le tulaga i aseta ia o le faleaoga sa i ai i Vaipouli. O le fale lea sa fai e Iapani i le 1981, ma le isi faleaoga tele lea e i Vaipouli, ona e molimauina o le a maumau nei aseta a le Malo.

O le mea lea sa fai atu i lau faamatalaga faamolemole, po o le a tonu lava se silasila a le Minisita o Aoga, ae avae ia ma le matou itumalo o lo o taumalae lea faamoemoe, e faaaoga mo nisi o aiga. Pe a fai e le finagalo i ai lo tatou Malo...o le faamoemoe lea ma le faaaloalo faamolemole.

**FOFOGA FETALAI:** O le measili ua faafofoga mai le Afioga i le Minisita, ua e maua mai lau Afioga i le Minisita.

Saunoa mai pe afai o i ai se mea o e...

**Afioga Hon SEUULA IOANE:** E leai ma se isi o outou o ala i lenei taimi, e faalogologo mai i le latou faleaoga lea o le a avatu.

Ae mo le faafesili a le sui usufono mai Gagaemauga. Na aveese loa le aoga, aveese mai loa i lalo o le pulega a le Ofisa o Aoga. O la ua tuu atu aseta, i o i le vaega le la latou te pulea aseta a le Malo.

**FOFOGA FETALAI:** Ou te iloa o lea ua manino lea tulaga. E momoli atu le faafetai tele i lau afioga i le Minisita o Aoga, aemaise foi le tapenaga aua foi nisi o manatu sa tuuina atu e lo tatou Maota. Atonu o lea ua faamalieina lo tatou Maota, ua leai lava se isi e toe siligia lau Afioga i le Minisita.

Tulai mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, ona o le itu lea sa agai foi i ai se manatu, i le tulaga lava lea o social services. E i ai le tau faalogo atu i nisi foi sa laga le tulaga o faiaoga ma e i ai lava le aafiaga i le tele o aoga, i le tulaga o faiaoga. Sa i ai le tatou polokalame lea i le toe faaaoga o nisi o i latou i mataupu tau Saienisi, ua ou le iloa po o faaauau pea le polokalame lena i le taimi lenei. I le tulaga o le televave ona maua o tatou faiaoga Saienisi o lo o moomia tele.

Ona o mataupu tau Science, ona o i ina tonu lava lea e sioki ai faiaoga mo aoga, aemaise lava kolisi. O le tulaga lena, e taua ai le manatu foi lea, lea sa ou faalogo atu ea, pe tatau ona toe tilotilo i ai, o i latou o faiaoga ua litaea, ina ia fai se faiga ia mafai ai ona toe faaaoga i latou ia. Aemaise foi o nisi o faiaoga lea e maua faamanuiaga i lalo o polokalame lea o le 1100, e o ese atu ai e o i Niu Sila i le tatou quota, ma aafia ai lava le le lava o faiaoga mo le aoaoina o tatou fanau.

A o lea foi ua maua lau faasilasilaga, e ono le toe manaomia ni faiaoga, ona o lea o le a faatekonolosi le aoaoina o le fanau. O le a le televave o lea fuafuaga?

**FOFOGA FETALAI:** Po o maua mai e le Afioga i le Minisita, pe o fai lava aoga a faiaoga science, ma le tekonoosi pe vave.

**Afioga Hon SEUULA IOANE:** Faafetai i lau Afioga a le Taitai o le Itu Agai, aemaise foi o le faafesili. Ou te talitonu foi, o lagona uma lava ia o lenei usugafono. O le naunautaiga lava ia faaleleia le itu tau faiaoga. E i ai lou talitonuga o lo o faaauau pea le tapenaina o faiaoga ia, ae le o malosi tele.

Ae o le naunautaiga o le Matagaluega, ia faamalosia lea vaega. O se isi foi itu lau afioga, e pei lava ona ou fai atu i le taimi ua sola, o tua i tatou afioaga ma alalafaga, o lo o tumu i faiaoga. O le isi faiaoga o le faiaoga litaea, o nisi faiaoga na faiaoga, faiaoga lava o faifeau.

O lona uiga e tasi na tagata o lo o i ai le tomai, e ono fesoasoani mai i totonu o aoga a nuu ma alalafaga. Aua o le taimi lenei, e tasi lea mea sa faalagolago malosi i ai tatou i aso ia, o aoga a faifeau. Peitai ua le toe aliali ae i luga lea itu. Ae o lo o toatele lava faiaoga, ou te iloa o s luitau lea mo le Matagaluega o Aoga, ia fai se auala e faafiaoga ai le tagata o lo o i ai le tomai ma le agavaa i tua i o tatou aiga.

O le fesili lona lua a le Afioga i le Taitai, e i ai le manatu o lea ua amata ona faagasolo ia consultation a faiaoga, e tapena ai i latou, ina ia mafai ona oo mai vaega ia, ae ua i ai se poto masani faiaoga e faataunuu ai le faamoemoe lea.

**FOFOGA FETALAI:** O lea ua maua le finagalo o alu Afioga i le Minisita,

Lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** E toe tasi lava le fesili. Ua maua se iuga o le aso e amata ai le Faauluuluga o le Iunivesite o le Pasefika i Saute iinei.

**Afioga Hon SEUULA IOANE:** I le taimi lenei, o lo o i ai a matou fetusiaiga ma feiloaiga i luga o le zoom. Ona e le i mafai ona oo mai le Faauluuluga o le aoga lea, o lo o i ai lava i le atunuu lea e faaunuu ai i le taimi nei. Peitai o le naunautaiga o le aoga, ia oo mai iinei po o le masina fou. Pe a faapea e maua se avanoa, e le gata i le vaalele, o tapenaga ia auai mai. Ia o lo o faagasolo lava galuega a le USP.



**FOFOGA FETALAI:** Malo faafetai, o lea ua manino lea vaega, faafetai foi o lea ua faamalamalama lea itu e pei ona fesiligia e le Taitai o le Itu Agai.

E faamalo atu i le Minisita o Aoga, faafetai foi mo le tali mai e tusa foi o nisi o finagalo na faaalua i le Maota.

E talu ai o lea ua tatou oo mai i le taimi o le tatou malologa.

Ou te faasilasila atu ua taatiaese nei Taualuamaga a le Fono Aoao Faitulafono mo lana malologa 15 minute.

*Na faataatiaese Galuega a le Fono Aoao Faitulafono mo lana malologa masani i le itula e 10:50 i le po ma toe faaauau i le itula e 11:20 i le po.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.*

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoao Faitulafono.

E faataatiaese Taulumaga a le Fono Aoao Faitulafono ua maea ona saunoa le Afioga i le Minisita o Aoga, Taaloga ma Aganuu.

O le avanoa leni i lau Afioga i le Minisita o Fesootaiga ma Faamatalaga Tekonolosi. E faamaea i ai saunoaga talifuaitau a le Malo.

Lau Afioga Hon Toelupe Puumulinuku Onosemo.

**Susuga Hon Laauli Leuatea Polataivao Fosi:** Lau Afioga i le Fofoga Fetalai, si mea laititi lava lea. E fia maua se avanoa.

**FOFOGA FETALAI:** Ia onosai mai lau Afioga i le Minisita, se i...Tulai mai lau afioga....

**Susuga Hon Laauli Leuatea Polataivao Fosi:** Faafetai, viia le Alii ua tatou taunuu mai i leni vaega o le afiafi. A o si mea laititi lava lea mo lou silafia lau Afioga i le Fofoga Fetalai.

Se malie lava po o ai le ae gafa ma le tatou system lea o le live lea o le tatou Fono, ua fia sefulu afe ia tagata le e message mai i le mea lea o le poloka o latou. O nai sui lagolago nei i isi vaega o le atunuu, e le o mafai ona momoli mai a latou faamalo.

Faamolemole lau afioga i le Failautusi, na ou lipoti atu i le sui Fofoga Fetalai i le mea lea. Faamolemole tatala le avanoa i le atunuu atoa e fai mai ai a latou faamanuia i le la Itu ma leni Itu. A i ai ni komeni e le fetai, o lena tou te iloa le mea e fai.

Ua le itiiti ifo ma le sefulu afe ma ona tupu tagata ia e message mai ia te au. Faamolemole e vaai po o ai e nafa ma mea ia e fai faalelei ifo ia faamaumauga o lea e tauvalaau mai tagata.

O le faamanatu lena i lau afioga i le failautusi, ua ou manatu e tatau ona avatu i i, ua fiu foi e fai atu soo i tua. Ma le agaga faaaloalo.

**FOFOGA FETALAI:** O lea ua maua atu le finagalo o lau Afioga i le Minisita o Faatoaga ma Faigafaiva.

O lea ua faafofoga mai le failautusi, tautuana ifo le mataupu lea ua tuuina mai faamolemole.

Tulai maia lau Afioga i le Minisita, Hon Toelupe.

**Afioga Hon TOELUPE POU MULINUKU ONESEMO (Minisita o Fesootaiga ma Faamatalaga Tekonolosi):** E faafetai i lau Afioga i le Fofoga Fetalai. O le avanoa foi o lenei usugafono e faaali ai se faatauvaa, aua lava le tala o le tupe e pei ona opea i le Maota.

E piiama so matou manatu, finagalo o lenei itumalo i le talosaga ua molia e lau afioga i le taeao ua sola. E faafetaia ai le alofa taumulimuli o le Atua. E le gata i lo tatou atunuu a o le Palemene.

O lenei itumalo e faatuatua lava i so o se mea. O le amataga o le tatou Fono i lenei vaiaso, sa taua ai le Tulafono Tumau 139, peitai le sui o Falealili, e tilotilo sao lava i le Salamo e 139. O lo o saafi ai le fai- Salamo i le alofa taumulimuli o le Atua. Ua i ai upu e faapea, “Ou te alu ea i fea ai lou agaga. Ou te sola ea i fea ai ou luma, afai ou te alu ae i le lagi o i ai lava oe, afai ou te fofola sou moega i seoli, faauta o lo o i ai lava oe.” Faafetai i le alofa taumulimuli o le Atua, i le lelei ma le leaga, le malamalama o le pupula o le lagi ma le pogisa o Seoli, o lo o i ai lava le alofa taumulimuli o le Atua.

Lou agaga e, ia e faamanu i le Alii, o mea uma foi o i totonu ia te au ia faamanu i Lona suafa mamalu.

Lau afioga i le Fofoga Fetalai, e muamua ona ou faatulou i le alafa o le Maota o Samoa i lenei ituaso.

I le afio o lau Afioga i le Fofoga Fetalai, afio le Afioga i le Palemia, lau Afioga Fiamē Naomi Mataafa. Afio Minisita o le Kapeneta, ae a lau Afioga i le Taitai o le Itu Agai lau susuga Tuilaepa. Afifio sui mamalu o le Palemene o Samoa.

Susu lau susuga i le Failautusi ma le aufaigaluega. Ae a le mamalu o Ofisa Sili o Pulega o Matagaluega a le Malo, tulou.

Tulou le faafofoga tapuai a lau Afioga i le Faamasino Sili. Lau afioga i le Peresetene o Faamasinoga o Fanua ma Suafa ma le mamalu o Alii ma Tamaitai o le Faamasinoga, tulou. O le Tafatolu lena faafetauagai o lau Faigamalo Samoa.

Lau Afioga i le Fofoga Fetalai, e too lava ma le faaeteete le sa usufono o lenei itumalo. Ta te tu ae lia, leaga o le malae na saili i le tofa tautua, ma le toto masaa o tupu o Samoa. Lele o lo o tapuai mai tiasa aua faiva o lau Afioga ma le Palemene.

Tulouna le malae i Tiafau, tulouna le malae o lo o pae ai tia o le tautiaga a Samoa. E mai lava i Lalovi ma Anapapa, Malaefono e afio ai Mataafa seia Fili ma Puletuu, valoia ai le Talalelei, tulou.

Tulou le afio tapuai a lau Afioga i le Ao mamalu o le Malo ma lau masiofo. Afio lau Afioga i le Sui o le Fono o Sui Tofia ma lou faletua.

Tulouna le afio o tama a aiga, lau afioga Tuiatua Tupua Tamasese, susu lau susuga i le tapaau faasisina le Malietoa e faafofoga ia te oe Samoa.

Afio tapaau ma aiga, o Aiga o Tupu ma Aiga o Nofo, Aiga o Papa Aiga na Tafaifa. Le usoga ia Pule ma Tumua, Ituau ma Alatau, Aiga i le Tai ma le Vaa o Fonoti, tulou.

Le faafogafoga tapuai a tatou uso i Sasae. Le paia i le Faigamalo, lau Afioga i le Kovana sili le Kovana Lutena ma le mamalu o lau Kapeneta. E a le afio o le Peresetene ma sui mamalu o le Senate. Le afioga i le Fofoga Fetalai, ma le mamalu o le Maota o sui. Le Faigamalo a Tutuila ma Manua. Le paia i le Faleagafulu, afio oe Faatuiolemotu le Maopu, paia ia Sua ma le Vaifanua, Saole ma Saleaamua, mamalu i le launiusaelua. Fueloloa ma tootoouli o le Faleagafulu. Ae a le paia i le Maota sa, le afio o le laau na amotasi, afio Faatuiolemotu. Maopu, tootoo o le faleula ma upu i le Manuatele, tulou.

E le faagaloina le tapuaiga a le aiga sa Levi. E faatulou i le itupa paia o ositaulaga. Susu susuga o faauluuluga o ekalesia i so o se Fatafaitaulaga. Susuga a taitaifono ma Laulau a fono a ekalesia. Ae a le aufaigaluega tofofi a le Atua, tulou.

Lau Afioga i le Fofoga Fetalai, e faatulou i le faafogafoga tapuai a si ou itumalo. Se taimi afe ane faafetai i la outou faaaloalo. A e na ona ou faapoipoi faatulou i lau tapuaiga, mai lava i Poutasi ma Fagamalama, Lalofau ma Leatimalama seia paia Fanuatanu. Fatiuga Falefasa ma Falepunaoa, tulou. Ae a Falealili Nu 2. Malaeoletalu, Salani ma Alofisula, seia paia Tapulolou, tulou. O paia lava lea o le afio o Lalonafa, a oulua nofo, ma le mamalu a Tauagaeseese ia Falealili, tulou.

Lau Afioga i le Fofoga Fetalai, a o le i avatu se naunautaiga o le tofi o Falealii, aemaise o le auaunaga a lenei Matagaluega o Fesootaiga ma Faamatalaga Tekonolosi. E avea ai lou sui faatauvaa e avatu le faamalo a lenei itumalo i lau Afioga e tusa ma lou valaauina. O lo o faatautaia le sa o Samoa e ala i lana Palemene i lenei Paeaiga. Ua malo tau, malie toa i lau afioga, amuia lou itumalo, amuia oe. Amuia lau afioga ua e faatautaia le sa folau o Samoa i taimi soua. Ia utu mai i le lagi lau tofa aua lou valaauina.

Lau Afioga i le Fofoga Fetalai, ona ou oo mai lea i finagalo o sui usufono e tusa o le Tala o le Tupe ma le auaunaga a lenei Matagaluega.

O le aotelega lau afioga, e na o le toa 9 sui mamalu sa talanoa ma fesiligia lenei Matagaluega e tusa o auaunaga.

I le aotelega lau afioga, o le tele o fesili o lo o i le tekonoosi e pei ona saunoa le Afioga i le Taitai o le Itu Agai, aemaise foi o le tulaga tau aoga ma le tatou school net. E faafetai i le auaunaga a le Matagaluega, aemaise o le faatinoina o latou tofi ma tiute, aemaise foi le Matagaluega o Aoga ma le latou matafaioi, e pei ona saunoa le Minisita o Aoga.

I lenei 6 vaiaso sa fai le sailiga a lenei Matagaluega. O tatou aoga uma lava i Upolu, e 28 aoga o lo o ola a latou internet. E 15 e le o i ai se connection lau afioga. E 53 o lo o i ai le connection ae le o ola.

I le motu i Salafai, e 13 ia aoga o lo o ola lau afioga, e 30 o lo o i ai le connection ae le o ola.

Lau Afioga i le Fofoga Fetalai, o lea ua ta aofia ai le tele o tulaga na ua i ai. A silasila foi i le tala o le tupe, o lo o faataoto i totonu le \$2 miliona ina ia foia le faafitauli lea. Ma e tele galuega fuafua a le Matagaluega ina ia foia lea vaega.

O lau matau i le 6 vaiaso lea sa matou mafuta i ma tausaili le tulaga o lo o i ai. O le mea muamua lau afioga, o le aufaigaluega. O le tele o services nei ua faamatuu atu i tua i tato private sector latou te faatinoina. E oo lava i le CSL, e ui lava e tele le sao o le Malo i lona atinaeina, peitai o lo o faatinoina ana galuega as a private company. O lo ua tilotilo i ai le Malo i tulaga talafeagai, ina ia mafai ona faatinoina galuega ma faaleleia lea auaunaga.

O le tulaga lau Afioga i le naunautaiga ...a silasila foi i le tele o tatou nuu ma afoaga, e le o i ai le tomai latou te faia ai nei, aemaise a i faiaoga ma...latou te...aua o lenei mea o le technology o le sese lava, o le oomi o le button se i tulou, e mafai ona pe atoa ai le system. E le o i ai la i faiaoga le tulaga talafeagai, e mafai ai ona latou foia ia faafitauli, ma ia faaauau ai pea lea vaega o le connection ma le connectivity aua galuega fai a le Malo.

Lau Afioga i le Fofoga Fetalai, e i ai nisi o sui sa fesili i le SNBH. E faamanino i le Maota lau afioga, o le SNBH, o le system lea o lo o faaaogaina, e oo atu ai le tatou connection i tatou aoga. O lona uiga o le mea lava e tasi, i aoga o le SNBH o lo o faatino ai le connectivity, ia tatou aoga, falemai, aemaise lava services a le Malo i le taimi nei. O le SNBH i le taimi nei, e na o le taulaga lava i Apia, o lo o taamilo ai le cable lea po o le fiber lea a le Malo, lea na fausia i le taimi o le 2006 i le vaitau lena. E \$20 miliona sa faatino ai lea vaega.

E na o Apia o lo o i ai le cable, a oo loa ina ave i le connectivity i tua pe a oo i le connection o aoga i nuu i tua, ona faaoga loa lea o le wireless e connect ai ma aoga.

Lau Afioga i le Fofoga Fetalai, o i lea o lo o taoto ai le faaletonu i nisi o taimi. Ma e ao pea ona silasila i le seleni lena ua tuu i totonu i le tatou Tala o le tupe i lenei vaitau.

E pei ona opea i le Maota, o le agaga lena, ina ia faaleleia ia le fesootaiga aua auaunaga a le Malo i le tulaga tau tekonoosi.

E tasi le fesili e faatatau i le Falemeli. Lau Afioga i le Fofoga Fetalai, o lo o taoto i le Kapeneta, ma sa pasia i le Kapeneta talu ai, e faamoemoe ina ia faatutoatasi le Falemeli. Ma o lo o galulue ma taumafai ina ia toe tapena mai, faamaninoga atili, i lea vaega. O le fesili muamua sa ou fai i le pule o le Falemeli, o le a le tulaga o lo o i ai Niu Sila ma Ausetalia i mea tau Falemeli. O le tali mai lau afioga, o lo o operate as an SOE. Ma e aoga foi le ave i tua, peitai o lo o tulimatai pea. O so o se faiga lava, e i ai lava faafitauli.

O lea foi e pei ona silafia o le naunautaiga lea sa i ai, sa outsource, sa avatu i tua ina ia faaola tatou private sector. I le Tala o le tupe i lenei tausaga, o lea foi ua toe avatu ai le \$2 miliona e toe tau faaleleia atili ai le connectivity. O lona uiga e lelei le ave i tua, ae ao ona maioio ma puipuia lelei aseta a le Malo, ina ia faatumauiina le connectivity, aemaise lava lenei vaitau, e faamoemoe tatou uma i le ICT ma le Technology i lenei vaitau.

Lau Afioga e pei na o le pau lea o fesili sa afea ai lenei...Na iai le fesili lau Afioga e uiga i le...o le sui usufono mo Vaimauga Nu 1. I le tulaga o le screen o le internet. E faafetai i le sui usufono mo le faamanatu, o le faamanatu masani foi lea i le aufaigaluega ma le tulaga o lo o i ai. I le tapenaga a le Matagaluega, e faaauau ai le initiative la e taatia mai i le Kapeneta talu ai, le faatuina o le tatou sound seach, po o i latou ia, e mataituina ma silasila totoa, i le faaaogaina talafeagai o le internet. E pei ona tatou iloa aafiaga o lo o ua i ai i lenei vaitau. Aemaise lava i nisi o taimi pe a oo mai ia osofaiga, e ui mai i luga o tekonoosi i lenei vaitau, e ono aafia ai ia faamaumauga, aemaise fesootaiga e pei ona silafia, lau afioga ma le mamalu o le Palemene.

O nisi atinae, mo le... o le a oo i ai tala i se taimi mulimuli.

Ae o le faamoemoega o le Malo ma le Faigamalo le afioga i le Palemia ma le Kapeneta ma le Faigamalo lenei. E toe silasila le Malo i le ICT Infrastructure. O lea ua taoto le tatou cable i le vaitaimi o le Samoa Tel. Aepeitai na i ai le finagalo o le Malo, e faatau ese. A o lo o matauina le faaletonu pea o le connectivity ia tatou aoga. Aemaise foi o le connectivity i nisi o remote area o le tatou atunuu. Aemaise lava i le itu i Sisifo i Savaii, aemaise tua i Falealii ma le atu Aleipata.

O le isi lea vaega o le a toe silasila lelei i faiga faavae, ina ia mafai ona faamautuina ia le fesootaiga lea, aemaise lava o lo o aiga tatou i le lumanai, i le tulaga o le faaaogaina o tekonoosi.

Lau Afioga e pau ia o tulaga sa laga e nisi o finagalo o sui, ae le i agai atu i lou itumalo.

**FOFOGA FETALAI:** Malo faafetai, o le measili o lea ua folasia mai nisi o folasaga e pei ona laga e nisi o sui mamalu o le Maota. Ou te talitonu foi ua faamalieina uma le Maota i lau Matagaluega.

Tulai mai...

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, ou te tulai ma le faaaloalo...

**FOFOGA FETALAI:** Oi ia tulai mai

**Tofa Hon Fonotoe Lauofo Nuafesili Pierre Lauofo:** Tulai ma le faaaloalo ona e i ai nai mataupu e 2 sa ou afea ai ia le Ofisa o le Fono po o le tasi lea o portfolio a le Afioga i le Minisita ona ou te le o mautinoa, o lea ou te vaai atu ai i le pepa lea, pe sao au pe sese?

**Afioga Hon TOELUPE POUMULINUKU ONESEMO:** O lea lava lau Afioga.

**Tofa Hon Fonotoe Lauofo Nuafesili Pierre Lauofo:** Faafetai, e 2 nai mataupu lea sa ou talanoa e uiga i le Ofisa o le Fono. O le mataupu muamua o le tuueseina o le Ofisa o le Fono, Separation ona o lea e le o manino mai i le Tala o le Tupe pe na fai mai lava o le Separation ae le o mautinoa po o le a tonu le Separation lea. Faamolemole e fia maua ai se fesoasoani e fia malamalama.

Lua, o le Constitutional Review lea ou te vaai atu i le Matagaluega o le Ofisa o le Fono, lea sa ou talanoa ai ona o le galuega lea ou te vaai atu i ai e fai lava si tele o le galuega lea ma e le faigofie i lau lea vaavaai atu i ai. Aua o lea e pei e foliga mai e toe iloilo atoa le Tulafono Faavae ae le na o ni Teuteuga foi ia. O lona uiga e pei e aveave foi lenei galuega o lona taunuuga e toe ave i le atunuu e fai se referendum. Ou te le iloa i ai, aua ou te le o manino po o le a tonu le faamoemoe.

Ae ua mafua foi ona ou toe afea le mataupu lea lau Afioga i le Minisita, pe le o se mataupu lea e tatau ona tagofia e le tatou Law Reform Commission. O na e le o i ai ia le tatou Matagaluega lea, ia e faagaioi ai pe faagaioi e se Komiti Faapitoa po o le a le faiga e fai ai. E pei o nai mataupu ia na ou fia fesili ai.

Ia le school connectivity lau Afioga, o le poloketi lea e \$2 miliona. E faafesili atu lava po ua uma ona faamatu le konekarate lea i tua i se kamupani? Faafetai mo le avanoa.

**FOFOGA FETALAI:** Faafetai, o lea ua maua le finagalo.

**Tofa Lealailepule Rimoni Aiafi:** Lau Afioga i le Fofoga o le Fono...

**FOFOGA FETALAI:** Ia...

**Tofa Lealailepule Rimoni Aiafi:** Faafetai lava i lau Afioga i le Minisita mo le folasaga matagofie. E i ai lava i lau matau o le tele lava o le tupe faaopoopo i le connectivity lea... school connectivity. Ia o le uiga o lau faamatalaga, o le a ou fesili atu ai i lau Afioga, tagai i le Infrastructure, ua soo uma lava Samoa. E laitiiti lava se mea ua e afea e le maua, ia e te alu, oso mai fafo o lou fale ki mai ai lau telefoni. O la ua i ai le marine cable, SNBH, manatua o le SNBH o lea ua tuu i lalo o le CSL.

O le uiga o lau faamatalaga, afai o le a... na o matou taamilo i le taimi foi lea na.. i le tausaga lea na tea nei i le mea lea o le connectivity. O le mea o le initiative e tataua ona sau mai i le Ofisa o Aoga. O le mea lea ua manaomia e connect uma aoga, i tonufai. E pau lava le mea lea sa fai e tatou, o le provide o le Infrastructure. Ae o mea ia e connect i totonu o vasega ma totonu o aoga, o mea na o lou talitonuga o le Ofisa o Aoga ua leva ona fai e le o se mea fou ia le mea lea o le school net lea ua leva ona fai mai.

O le mea foi la sa o matou fesiligia, e ua leva la, afai o lea ua outou iloa o lea e tou te nonofo ae le tau mai e pau le mea a matou o le provide o le Infrastructure i mea o cable mai i luga o le main, ae o le aumaiga i totonu o le aoga ma mea na, o mea na a le Ofisa o Aoga ma Aoga taitasi aua e le faigofie le mea.

E le na o le tau o le provide ina o le Infrastructure, o le training, o technicians, o mea uma faapena e oo i aoga i Apia, e matua struggle uma i mea faapenei. Leaga e full time tagata e vaaia mea nei. Ae o le mea atoa lava ia link agai i le Ofisa o Aoga, o i ina e alu atu uma ai faatonuga o mea ma Curriculum ma le Content ma mea uma faapena. O le Ofisa o Aoga la o le initiative lea, o le initiative e sau mai i le Ofisa o Aoga, ina ia iloa lelei e latou le mea lea e alu i tua, aemaise i le content e ave i aoga, ma tulaga faapena.

Ae o le initiative e le o se mea fou ua leva ona fai, ae faafetai na pau le mea lea sa ou faapea, e tataua lava ona alu i lalo o le Paketi o le Ofisa o Aoga. E faatupe mai e latou, o ai lava le tagata o le a faia, ia le tulaga o le... ae afai o le SNBH, o le SNBH o lea ua i lalo o le CSL lona manage ina. Ia ma le faaaloalo lava.

**FOFOGA FETALAI:** Ia o lea ua maua atu, ia tulai mai lau Afioga i le Minisita e fai se tali faaiu o mataupu.

**Afioga Hon TOELUPE POUMULINUKU ONESEMO:** Faafetai i lau Afioga, manatu o le tali faaiu e pei ona saunoa lau Afioga. Faafetai mo le

faafesili a lau Afioga i le Sui Taitai, lau Afioga Lauofo e faamanatu mea foi ua misi i le...

Ia o le tulaga e pei ona e faafesili i le Separation, o le naunautaiga i le Afioga i le Palemia ina ia tuuvaevaese le Tafatolu e pei ona i ai. Atonu sa fesili foi le Afioga i le Minisita o Faamasinoga i le tulaga e pei ona saunoa le Afioga i le Minisita, e faapena foi la i le Legislative, ina ia maioio lava ia vaega ia e tolu. Manatu e le tau faamatalaina o lo o manino lau Afioga ma le mamalu o le Palemene ia lea vaega. Ma o le agaga moni lena lau Afioga i lea vaega e tapena ai i ni sailiiliga talafeagai, ia mo lea faamoemoe.

I le tulaga o le Constitutional Review, lau Afioga, e tulai mai ia le Faigamalo, o lo o taoto le seleni lea i lalo o le Faamasinoga, e toe iloilo ai ia le tatou Faavae. O lea na taoto mai ia faasee mai i lagatonu lea vaega, i lalo o le Palemene. Ma e i se taimi ia ona tilotilo lea i ai, ae o le tapenaga lea, ia mai i le Kapeneta talu ai, i le silasila a le Palemia ma le Faigamalo, e tele lona aoga. Ao o le maioioina ma le faatinoga o le galuega e faatino ia le vaega lea, atonu o se taimi ona tilotilo i ai, o lo o i ai ia tapenaga ua uma ona tapena e le Kapeneta talu ai, mo lea vaega lau Afioga.

I le... faafetai i le fesili a lau Afioga i le sui usufono o Faleata. Lau Afioga sa avea ma Minisita Lagolago o le tatou Matagaluega, malo le faamanatu, malo foi i galuega sa feagai ai.

Lau Afioga mo le SNBH, e ao lelei ia lea vaega. O le tulaga o lo o vaai nei i lalo o le tatou CSL. Ma e o le tilotilo a le Matagaluega, tele ia o le tupe lea e alu i le tatou CSL i tausaga uma. Ma e i le... e le tau faamatalaina lau Afioga i le Maota ma le... mai lava i le afuafuaina i le CSL i lona faatutoatasi mai i le Malo, tele ia o seleni e ave i ai. O lea o lo o ave ai i tausaga uma le afa miliona, toetiiti \$600,000 e ave e manage ai le tatou SNBH. E le gata i lena, o le tatou budget every year, e silia ma le miliona pe \$1.3 million o lo o avatu i tatou tele codes, e toe locate ai ia tatou masini ia o le SNBH, i luga o pou uma lava e 40 pou, ina ia avatu ai i tua ia le connection lea.

Lau Afioga i le... tele ia o issues e tutupu mai i le tulaga lea. O le mea lea na ou avea i ai le \$2 miliona lea, ina ia tapena ai nei ma le lumanai. O le isi fesili e le o faia ni tali i le tuuina atu i tua o mea nei, o tatou o lea na i ai le sui usufono sa... e pei lava o le sui usufono o le Vaimauga Nu.1. i le avanoa e ave ai ia le tatou service provider.

O le agaga lea e tatau ona i ai, Infrastructure a le Malo, a omai ia providers fou, e mafai ona o latou faaaogaina le mea lea. E tau atiae ai ma create ai ia avanoa faigaluega, mo nei ma le lumanai. O le tulaga lea e i ai lau Afioga i le Fofoga Fetalai, o le tatou cable, ia e 3 a tatou cable la ua i ai. O le mea lena e lagona pea i lenei vaitau le saunoaga a le Afioga i le sui usufono o Sagaga, big cable, laititi le usage lau Afioga.



O le mafuaaga lau Afioga, o le tau. E i ai le cable lea e sau mai i i Tutuila, e 3 cable. Manatua, o le Tui-Samoa, ma le ASH Cable. O lea e tatou te naunau uma e faaoga uma le tatou aemaise lava ia le cable lea o le Tui-Samoa i fesootaiga e agai ai i main o harp i tulaga o mea tau tekonoosi. Peitai lau Afioga, e fai lava si taugata.

O lo o faaoga e le TV, le tatou Digital TV le cable lea a le ASH, e tau feoloolo lona tau. Ia na ona faapena atu lau Afioga ona o lenei mataupu, e fai si maaleale lau Afioga. Ia se i i ai se taimi, ia ona faamalamalama atili lea i le Maota. Ia ae e pei ona na ona tali atu faapena lau Afioga ia le sui usufono o Faleata, e tusa o lona vaega.

**Tofa Lealailepule Rimoni Aiafi:** Lau Afioga i le Fofoga Fetalai...

**Afioga Hon TOELUPE POUMULINUKU ONESEMO:** Ia ona e pei ona e saunoa, se i faauma atu lau Afioga. Ia e pei ona e saunoa i le initiative o le... ia e sao lelei lau Afioga. O le Afioga i le Minisita o Aoga, o latou e aumaia le software. O le connection ma le Infrastructure, e provide e le Matagaluga o Fesootaiga. Peitai lau Afioga e pei lava ona ou amata, o le capacity o nai o tatou tagata faiaoga i tua. E latou te resolve ai issue taitasi ia.

O le faatonuga a lau Afioga ma le mamalu o le Maota, mo le silafia, na ou fai i le CSL, i se fautuaga talafeagai tapena le connectivity, tuu i ai ma le computer e tasi, ia ola. O le mea lea e tupu, e na ona o atu lava connect, ae e le maunoina pe o ola, ona o lea e faamoemoe e faatau e le aoga le computer. O le uiga la o le tala, e le mafai ona test le connectivity lea, pe a le o le galuga lea a le tatou vaega o lo o vaia le Infrastructure a le ICT.

O le mea la lona lau Afioga, ia o le tapenaga lona, ae sao lele lou finagalo, i le eseese. Ae o le vaega, e le mafai ona test le faamaoni o le matou foi matafaioi, pe a le o i ai se computer o ola i o i le aoga ma le agaga faaaloalo.

E i ai le mea na pau ia au lau Afioga i le tatou school connectivity lau Afioga, o le tali manino, ia o tala salatua lea fai mai na ou avea i le \$20 miliona le konekarate leai. E le i faia lea vaega, ma e tapena foi lava e tusa o Faiga Faavae e pei ona tapena e le Faigamalo ma le agaga faaaloalo.

**FOFOGA FETALAI:** Ou te iloa lea ua...

**Tofa Lealailepule Rimoni Aiafi:** Faafetai lava e leai lau Afioga...

**FOFOGA FETALAI:** Ou te iloa o lea ua folasia mai e le Minisita lea ua maua foi lou finagalo.

**Tofa Lealailepule Rimoni Aiafi:** Faafetai e tasi lava si mea lea lau Afioga i le Minisita. O le uiga o le... faafetai. E leai se isi o tatou e manao e tetee i ni mea lelei. O le mea e tataua ona fai ae pau le mea lea e fia talanoa atu ai, o le Infrastructure lava ia ua leva ona... o lea ua toe saunoa le Afioga i le Minisita. E oo i le SNBH, e underutilise ae ua leva ona tele mea e faaoga, ia ao le fesootaiga o le Ofisa o Aoga ma...

Ae o le mea lea e tau fai atu ai se faamatalaga faamolemole, leaga ne i te i ua tuuaia ia si vaega lea o le CSL lea na tau nei, o le mea sa tender lelei. Tender lelei le manage ina o le SNBH aua e faigata ona fai e le Malo tuu loa i tua, fai ato lava le Tender ona malo ai lea o si vaega lea o le CSL o le tau maualalo ma le tau talafeagai, e faatino ai e latou ia le galuega lea ne i te i ua... ae o lea e toe tilotilo i ai mo le agai i luma. Ia ma le faaloalo lava.

**FOFOGA FETALAI:** Malo, ia faafetai atonu o lea ua maua lelei ia le finagalo o le Minisita. Se i tulai mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai sa taua sa tapena e le Faigamalo lenei le tuueseeseina, o le mea moni e leai se mea faapena na faia. O le ala foi lena o lea e fesili atu ai pe o le a le mafuaaga? O le faaaliga lea e aumai e le moni.

O le vaega lona lua lau Afioga, o le mea lea e i ai le Palemene, e moni e separate ia le faiga o ana faaiuga, i le tulaga lea i iuga a le Fofoga Fetalai, i tofiga o tagata ae o isi mea, e sau sao lava mai o, v ia follow lava i rules a le PSC aemaise o le tulaga o totogi.

O le itu lea e taua o le faamatuu atu i tua, e taua tele le itu lena e faamatuu atu i tua i le maua lea o le expertise, ae o lea ou te maua atu e tauofo. Afai e tauofo, ua lelei. E le mafai lava ona nanaina i lalo ni mea. Afai e tender out ia ua lelei pe afai e tender out.

O le tulaga lea sa aumai, e tolu, o le mea moni e i ai faaletonu, le tulaga taua o le manatua. O le tatou lava cable o le Tui-Samoa. Ae o le tulaga i le Manatua, e toso mai ai ma isi atunuu i le tulaga e i ai ia Cook Island, Tahiti ma Fiti. E taugofie la ma tele le tatou seleni e maua mai ai, ae e i ai ia le faaletonu na tupu ai i i, i le connection lea ma Amerika Samoa, i isi foi kamupani na oso mai i totonu. O lea la sa ou manatu e i ai le Arbitration e fai, ona ua faalava ai foi i i isi afaipisinisi i le itu o le connect atu i le Hawaiian cable.

Ae o le mea na o matou sainia, e i ai ia Tahiti, Cook Islands, Samoa e connect atu foi ma isi ma Fiti. Sa faapea la e join in mai ma Amerika Samoa, ae te i ua sui. E na o le \$8 miliona le tupe semeamanu e totogi e latou. Aepeitai la ua talanoa ma le isi vaega lea, ua gauai loa i ai Amerika Samoa ma ua \$32 miliona le tupe ua aafia ai latou i le tau ua taugata. O

mea nei, sa faatalanoa lelei. E feoloolo lava le seleni a Samoa e maua mai ai.

O le Ash foi, na ala ona toe malosi, ona ua toe omai isi kamupani toe faafou le Ash semeamanu o le cable tuai na connect mai i Niu Sila e agai i luga i Hawaii, ia ua oo i le tulaga e faale-lelei ai, uma le life ua toe upgrade. O le tulaga na e taua tele ia fesootaiga nei sa fai, ia malamalama i ai.

Ae o lea ou te fia malamalama po o le a tonu lava ia le tutoatasi lea na faatulaga mai e le Justice. Po o le mea o le a pule lava latou i le tulaga o le seleni e faasoaina saoloto e latou. Ou te fia malamalama i le tulaga lea.

**FOFOGA FETALAI:** Ou te iloa o lea ua maua mai e lau Afioga i le Minisita, ia o se fautuaga foi a le toaina mo lau Matagaluega.

**Afioga Hon TOELUPE POUMULINUKU ONESEMO:** Faafetai i lau Afioga i le Taitai o lena Itu o le malu e tusa ai o le faafesili. Ia atonu o se taimi tali atu le Minisita o Faamasinoga i lea vaega o le tutoatasi o le Faamasinoga.

Ae e manatu o lo o... e eseese mea e lua lau Afioga e tusa o le Budget. E ese le Budget o lo o faaagaga mo le Separation o le Palemene. Ae o le Constitutional Review lea sa saunoa i ai sa fesili ai ia le Sui Taitai, ia o le Budget lea sa i lalo o le Ofisa o Faamasinoga. O lea ua manatu ia le Faigamalo e talafetaui lelei, e faatino i lalo o le Palemene le vaega lea, o le Constitutional Review.

O le mea la lea o galuega ma le faatinoina, ia atonu o lo o manino i lalo o Faiga Faavae, ia aua o le mea lea sa i ai i le Budget, sa amatamea ai lena Itu o le malu. Ia...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, e leai se mea faapena, se Constitutional Review. Ia aua o lea ua uma ia Tulafono ia sa pisapisao ai le atunuu, ae o le Teuteuga la o Tulafono uma, e i lalo o le Reform Commission lea e i ai ia le tatou Komisi lea o Fuataina.

O le ala lena o le fesili lea sa avatu...

**Afioga Hon Fiamē Naomi Mataafa:** Lau Afioga i le Fofoga Fetalai...

**Susuga Hon Tuilaepa Fatialofa Auelua Sailele Malielegaoi:** O le a toe fai foi lea mea, ae o lea e i ai ia le tatou Commission e lauilliliuina uma ia Tulafono

**FOFOGA FETALAI:** Tulai mai ia le Afioga i le Palemia, e malamalama ai foi lau Afioga i le Taitai o le Itu Agai. Se i saunoa mai lau Afioga i le Palemia.

**Afioga Hon Fiamē Naomi Mataafa:** Pe lelei lou fesoasoani atu i le mataupu lea o lo o laga mai i le Constitutional Review. O se tasi o anava a lenei vaega o le tapena mai, e le gata o le iloilo o Tulafono i se tulaga lautele e pei o lea e saunoa mai ai le Taitai o le Itu Agai, ae e i ai foi ia le manatu faapito, e ao foi ona amata ona fai se sailiiliga i le toe Iloilo o le tatou Tulafono Faavae.

Ma e pei o lea e maua foi i le saunoaga a le Sui Taitai o le Itu Agai, foi lea pei o lea e agai atu o le a toe talanoaina atoa i le atunuu pe a. E pei o Fono Faavae lea na amata mai ai ia le tatou Tulafono Faavae. A faapena o lena? Ia e lelei foi, ae o le mafaufauga lena o le tatou Faigamalo fou.

**FOFOGA FETALAI:** Ou te iloa la ua malamalama lea tulaga lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** O lea la ua ou malamalama, ae o le mea lea na ou alu atu ai, e sese lau faamatalaga lea na aumai. O lea ua faasao mai e Fiamē. Ia ae o lea la ua ou malamalama, o le tou lava toe review, o lona uiga la e mafua ona e tou te le fiafia i Tulafono ia e 3 lea na pasia e le Palemene lenei. Ia manino lelei ia mataupu ia, afai o lea, lea ua tali fesili ae le tataua ona faanimonimo faapea.

**Afioga Hon Fiamē Naomi Mataafa:** O le finagalo lava ia o le Taitai ia, ae o lea o le a 60 tausaga o le Tulafono Faavae, atonu foi ua talafeagai ia se tilotilo i se itu atoatoa aua e pei o le suiga lea e i ai, sui lea pito sui le isi pito, ia faapena ona fai, ae e ao ona maua se avanoa e nofo lelei ai ma silasila po o ai nisi e faatinoina ia lea faamoemoe. Pe toe fonoa ia le Fono Faavae? Ia pe fai foi e tatou o sui usufono. E leai se mea e afaina.

**FOFOGA FETALAI:** Ia o lea ua maua...ai ua malamalama lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** E na o le pau lava le mea, o lea ua ou malamalama. E pau lava le mea, o le faanimonimo mai faapea. Aua, ae o lea ua manino mai le aumaiga e Fiamē.

**FOFOGA FETALAI:** O lea ua saunoa le Taitai o le Malo.

**Afioga Hon Fiamē Naomi Mataafa:** Lau Afioga, e leai se faanimonimo, e pau lava le mea, malie ia le Afioga i le Taitai o le Itu Agai.

O matou lea ua nonofo i i, e fai e matou le tonu, o le faaaogaina o tupe, ia ma mea e ave i ai le faamuamua.

**Susuga Hon Tuilaepa Fatialofa Auelua Sailele Malielegaoi:** Leai o lea ou te agai i o. Sa tatau ona tuu i lalo o Fiamē.

**Afioga Hon Fiamē Naomi Mataafa:** O matou lea ua nonofo i i, e fai e matou le tonu, o le faaaogaina o tupe, ia ma mea e ave i ai le faamuamua.

**FOFOGA FETALAI:** Ia o le a toe aumai foi i o o lea ua tali le Palemia.

**Susuga Hon Tuilaepa Fatialofa Auelua Sailele Malielegaoi:** Sa tatau ona tuu i lalo o Fiamē.

**Afioga Hon Fiamē Naomi Mataafa:** Ia ma mea e ave i ai le faamuamua.

**FOFOGA FETALAI:** Faafetai o lea ua malamalama lea itu.

**Tofa Hon Olo Fiti Afoa Vaai:** Ia se i tau faamalamalama atu ia le isi faanimonimo lea sa amatamea mai ai ia le foi sa avea ma...

**Susuga Hon Tuilaepa Fatialofa Auelua Sailele Malielegaoi:** Ia lau Afioga i le Fofoga Fetalai, o le mea lea e pisa ai tatou.

**Tofa Hon Olo Fiti Afoa Vaai:** Sui Minisita o...

**Susuga Hon Tuilaepa Fatialofa Auelua Sailele Malielegaoi:** O lea ua uma ona ou fai atu o lea ua malamalama,

**Tofa Hon Olo Fiti Afoa Vaai:** Lau Afioga i le Fofoga Fetalai, ia ona o lea ua...

**Susuga Hon Tuilaepa Fatialofa Auelua Sailele Malielegaoi:** Ona o lea ua faauilavea i le isi faauilavea.

**Tofa Hon Olo Fiti Afoa Vaai:** Na ou matau, e ese le mataupu lea ou te agai atu ai ua uma ia laua mea ia na fai.

**FOFOGA FETALAI:** Ua uma le mataupu lea...

**Tofa Hon Olo Fiti Afoa Vaai:** E ese mataupu lena, o lea ou te toe agai atu i le broadband lea na ou faalogo atu, e pei se mea fou foi lea e amatamea mai ai le Matagaluega o Aoga.

Ae e silafia lelei lava e le Afioga ia Loau, sa avea ma Minisita, ua leva ona faataoto e le Ofisa o Aoga ia le tulaga o le broadband lea, i le intranet connection o lea ou te matauina. Leaga o lea ou te tau malamalama i le mataupu lea ona o matou sa i totonu o le Komiti a le Palemene, sa o matou asi. O la ua i ai TV sa tuu e fai ai ia fonotaga a aoga ma faiaoga.

Ae o le faalavelave, o lea la na saunoa i ai ia Leala. O lea na tuu atu i le CSL, ia le connection lea, e leai se mea o faia. O lona uiga, e tasi ia tupe gau a le Malo lea e ave i le CSL. O lona lua o lau faamatalaga, o lea foi e lisi e le broadband ia pou a le Digicel ma le Blusky. E \$4,000 i le masina, pe 51 ea pe 31 ia le aofaiga o pou, \$100,000+ le lisi i le masina lea. Ae leai ma se mea o ola i i le mea lea.

O le mea lea sa taumafai atu ai i aoga, e faaoga ia le intranet connection i le SNBH. Ae e fiafia lava latou i le internet connection. E leai la se mea fou o faia, ua leva ona faataatitia e Loau mea ia. O le mea la lea ou te fiafia ai ia Loau. Ae o le faalavelave, ua uma ona fai, ia ae toe nofonofo foi Loau ae le alu e follow up le mea lea na... ma le faaaloalo.

**FOFOGA FETALAI:** Ia, o lea ua malamalama atu ia... ia talitonu ia tulai maia lau Afioga i le Minisita e faauma mai...

**Tofa Lealailepule Rimoni Aiafi:** Lau Afioga i le Fofoga o le Fono e leai ona o lea ua tuuaia i le Afioga i le Minisita e leai se galuega a le CSL o faia. O le mea na lea e popole ai lau Afioga, leaga e le mafai ona tali mai le... aua o le mea e tatau ona fai, e tatau ona saunoa i ai le Afioga i le Minisita aua o lea lava sa i lalo o le... e lavea uma lava i mea e tatau ona fai.

E pei ona ou talanoa atu, e le ni mea fou nei mea, internet, intranet, commonnet, whatever. It's nothing new under the sun. E pau lava le mea, e le faapea e alu atu lava ia le MCIT alu lava tuu i totonu o le aoga tuu i totonu fai i le faiaoga e alu ifo... leai. O mea na a le Ofisa o Aoga. Ae o le SNBH ia mea uma, na o mea e fai ma tou location, e mafai ona talanoa le Digicel ma le Blusky o le mea e vaivai ai le Blusky tuu i luga o le pou a le Digicel, o le mea e vaivai ai le Digicel tuu i luga o le pou a le Blusky ave. Ia o le a technical tele lau talanoa.

**FOFOGA FETALAI:** Ia faafetai, o lea ua maua.

**Tofa Hon Olo Fiti Afoa Vaai:** E sao lelei lava Leala, nothing new, nothing works.

**FOFOGA FETALAI:** Tulai mai lau Afioga i le Minisita.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, ou te le iloa po o le a... o lea e ola le internet. O lea e tatou te faaogaina i aso uma. Ia ae o le mea lea e talanoa mai ai Olo, se ua atili confuse uma ai le lalolagi, o faafogafoga mai.

**FOFOGA FETALAI:** Ia lau Afioga i le Minisita, ia faauma maia lau saunoaga, o lea ua malamalama ia mea.

**Afioga Hon TOELUPE POU MULINUKU ONESEMO:** Faafetai i lau Afioga, o lea ua faalogologo ma le manino i nisi o finagalo, aemaise foi o le Afioga i le Taitai o le Itu Agai, ia i le faamoemoega e pei ona i ai. Ia saunoa manino foi le Afioga i le Palemia, ia le taotoga tonu o i ai lea vaega, ia ina ia silasila i itu ia mo le agai i luma.

Lau Afioga i le Fofoga Fetalai, e fia fai se faafetai i lo matou itumalo. Ae le i faamaea ia se naunautaiga o... ia e afe ane e faafetai le tapuaiga a si ou itumalo. Sa ou i le... e lagona lava le faatauvaavaa lau Afioga.

I le faaaloalo i le Afio o Alo o Fanene, Susuga i le Tuatagaloa o le Toasavili, o le ki o le Malo aemaise le Afioga ia Meleisea. Afifio Usoalii ma Lufilufi aemaise le Taulauniu, ae a Leilua ma le Toafa o Tamatane. Afio le Matua ia Fanene ma le mamalu i le Usoalii. Lufilufi ma le Toavalu o Taulauniu ae a lou Tapaau o le Tuisamoa ma Usoalii. Ae tainane le Afio o Tupuola ma Matautia, Tiavaasue aemaise le mamalu o Lufilufiga ma si o matou nuu i Matautu.

Ae a le Afio o Alaimoana, Taito ma Saleutiti, ae a le Afio o le Alii o Aiga lau Tofa Talauena. Afio Pulu o le Alo o Tuatagaloa, malii mai Tala o le Fale ma ona Manu, ia te oe ia Falealilimuli. Ae a le tootoo o le manino i lau Tofa Talooolemaagao. Le paia ia te oe le Uso na toto, mamalu i le Aiga Satalo e tausia le Paia o le Maota i Falefasa. Afio oe Fonoti, Afio Teo, o le Anavataua le mamalu i le Usoalii, ae a le alaalatai o le Tootoo o le Aava i lau Fetalaiga Maelopa Lavasa. Afifio le Manu o le tuasivi, fagota i tai e lua. Mamalu o le tou Toafa le lotoifale o le Manusamoa.

O lea ua outou tusiaa e avea ai le faatauvaavaa e fai ma outou sui usufono. E le faagaloina le aufaigaluega paia a le Atua. Susuga i le Toeaina Faatonu mamalu i so o se fata faitaulaga, ae a le pule na lua, saoa ma tamaitai, faletua ma tausii ma le malosi o le tatou itumalo. Ua outou filifilia Lufilufi e momoli le tofa a aiga aua le Palemene o Samoa.

E le mafai ona faamatalaina ia le taua o lau faatofalaiga Falealili aemaise ia lo tou manatu i le Sao Faapito ma le tatou nonofo ai i le Faleatua. E leitioa Malietoa Laauli momoo ta fia Falealili fua. Aisea? Ona o lau tautua toto, o lau tautua i tupu o Samoa ma le Tuiatua. Ae a lau aiga Salevalasi.

O lou Tapaau sa i le Kapeneta i le Afioga i le uluai Palemia o Samoa, le Afioga ia Mataafa Mulinuu II, Susuga i le Tuatagaloa Simaile. O lenei ua outou tusiaao e ala i le palota, mo le uluai nofoaiga a le Palemia tamaitai, le Afioga i le Sao Faapito. A lafalafa Tuna, le Afioga i le Tuiatua. O sou faatauva, o lau tatalo, e manuia ai.

Faafetai i sui tauva sa matou tausinio. Lau Afioga Aumua Isaia, malo i lou soifua auauna, malo le finau mo le tatou itumalo, faafetai mo mea uma. Lau Afioga Tupuola Tusa Misi, sa e auauna foi i le tofi o le tatou itumalo, malo. Teo Uuvalu ma lau Tofa Pinofoga aemaise lau tofa Lupeomanu Pelenato, malo finau. E iloa lo outou naunau e tautua lo tatou itumalo i le toatele o le tatou tausinioga. O upu lava a le atunuu, o au nei, a o oe taeao.

O si o matou nuu o Poutasi, e le faimea faapito ae fia taua i se tautalaga i lenei afiafi, e maualuga le faaaloalo a le Susuga ia Tuatagaloa Joe Annandale, le Too o le Savili, faafetai i le amanaia o sou faatauva, aemaise le tatalo a lau tofa ou te tauva i le tatou nuu, e avea ai au ma sui tauva mo le tatou nuu.

Lau Afioga Meleisea Malama lau Afioga i le Sao Aualuma, faafetai le lagolago. Afioga ia Meleisea Seti, lau Afioga i le Sao ua tuua le Malo, sa e taumulimuli i le faamoemoe o le sui usufono. Malo faafetai. Maua sou nofoaga mau i le lagi.

Le mamalu i le usoalii ma le tatou nuu, faafetai, faafetai tele. Le tapuaiga a ou matua faaleagaga, susuga i le Toeaina o le tatou Pulega, malo faafetai. Lau Susuga Letone Uili ma le faletua, faafetai tele, aemaise lau Susuga i le Tiakono ia Alosio Faalogo, malo faafetai tatalo mo le faamoemoe o la outou sui usufono. Faafetai foi i tupu ma ee, Tapaau o Falealili ae a tootoo e tausia alaalagafa, tama fanau uma a Falealili o lo o aitaumalele mai atunuu mamao, malo tautua i lo tatou itumalo, so o se auala. Ua silafia e le Atua lo outou afu liligi mo manuia o Falealili. Faamanuia le Atua.

Le mamalu o le aufaigaluega paia, Susuga i Toeaiina ia Taefu ma Leaana i Ausetalia ma le tatou Pulega, faafetai tele. Faafetai tatalo. Ia le susuga i le faatui o Satuala Uta, faafetai. Le Susuga i le Toeaina i le Toeaina ia Peseta Auvaa ma le faletua ia Aiga, malo faafetai.

E le galo le susuga i le Toeaina ia Enefatu ma Siolo, faafetai tele mo talosaga. Le Susuga i le Sea o lo o faafalelemalu i Vaivaseuta, faafetai. Aiga i Samoa nei, Niu Sila ma Ausetalia aemaise Amerika Samoa ma so o se tafa o lenei lalolagi, faafetai tele i la outou tatalo. Si ou aiga i ausetalia, tina malolo, uso ma tuafafine, faafetai tapuai, faafetai tatalo. Malo le onosai. O le mea moni, e le faigofie le polokiki.

Lau Afioga i le Fofoga Fetalai, e fia faaleo i totonu o lenei Palemene le finagalo faafetai o lenei itumalo i le Afioga i le Palemia, lau Afioga Fiaame Naomi Mataafa, lau Afioga i le Sao Faapito, o le Sao Papa o le Falenaoti, o lau Afioga lava i le Tuiatua. Faafetai mo le tofi Minisita, e faaaogaina ai le sui usufono mo Falealili ma lenei itumalo i lau uluai Kapeneta, ua avea ai



lau Afioga o le uluai Palemia Tamaitai o le Malo o Samoa. Malo faafetai i lau Afioga. E lagona e lenei itumalo le maofa pe a matau i le alofa taumulimuli o le Atua i lau Afioga. E le i faigofie lenei Paeaiga aemaise o lou tulai mai i le tofi Palemia, e molimauina e lenei itumalo lou faatuatua i le Atua. O le tofa a le tupu e le soona sii, ae o se taitai e matau i le Atua. E le tau selu atu lau Afioga i le Palemia talosia o le paia i le Aiga Salevalasi, le Aiga paia na mavae ai o tatou tuua. Leitioa faapale oe e le Atua. O lo o teu i lou loto le poloaiga a Ieremia, ia fai le amiotonu, ia naunau i le alofa, ma ia savavali ma lou Atua ma le loto mauualalo.

Faafetai i lau Afioga i le Saoalii, faafetai Olo, faafetai Leatinuu. O le faafetai faapitoa a lenei itumalo i lau Afioga Laaulialemalietoa mo le tapenaina o le faamoemoe mo Samoa. Malo faafetai e le faigofie le ala na tatou uia.

E faafetai lenei itumalo i lau Susuga Tuilaepa, malo faafetai i galuega lelei uma. E manatua ai lava le aso na ma o atu ai ma le TA mai Niu Sila e avatu i lau Afioga le plan o le tatou waterfront, o se lesona mo au. Sa e saunoa, a oo ina tatala malae taalo mo le fanau, ia pue i le TV ma ia faasalalau ia Samoa atoa.

Lau Afioga i le Fofoga Fetalai, o le aso lea na tatala tonu ai lava le malae taalo i le aso o le All Blacks. E le gata ua maimoa Samoa, ae maimoa le lalolagi le atinae. Lau Afioga i le Palemia, o le a se tautua faaleauau i lena vaitau, ou te faatoese atu. Lau Afioga i le Sui Taitai aemaise lau Afioga i le Papaliitele, malo faafetai. Sui usufono o lena itu o le Maota, ia manuia outou faiva.

Lau Afioga i le Ofisa Sili o Pulega lau Afioga Folau Tala Matafeo, faafetai mo galuega, faapea lau Afioga Gisa Lematua aemaise lau Afioga Tupai Tupe Malolo, faafetai mo galuega uma, ia tatou galulue faatasi e manuia ai Samoa. Ofisa Sili o Pulega o Matagaluega, malo galulue. I le tatou industry ICT tatou galulue faatasi mo le manuia o Samoa.

O le tatalo a Alaalagafa, la oulua nofo ma le Tauagaeseese, ia manuia le Palemene o Samoa. Soifua.

*Na faaalua le agaga fiafia o le Palemene i le patipati o latou aao i le maea ai o le Saunoaga Talifuaitau a le Afioga i le Minisita mo Fesootaiga ma Faamatalaga Tekonolosi.*

**FOFOGA FETALAI:** Ia, ua faamalo faafetai saunoa i lau Afioga i le Minisita mo Fesootaiga ma Faamatalaga Tekonolosi. Ou te talitonu o lea ua afulelea lava le saunoaga ma le tanoa, e le gata foi i tiute faa-Minisita, a o lea lava ua oo lau faafetai e le gata o le Maota nei, a o lou itumalo, aemaise foi le aufaigaluega ma le Taitai o le Itu Agai sa e galue ai foi i ia taimi. O le mea lea, malo faafetai ua faafofoga le Maota, o lea foi ua taunuu i taunuuga o le tatou faasologa o le tatou Malo. Malo lava faafetai.

E momoli atu le faafetai i lau Afioga i le Palemia ma le Kapeneta, o lea ua matau atu o lea ua maea tatou folasaga aua foi le talifuaitau i mea na laga i totonu o le tatou Maota. Ia, malo faafetai.

O lea ua maea ona talifuaitau le Malo e tusa ai o mataupu na laga e sui usufono i saunoaga faalauaitale i tulaga tau tupe ma le tamaoaiga o Samoa ma faiga faavae tau tupe a le Malo. Ua maea ona faatu le lafo ma ua faapea ona faaluaina mo le faitauga faalua o le Tulafono Tau Faaofi i le aso 14 o Setema 2021.

O lea o le a tuuina atu loa le fesili.

*Na tuuina atu le Fesili ma faamaonia ai le lafo na faatuina i le aso 14 o Setema, ma faitau faalua ai le Tulafono Tau Faaofi o le Faatatauina o Tupe 2020/2021.*

### **TULAFONO TAU FAAOFI O LE FAATATAUINA O TUPE 2021/2022 – iloiloga auiliili**

**FOFOGA FETALAI:** O le a sagai atu loa le Fono Aoa o le iloiloga auiliili o le Tulafono Tau Faaofi o le Faatatauina o Tupe 2021/2022 ma Tala Faataatu Autu o Tupe Maua ma Tupe Totogi a le Malo o Samoa mo le Tausaga Faaletupe Faaiiina aso 30 Iuni 2022.

E tusa ai ma Tulafono Tumau 134, e amata le iloiloga auiliili o le Tulafono Tau Faaofi i lona Faamatalaga.

### **FAAMATALAGA**

#### **VAEGATUPE MA TALA FAATATAU**

<b>MATAGALUEGA:</b>	<b>TUPE ALU FAATATAUINA</b>
<b>FAATOAGA</b>	<b>\$19,738,616.</b>

*Faamaonia.*

<b>PISINISI, ALAMANUIA: &amp; LEIPA</b>	<b>\$27,653,566.</b>
---	----------------------

*Faamaonia.*

**FESOOTAIG &  
FAAMATALAGA  
TEKONOLOSI**

**-\$11,183,482.**

*Faamaonia.*

**AOGA, TAALOGA:  
&AGANUU**

**-\$133,633,726.**

**Tofa LEALAILEPULE RIMONI AIAFI:** Lau Afioga i le Fofoga Fetalai...

**FOFOGA FETALAI:** Ia, tulai mai le sui usufono mo Faleata 3.

**Tofa LEALAILEPULE RIMONI AIAFI:** Faafetai lava. E lua nai vaega ia lau Afioga ona o lea e taua manino i le Tala o le Tupe le siitaga o totoi o faiaoga. A o lea ou te vaai atu, o lea ou te fiu e vaai po o fea tonu le vaegatupe lea ona e le tele se suiga o le tupe maua i le tausaga lenei ma le tausaga na tea nei. O le isi mea, o le vaega lea o le One Government School Grant, o lea ua faaitiitia i le pe a ma le \$300,000 i le \$400,000 mai le mea sa i ai e \$18 miliona i le tausaga na tea nei. Pe o le a le mafuaaga. Ma le faaaloalo lava.

**FOFOGA FETALAI:** Ia saunua mai le sui usufono mo Vaimauga 3.

**Afioga Hon TAPUNUU NIKO LEE HANG:** Lau Afioga i le Fofoga Fetalai, faafetai mo le avanoa. Leai na o le faafesili i le Output 2 lea i le galuega lagolago a le Minisita. E fia fesiligia le siitaga lea mai le \$172,000 i le \$301,000. Na o ona fia malamalama po o lea le mea ua ova i le 100% le siitaga lea. Ma le faaaloalo lava.

**FOFOGA FETALAI:** Faafetai. Tulai mai lau Afioga i le Minisita o Tupemo le faamalamalama o mea ia ua laga mai e sui usufono mamalu.

**Afioga Hon MULIPOLA ANAROSA ALE MOLIOO:** Lau Afioga i le Fofoga Fetalai, faamolemole lava e toe aumai le fesili faamolemole e le o maua lelei atu.

**Afioga Hon TAPUNUU NIKO LEE HANG:** Ia, o le fesili lau Afioga i le Minisita o le Output 2 lea e sau ai galuega lagolago i le Minisita. O le tupe faaagaaga i le Tala o le Tupe talu ai e \$172,000 a o lea ua siitia nei i le Tala o le Tupe fou e \$301,500. Na ona fia malamalama lau Afioga po o le a le siitaga tele lea ua mafua ai ona sii i luga lea tulaga faamolemole. Faafetai.

Ua maua mai lau Afioga?

**Afioga Hon MULIPOLA ANAROSA ALE MOLIOO:** Ia o lea lava e tau vaavaai tonu atu i totonu o le...

**FOFOGA FETALAI:** Po o fea tonu le itulau? Manaia si...

**Afioga Hon TAPUNUU NIKO LEE HANG:** O le Output 2 i le paketi.

**Tofa Hon OLO FITI AFOA VAAI:** Lau Afioga i le Fofoga Fetalai e tau fesoasoani atu ai i le vaega lea, ona e i ai le tulaga ma le faiga faavae fou sa faia i i le tulaga o le aufaigaluega a le Minisita. O lo o i ai policy advisors ia ua faaopoopo o le ala lena ua siitia ai ona o le tofogi o le tagata lena e faia fesoasoani i mea tau policies e fesoasoani ai i Afioga i Minisita faatasi ai foi i tulaga o Matagaluega. Ma le faaloalo.

**Afioga Hon TAPUNUU NIKO LEE HANG:** Lau Afioga i le Fofoga Fetalai, o la e sa ou fesiligia le Minisita o Tupe a o lea ua tali mai le Minisita o Galuega. O le mea la lea lau Afioga, o le taua ia o Komiti ia faa-Palemene semeamanu e faigofie lava ona fesiligia le Taitaifono aua o latou lea e malamalama lelei i le iloiloga. O la e malamalama lelei lava Olo aua sa i le Komiti Tupe foi. Ia, ae le afaina, leaga o lea ua tuai ona maua le... a o lea e fesoasoani mai lou uso ia Olo. Faafetai.

**FOFOGA FETALAI:** Ia, o lea la ua tali le fesili a Tapunuu.

**Susuga Hon TUILAIPA FATIALOFA AUJELUA SAILELE MALIELEGAOI:** Lau Afioga i le Fofoga Fetalai, o le vaegatupe lea ua fai lava sina tele tele, o isi taaloga sports development formally known as international national sports activities. O lea la sa \$50,000 a o lea ua \$500,000. Ou te fia malamalama po o le a le mea ua sui ai le igoa, a o le a foi le break down o le \$500,000 lea ua fai lava sina tele tele.

**FOFOGA FETALAI:** Ia, po o maua mai le...

**Afioga LEAANA RONNIE POSINI:** Lau Afioga i le Fofoga Fetalai...

**FOFOGA FETALAI:** Se i fesoasoani atu le... i le itulau...

**Tofa Hon LAUOFO FONOTOE NUAFESILI PIERRE LAUOFO:**  
Lau Afioga i le Fofoga Fetalai pe maua se avanoa...

**FOFOGA FETALAI:** E lelei lava le fai ma tau le itulau foi lele e faigofie ai le tatou... leaga ua fai foi si leva o le po.

**Susuga Hon TUILAEPA FATIALOFA AUELUA SAILELE MALIELEGAOI:** Faamolemole lau Afioga, o lea matou te talanoa atu i le Tala o le Tupe, e leai foi ni numera o itulau o i ai.

**Tofa Hon LAUOFO FONOTOE NUAFESILI PIERRE LAUOFO:**  
Lau Afioga i le Fofoga Fetalai ou te fia fesoasoani atu, o le Appropriation Bill itulau e 6 pe afai e tau maua ai se fesoasoani. O le itulau e 6 foi lea e agai atu ai le fesili faamolemole, o le tulaga lea o le One Government Grant lea e i ai ma le totogi o faiaoga, po o aofia ai ma totogi o faiaoga o aoga foi nei a Ekalesia.

**FOFOGA FETALAI:** Po ua maua mai le... o totogi foi lea o faiaoga po o aofia ai ma faiaoga a Ekalesia.

**Susuga Hon TUILAEPA FATIALOFA AUELUA SAILELE MALIELEGAOI:** Lau Afioga i le Fofoga Fetalai, e i ai le mea lea e tupu, o le mea lea sa fautuaina ai le Komiti o Tupe, afai e faigata ona maua, a pe a malie toe tuu atu se avanoa ae tolo le tatou Fono se i omai i le Aso Gafua. Aua o lona uiga e ao lava o tau sue mea ia.

**FOFOGA FETALAI:** Saunoa mai lau Afioga i le Palemia.

**Afioga Hon FIAME NAOMI MATAAFA:** Lau Afioga i le Fofoga Fetalai, tatou onosai ia toetiiti lava uma le tatou galuega. Ae manaia le auauai taitasi mai o mataupu ae faasoia mai e le Afioga i le Minisita le tali. O lea pei e feifoioiai o lea e saunoa mai le Sui Taitai i totogi. O lea ua tatou pasi atu ma aoga. Faapea lava au o lea ua fesili mai i le Ofisa o le Tupe.

**FOFOGA FETALAI:** Ia o le Ofisa o Aoga lea e i ai le...

**Susuga Hon TUILAEPA FATIALOFA AUELUA SAILELE MALIELEGAOI:** Ina ia manino lau fesili, o lea ou te fia malamalama po o le a le eseese o le sports development fund a o lea e tau mai, formally known as international national sports activities. O le a le mafuaaga o le

suiga ma le tulaga lea e i ai, e \$450,000 le sii. Ou te fia malamalama i le mafuaaga o le sii, a o le a foi le breakdown.

**FOFOGA FETALAI:** Ia, po o ua maua mai lau Afioga i le Minisita?

**Afioga Hon MULIPOLA ANAROSA ALE MOLIOO:** Ia, atonu mo le tali i le faafesili i le vaega lea na fesili mai i le tatou One Government Grant, e tusa ai ma vaega o lo o taua i le pepa faapipii o Aoga Amata, e 50% o lo o tamau ai vaegatupe e mafai ona faaaogaina mo totogi o faiaoga, ae 60% mo aoga a Ekalesia. O le faamoemoe mo le agai i luma o le siitia o nei pasene, pe tatala foi lona faaaogaina aua totogi mo faiaoga. O le fesili lea na agai mai totonu o le tatou One Government Grant.

**Tofa LEALAILEPULE RIMONI AIAFI:** Lau Afioga o le uiga o le fesili, o lea na saunoa le Afioga i le Minisita o Aoga, o lea ua faaopoopo le tai \$100 faaopoopo i luga i tamaiti aoga ia i aoga maualuluga. A fuafua la i ai, o lea sa \$18 miliona i le tausaga na tea nei a o lea ua pau i lalo, ua faaitiitia. O lona uiga ua faaitiitia tupe ua alu, ua allocate mo vaega ia, ae le o i foi lea e totogi mai ai tamaiti faiaoga. E pei o le mea lena lea na fia fesili atu ai faamolemole.

**Afioga LEAANA RONNIE POSINI:** Lau Afioga i le Fofoga Fetalai...

**FOFOGA FETALAI:** Se i onosai mai se i tau sue atu le tali o le mea lea. O lea se i tau faasolosolo a tatou mea ua leva le afiafi.

Ia...

**Afioga Hon MULIPOLA ANAROSA ALE MOLIOO:** Atonu i lona itulau 47 o lea e i ai le faafesili lea e agai i le fesoasoani i le atinae o asosi eseese o taaloga. E pei o lea e faasau le fesili, po o le a le mea ua siitia ai i le \$50,000 agai le \$500,000. Atonu o le siitaga e \$450,000, e pei e agai i le Sports Academy.

**Susuga Hon TUILAEPA FATIALOFA AUELUA SAILELE MALIELEGAOI:** O le a toe fesili atu la i le Sports Academy, aua e leai se tatou Sports Academy. O le a la le Sports Academy lea?

**Afioga Hon MULIPOLA ANAROSA ALE MOLIOO:** Ia, faafetai mo le faafesili. Atonu i totonu o le anavatau a le Vaega Faaupufai lena, o lo o tuu i ai nisi o vaega e atiae ai tatou taaloga. E pei o se vaegatupe lea o lea ua tuu i totonu mo lea foi fuafuaga.

**Afioga LEAANA RONNIE POSINI:** Lau Afioga i le Fofoga Fetalai...

**FOFOGA FETALAI:** O le a lau...

**Afioga LEAANA RONNIE POSINI:** Leai o lea ou te tau fesili i le mea lea e i ai le vaegatupe lea e i i o le lagolago i le Tala o le Tupe a le Vaega o Aoga, lea e \$4.6 miliona. A o lea ou te tau matau atu i suesuega i i, o le tausaga lea na tea nei, e \$6.5 miliona. O lea ou te tau vaai atu foi lele pei e tau tele le palasi i lalo o tupe ia faamolemole. Po o le a se mafuaaga.

**Afioga Hon MULIPOLA ANAROSA ALE MOLIOO:** Pe mafai lava ona tau mai le itulau faamolemole.

**Tofa Hon OLO FITI AFOA VAAI:** Lau Afioga po o le a le Output number o le mea lea e te manaomia lau Afioga.

**Afioga LEAANA RONNIE POSINI:** Se leaga o la e na ou fesili atu i o i le Minisita o Tupe a o lena ua e faalavelave mai lau susuga i le Minisita.

**Tofa Hon OLO FITI AFOA VAAI:** Lau Afioga o le galuega faifaatasi a le Kapeneta. A faapea e te le o silafia le Output number, ia, e sili ai le taatia.

**Afioga LEAANA RONNIE POSINI:** Leai o lea e manino lava i i, o lea e manino lava i i le... o le vaegatupe i luga o le tala o le tupe.

**Tofa Hon OLO FITI AFOA VAAI:** E matou te tali atu i le Output number o lena e te fesiligia po o le a tonu.

**FOFOGA FETALAI:** Ia o la e ua maua mai.

**Afioga Hon MULIPOLA ANAROSA ALE MOLIOO:** Lau Afioga i le Fofoga Fetalai, o lea ua tuuina mai, o le education support programme, o la e faatupe mai e Niu Sila ma Ausetalia.

*Faamaonia le -\$133,633,726 mo Aoga, Taaloga ma Aganuu.*

**TUPE:** **\$101,485,066.**

**FOFOGA FETALAI:** Ia, tulai mai le sui usufono mo Vaimauga 3.

**Afioga Hon TAPUNUU NIKO LEE HANG:** Lau Afioga i le Fofoga Fetalai, o lea la o le a ou fesili sao lava i le Afioga i le Minisita i le mea lea sa tali mai ai Olo, o le Output 2 Page 62. O lea foi la e siitia le tulaga o le personnel i i, e 100% le siitaga. O lea na ou fia malamalama i le Afioga i le Minisita, po o a la tagata faigaluega ia ua siitia ai le tupe faaalu lea mai le \$102,852 i le \$244,971. O maua mai lau Afioga. Output 2 Page 62.

**FOFOGA FETALAI:** Ia, fesoasoani atu tatou le aufaigaluega i o i le Minisita leaga ua fai si mafiafia tele o le tusi, ae leaga ua leva foi le afiafi. Po ua maua mai?

**Afioga Hon MULIPOLA ANAROSA ALE MOLIOO:** Lau Afioga i le Fofoga Fetalai, ia, o le siitaga ia o tagata faigaluega a le Minisita, o lo o... ia manatua foi le Matagaluega lenei o Tupe, e matua manaomia se limataumatau o le tamaitai Minisita o Tupe, ona o i lea e tufa i ai le tamaoaiga. Ma e le gata i lea, e tele ina Taitaifono le Minisita o Tupe i le tele o Board, e matua manaomia ai se limataumatau e faigofie ai mo faaiuga fai foi, aemaise foi o le faatinoga o fonotaga.

O le siitaga la, ia, o le Failautusi o lo o i ai lona poto faapitoa i mea tau tupe ma mea tau analysis. Ma le faaaloalo.

**FOFOGA FETALAI:** Ia, o lea ua manino.

**Afioga Hon TAPUNUU NIKO LEE HANG:** Lau Afioga i le Fofoga Fetalai...

**FOFOGA FETALAI:** O le mea lava lea po o se isi mea?

**Afioga Hon TAPUNUU NIKO LEE HANG:** Leai na o le fia faamalamalama atili lava o le tulaga lea.

**FOFOGA FETALAI:** Ia, leaga o la e ua tali le Minisita, ma o le tali faaiu foi lena e leai se isi toe faafesili.

**Afioga Hon TAPUNUU NIKO LEE HANG:** E lua ou avanoa faamolemole.

**FOFOGA FETALAI:** I le mea lava lea e tasi?

**Afioga Hon TAPUNUU NIKO LEE HANG:** Ia so o se mea lava.

**FOFOGA FETALAI:** Ia saunoa ia pe afai e lapoa lena avanoa.



**Afioga Hon TAPUNUU NIKO LEE HANG:** Leai o lea e saunoa mai le Afioga i le Minisita o le tele o mea ia e Taitaifono ai. E faapena foi le mea sa Taitaifono ai le Minisita talu ai, e tele faalapotopotoga, a o le siitaga lea ua fai lava sina maualuga. Ia o lau fesili lena, ae faafetai o le a talia lea tali.

**FOFOGA FETALAI:** Ia, atonu o lea ua manino, o lea foi ua manino le folasaga a le Minisita.

*Faamaonia le \$101,485,066 mo Tupe.*

**SOIFUA MALOLOINA**

**\$135,380,838.**

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai pe maua se avanoa...

**FOFOGA FETALAI:** Tulai mai Lauofo.

**Tofa Hon LAUOFO FONOTOE NUAFESILI PIERRE LAUOFO:** O i i le tulaga lea o returning graduates lea pei e faaagaaga i ai le \$2 miliona faamolemole.

**FOFOGA FETALAI:** Tau le itulau.

**Tofa Hon LAUOFO FONOTOE NUAFESILI PIERRE LAUOFO:** A la e silafia lava e le Minisita le faasologa, aua la e sosolo lava i luga... O le Appropriation Bill page 10, o le 74 i le Tusi lapoa lea. A e follow i le tusi lea, silasila mai foi la, a e follow i le tatou Budget lea, e faigofie lava aua o lea e sau ai Outputs ma isi mea. I le Appropriation Bill.

**FOFOGA FETALAI:** O le a le itulau?

**Tofa Hon LAUOFO FONOTOE NUAFESILI PIERRE LAUOFO:** O le itulau 74...

**Tofa Hon OLO FITI AFOA VAAI:** Lau Afioga i le Fofoga Fetalai, se leaga o la e le o sao mai le... Talanoa mai i outputs ia pei o tatou Tulafono ma mea e masani ai.

**Tofa Hon LAUOFO FONOTOE NUAFESILI PIERRE LAUOFO:** Olo, e leai ni outputs i mea ia ou te talanoa atu ai, mo mea o transactions below the state. E te malamalama?

**Tofa Hon OLO FITI AFOA VAAI:** E te faasolo mai lava i lalo e te sau lava i le output lena sau i le mea lena e te saunoa mai ai.

**Tofa Hon LAUOFO FONOTOE NUA FESILI PIERRE LAUOFO:** Ia, o outputs ia i luga a o transactions below the state, e leai ni output numbers.

**Tofa Hon OLO FITI AFOA VAAI:** Aua tou te taumafai e faanenefu mai o lea e fou foi le Minisita o Tupe. Onosai mai la se i tau faauma atu lau fesili leaga o lea na taua le returning graduates e \$2 miliona e fia malamalama faamolemole pe fia ni tatou fomai pasi faauuina o lea ua fuafua e foi mai e faaoga i ai le tupe lea ua faaoga e \$2 miliona, alii ma tamaitai fomai ia o lea ou te vaai atu o lo o aafia ai foi ma le au tausisoifua.

O le fesili la ou te fia malamalama ai, ona o lea ou te vaai atu e tele le vaegatupe e \$2 miliona. O lalo o le transactions on behalf of the state. E leai ni output numbers.

**Tofa LEALAI PULE RIMONI AIAFI:** Lau Afioga i le Fofoga Fetalai...

**FOFOGA FETALAI:** Se i onosai mai se i tau fai faasolosolo a tatou mea. Aua le popole e le i taitai se mea.

**Tofa Hon OLO FITI AFOA VAAI:** Ia, o lea la ua ou malamalama atu, o le Output 21 lena e te talanoa mai ai.

**FOFOGA FETALAI:** Ia, fesoasoani ifo le tatou aufaigaluega i le itulau o le mea lena... Ua i ai?

**Afioga Hon TAPUNUU NIKO LEE HANG:** Lau Afioga o le Page 110.

**FOFOGA FETALAI:** Lau Afioga i le Minisita Lagolago se i fesoasoani ane. Ia...

**Afioga Hon TUALA TEVAGA IOSEFO PONIFASIO:** E fia maua se avanoa lau Afioga i le Fofoga Fetalai.

**FOFOGA FETALAI:** Ia tulai mai le Sui Palemia.

**Afioga Hon TUALA TEVAGA IOSEFO PONIFASIO:** E faamalulu atu i lou tulai, ae talitonu le taofi o se mea faigofie tele pe a tatou savavali i le tulaga i le taiala o lo o faataoto ai nei le tatou tupe. O lea e foliga mai o

la e talanoa mai le itu le la i le Tala o le Tupe i le itu faapapalagi, le faa-Peretania lau Afioga. E i ai isi o matou, o lea matou te agai i le faa-Samoa. E pei o le mafuaaga lena e ala ai ona i ai le feeseeseaiga. E ese le faigofie pe a tatou talanoa mai i le Tala Faatatau o le Tupe i le Gagana Samoa. So, we can all be in the same page. Ma le faaaloalo lava lau Afioga.

**Afioga Hon TAPUNUU NIKO LEE HANG:** O se mea e fia faasao lau Afioga.

**FOFOGA FETALAI:** Se i onosai mai la se i tali le fesili a Lauofo faamolemole.

Ia tulai mai lau Afioga i le Minisita.

**Afioga Hon MULIPOLA ANAROSA ALE MOLIOO:** Lau Afioga i le Fofoga Fetalai, atonu o le \$2 miliona lea o lea o lo o faailoa mai, o totogi ia o tagata muamua, first year general salaries before they move to specialize area. So o totogi ia mo vaega ia lea e i ai le tatou \$2 miliona lea.

**Tofa Hon LAUOFO FONOTOE NUAFESILI PIERRE LAUOFO:** O le fesili lava e fia malamalama, ona o lea e lua ou avanoa i lalo o le Tulafono Tumau faamolemole lau Afioga.

**FOFOGA FETALAI:** Ia saunoa mai.

**Tofa Hon LAUOFO FONOTOE NUAFESILI PIERRE LAUOFO:** Ona o lea e aumai mo returning graduates. O le vaega la lea o lea ou te faitauina e au ma faauigaina, e pei o ni vaega foi ia faauu o lea ua foi mai. A o lea e pei e te talanoa mai i le sii o totogi po o a ea.

**Afioga Hon MULIPOLA ANAROSA ALE MOLIOO:** Leai, o lea lava e sau i i, o le totogi amata mo fomai e iu mai fafo.

**FOFOGA FETALAI:** Ia, vaai la i le faigofie, o lea lava e malamalama le Afioga i le Sui Taitai.

**Afioga Hon TAPUNUU NIKO LEE HANG:** Lau Afioga i le Fofoga Fetalai, na o se mea e fia faasao i le saunoaga a le Sui Palemia. O lea matou te talanoa atu i le Faa-Samoa. O lea foi ou te tulai atu e faasino outputs ma mea ia, leaga o lea e faapea o lea matou te... Matou te le talanoa i ni mea faapapalagi leaga o matou o Samoa. Ma lou faaaloalo lava.

**FOFOGA FETALAI:** Ia, tulai mai le sui usufono mo Anoamaa 1.

**Afioga ALAIASA MOEFAAUOUO MALAGAITUTOGIAI SEPULONA MOANANU:** Lau Afioga i le Fofoga Fetalai pe maua se avanoa?

**FOFOGA FETALAI:** Ia, o se page mauagofie?

**Afioga ALAIASA MOEFAAUOUO MALAGAITUTOGIAI SEPULONA MOANANU:** Ia, o lea lava tatou te i le falemai. O le page 110 lea e i ai le \$1,200,000, e pei e foliga mai o mea tau maintenance. Ia ma lalo ifo, lena e i ai ma le isi vilava e fufulu ai le fale. E pei ua ou vaai atu, ae leai ni mea na faia i le Tala o le Tupe talu ai. E pei o le mea lea e fia maua ai. Po o le a le mea ua sii maualuga ai, po ua i ai ni konekarate faapitoa mai fafo mo le faiga o ia mea. Ia, ma le agaga faaloalo lau Afioga.

**FOFOGA FETALAI:** Ou te iloa o lea ua fai le folasaga a le Minisita mo le Soifua Maloloina, ou te iloa o lea ua siitia i luga le tapenaga ma le teuteuga o tatou falemai. A lau Afioga i le Minisita mo le Soifua Maloloina? Leaga o lea na fai lau folasaga mo le maintenance o tatou falemai po o le uiga lea o le vaegatupe lea?

**Afioga Hon VALASI LUAPITOFANUA TOOGAMAGA TAFITO SELESELE:** O le mea tonu lava lea lau Afioga, o lea ua outsource uma le tele o mea.

**FOFOGA FETALAI:** Lea ua ala ai ona faapoopo mea ia mo le manuia lautele o le falemai, lea ua e asiasi ia Samoa atoa. Ou te talitonu o le tulaga lena.

**Afioga Hon VALASI LUAPITOFANUA TOOGAMAGA TAFITO SELESELE:** O lea lava lena, masalo o la e silafia lelei lava e le sui usufono.

**Susuga Hon TUILAEPFA FATIALOFA AUELUA SAILELE MALIELEGAOI:** Lau Afioga i le Fofoga Fetalai, o le vaegatupe lea i i i le 110, lea ua faaitiitia mai le \$5,700,000 i le \$3,949,000. E ova i le \$2 miliona le eseese lea ua faaitiitia le vaegatupe, ae agai i le faaitiitia o faamai le pipisi. A o le mea tonu lea o lea sa aumai i le tatou talanoaga foi lea e agai i le faaitiitia o faamai. A o le a le mafuaaga o le soona faaitiitia o lenei tupe tele, lea sa \$5,700,000 i le tausaga na tea nei, a o lea ua matua pau lava i lalo i le \$3,949,000.

**FOFOGA FETALAI:** Lau Afioga i le Minisita o Falemai po o le mea ua o i lalo falemai ia ua le toe o i luga a o la e ua o i lalo? Lau Afioga ma lau asiasiga lau Afioga i le Minisita o le Falemai. Ia, tulai mai lau Afioga i le Minisita aua o le Kapeneta lea e...

**Tofa Hon OLO FITI AFOA VAAI:** Lau Afioga i le Fofoga Fetalai, ia manatua foi o le Budget lea o le Budget o le 9 masina, ae na tele lava la le seleni sa faatino mai masina ia i le tausaga na tea nei, ia o lea foi ua faaititia mea e fuafua atu i isi foi polokalame ia o le faasolo atu i le isi 9 masina lea e mulimuli mai.

**Susuga Hon TUILAIPA FATIALOFA AUELUA SAILELE MALIELEGAOI:** Lau Afioga i le Fofoga Fetalai, na pau lava lea o le Minisita ou te le talitonu i ai. A o lea ua taumafai e pepelo mai matou i le faamatalaga.

**Afioga Hon TAPUNUU NIKO LEE HANG:** Lau Afioga i le Fofoga Fetalai...

**Afioga Hon OLO FITI AFOA VAAI:** Lau Afioga i le Fofoga Fetalai, o le faa-4 ai le la ona tulai le sui usufono le la.

**Afioga Hon TAPUNUU NIKO LEE HANG:** Ou te fia faasaoa le saunoaga a le Minisita, o le paketi o le 12 masina e le o se paketi o se 9 masina faamolemole.

**Tofa LEALAILEPULE RIMONI AIAFI:** Lau Afioga faamolemole ua leva lava ona ota tu atu. E taua lava le fesili laiititi lea faamolemole.

**FOFOGA FETALAI:** Ia, le sui usufono mo Faleata 3.

**Tofa LEALAILEPULE RIMONI AIAFI:** O le mea lea e fia fesili ai lau Afioga, o au o le tausaga na tea nei o le tele lava o taimi ou te i le falemai sa gasegase si ou tina. A o lau vaai i ai i le falemai i le taimi lea, e lelei tele le faamamaina e nai tagata na i ai, i lou talitonuga lea i le taimi lea sa i ai le Minisita lea. Ou te iloa foi e tele le taumafaiga a le Minisita iinei. Ae o le matua tele lava o le siitaga o le tupe lea ua toe tuu i lalo, ua ova i le miliona le tupe lea ua toe alu i le kiligiiga.

O le isi mea, o lona uiga o lea o le a toe tuu i tua ma security ma le moaga o le vao, a o lea sa i ai tagata faigaluega a le falemai sa faia foi lea tiute i lea taimi. Ae o lea lava ou te talitonu o lea sa lelei faatino uma ia mea. Tatou te tilotilo lava i ia mea, outsource aumai totonu, outsource... afai la e...

**FOFOGA FETALAI:** Ia ua maua atu. Tulai mai lau Afioga i le Palemia. E i ai se mea sa fia tulai mai ai lau Afioga i le Palemia? Oi ia, ou te iloa lava o la e ua aumai le fautuaga a le sui usufono mamalu. Ia saunoa mai le Minisita.

**Tofa Hon OLO FITI AFOA VAAI:** Lau Afioga i le Fofoga Fetalai, o le a ou tali atu pea i le mea lea e fesiligia e Leala. O le tulaga lea o le siitia o le vaega lea o maintenance, aua o cleaners. Ou te talitonu o le faiga faavae fou lea ma le fuafuaga lea a outou sa fai, lea la ua matou o atu loa matou follow ai. O le outsource lea pei ona saunoa le Minisita o le Soifua Maloloina, lea la ua tuu atu i tua i le private sector e latou te nafa ma lea galuega. Ia ma le faaaloalo.

**Tofa LEALAILEPULE RIMONI AIAFI:** Lau Afioga, e leai ma se mea... O le avanoa lona lua lea lau Afioga. A e tago e outsource se mea, e tatau ona e tilotilo i le tau, e pau ifo la le tau ae sili atu le auunaga i le mea lea e i ai. Ae afai o lea ua outsource... afai o lea e lelei le faatinoga o le galuega i le \$800,000, ae nofo outsource i tua i le \$2 miliona ma ona tupu, o le a la le justification o ia mea?

E le gata i lea, ou te iloaina o lea sa... nai tagata faigaluega la ia e i i a le security ma tagata moavao. O lona uiga o le a leai ni galuega? Aua o le mea sa fai muamua e le tatou Malo, e toe re-hire tagata nei pe omai lava latou e toe faigaluega. Aua lona uiga la a faaalu loa i tua, ua otomeki lava le leai o ni galuega a nai tagata ia.

**FOFOGA FETALAI:** Ia o lea o le a tulai mai le Minisita e tali le mea lena ua e... ia saunoa lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Mo lou silafia le sui usufono mamalu, talu lava ona ou alu atu ma ou alu ou vaai i le falemai, sa ou maua sa galulue ai lava tagata o le falemai i le faiga o galuega ia, ae tusa o le 2 masina ae le i tu atu le Malo fou. O le mea lea o lea o le a tau atu, ae o atu matou ua outsource. O lea ua fai konekarate, e oo foi i kiligi fou la e i ai nei, e le i atoa se 3 masina. O le mea lea e taua tele lau fesili, ma o le tali foi lena i lau afioga. E mafai ona e suesue i ai i le tala lea, e le i i ai ma ni tagata faigaluega na matou avea i totonu talu ona ou tulai atu. O le tulaga foi i ni out source, e tau atu e pei ona o le agaga lea.

**Tofa LEALAILEPULE RIMONI AIAFI:** Lau Afioga...

**FOFOGA FETALAI:** Ua uma lou avanoa

**Tofa LEALAILEPULE RIMONI AIAFI:** A na tali mai analeila le afioga i le Minisita, ua leva ona uma, ae ou te le iloa po o le a le mea e tali mai ai fua Olo ma le faalavelave.

*Faamaonia le \$135,380,838 mo le Soifua Maloloina.*

**FAAMASINOGA &  
PULEGA TAU FAAMASINOGA**

**\$16,667,214.**

**Tofa Hon LAUOFO FONOTOE NUAFESILI PIERRE LAUOFO:** O le fesili faamolemole lau Afioga i le Minisita o Tupe. O le tatou fale faamasino la e i Savaii, o lea sa faaoga i ai le \$500,000 i le tausaga na tea nei, a o lea ua \$2 miliona lea ua tuu i ai i le tausaga lenei. O le a se faapupula o lea tulaga, o le a le eseesea. O le a le mafuaaga.

**Susuga Hon MULIPOLA ANAROSA ALE MOLIOO:** Lau Afioga i le Fofoga Fetalai, atonu o le fesili a le sui usufono, po o le a le \$2 miliona lea. O le fausiaina lea o le fale faamasino fou i Savaii. O le taimi lenei o la e i Tuasivi, a o lea o e a me i mai i Salelologa. Ma le faaaloalo.

**Tofa Hon LAUOFO FONOTOE NUAFESILI PIERRE LAUOFO:** O la e malamalama le tulaga lena, a o le fesili, o lea sa faaoga i ai le \$500,000 mo le fausiaina o le Fale faamasino i Savaii, o lea ou te malamalama o la e i Tuasivi. A o le tausaga lenei, o lea o le a faaopoopo i ai ma le \$2 miliona. Pe i ai se isi fale faamasino e toe faaopoopo, pe o le a le faaogaina o le \$2 miliona faaopoopo lea faamolemole.

**Susuga Hon MULIPOLA ANAROSA ALE MOLIOO:** E saolele lava le saunoaga, i le \$500,000 o le taimi lea na faatinoina ai le tatou tender, ma faatino ai le evaluation, o lea e i ai le vaegatupe muamua lea e \$500,000. Ae \$2 miliona lea ua uma ona faaagaga mo le fausiaina o le tatou fale lea. Ma le faaaloalo.

*Faamaonia le \$16,667,214 mo Faamasinoga & Pulega Tau Faamasinoga.*

**PUNAOA FAALENATURA  
MA SIOSIOMAGA**

**\$25,867,242.**

**Susuga Hon TAPUNUU NIKO LEE HANG:** Faafetai mo le avanoa, na o le faafesili i le Minisita, o le Output 2, page 124. O le fesili e auala atu i lau afioga, o lea ua matauina ua leai ni tupe faaagaga i galuega lagolago a le Minisita, e tau mai i i, ua leai se Minisita o le Natural Resources. O le fesili lena faamolemole. Pe faigaluega fua e le totogia.

**Afioga FUAAVA SULUIMALO AMATAGA:** Lau afioga mo le faasaoina o le taimi o le Minisita, i le tusi faa-Samoa i le itulau e 147 faamolemole. O lea e i ai tau o fanua i lalo o faiga faavae a le Malo. E pau lava si faafesili o lea ua pau i lalo i le \$2 miliona ae sa \$4 miliona i le tausaga talu ai. Pe i ai se mafuaaga faamolemole.

**FOFOGA FETALAI:** O le a le itulau?

**Afioga FUAAVA SULUIMALO AMATAGA:** O le 147 o le faa-Samoa.

**Susuga Hon MULIPOLA ANAROSA ALE MOLIOO:** Lau Afioga i le Fofoga Fetalai, atonu o lea o le a tali atu i le fesili muamua lea. I galuega lagolago po o tagata faigaluega a le Minisita. O le taimi lenei o lo o vaai e le Afioga i le Palemia le Matagaluega lea.

**FOFOGA FETALAI:** Toe tasi le fesili.

**Afioga FUAAVA SULUIMALO AMATAGA:** O le tau o fanua i lalo o le faiga faavae a le Malo. O le itulau 147 faa-Samoa. Sa \$4 miliona a o lea ua toe \$2 miliona. E i ai se mafuaaga?

**Susuga Hon MULIPOLA ANAROSA ALE MOLIOO:** O lona uiga ua pau i lalo.

**Afioga Hon FIAME NAOMI MATAAFA:** Lau Afioga ou te fia fesoasoani atu, e pei o le eseesega e i ai nisi o fanua sa faatauina i le tala o le tupe talu ai. O le tupe masani lava ia e faaagaga i tausaga taitasi e \$2 miliona, atonu o la e manatua e le afioga i le sui a o i ai i le Matagaluega. Ae ona sa i ai isi fanua faaopoopo, lea e i ai le eseesega lea o le tupe. A o lea ua toe foi mai lava i le \$2 miliona.

*Faamaonia le \$25,867,242 mo Punaoa Faalenatura ma Siosiomaga.*

**LEOLEO**

**\$48,173,906**



**Susuga Hon TUILAEPa FATIALOFA AUeLUa SAILELE MALIELEGAOI:** Lau Afioga i le Fofoga Fetalai, silasila ane lava i lalo o le vaega lea e tau mai ai le fomai e \$100,000 ae sa leai se mea i lalo o le tausaga talu ai. O lea lea mea? E faapea foi i taumafa, bulk food for prisoner, e \$45.... matua tele lenei mea, ae leai se mea i le tausaga lea na tea nei. O lona uiga, o la e tele ina taumamafa latou ia latou faatoaga ma mea la e maua ai. O le a le mea ua tele ai faapea lea mea. E lua vaega na sa ou fesili atu ai.

**FOFOGA FETALAI:** O le Toefuataina lea e te talanoa i ai lau Afioga i le Taitai. O le tatou falepuipui pe i ai se mafuaaga ua....

**Susuga Hon MULIPOLA ANAROSA ALE MOLIOO:** Lau Afioga i le Fofoga Fetalai, o lea e musumusu mai le Minisita o Leoleo, o le fomai mo le falepuipui, medical doctor e siaki ai mai o pagota.

**Susuga Hon TUILAEPa FATIALOFA AUeLUa SAILELE MALIELEGAOI:** E le i maea mai lau fesili e lua lea na alu atu. Aisea ua \$450,000 ia mea tau taumafa ae lea sa leai se mea i le 2020?

**Susuga Hon MULIPOLA ANAROSA ALE MOLIOO:** O lea e musumusu mai lou sui a Minisita o tupe, o lea faatoa transfer mai le falepuipui i lalo o le Matagaluega a Leoleo.

**Afioga Hon TAPUNUU NIKO LEE HANG:** Lau Afioga i le Fofoga Fetalai, e fia faafesili atu lava i le Output 7, page 163, e foliga mai o se branch fou a le Matagaluega o Leoleo. Lea e ave i ai le \$5.349 miliona, tuufaatasi ma isi mea \$6,504,000. E fia malamalama po o le a lea pulega fou i totonu o le Matagaluega a Leoleo.

**Susuga Hon MULIPOLA ANAROSA ALE MOLIOO:** Lau Afioga i le Fofoga Fetalai, o le totogi lea...e manatua foi o lea faatoa transfer mai le falepuipui i lalo o le Matagaluega a Leoleo, o lea e i ai uma totogi ia o tagata faigaluega.

*Faamaonia le \$48,173,906 mo Leoleo.*

**PALEMIA**

**\$10,145,941**

**Tofa LEALAILEPULE RIMONI AIAFI:** Ou te fia fesili atu lava i le aotelega o le tupe, Output mulimuli. Ona o le tupe lea sa i ai i le tausaga

lea na tea nei, e \$8.1 miliona. A o le taimi nei, ua \$10.1 miliona. E \$2 miliona le faaopoopoga o le vaegatupe lea a le Ofisa lea, po o fea tonu lea... o lea ou te vaai atu pe i e tele a i personnel, aua e leai ni output fou. E \$2 miliona le Output, le faaopoopoga lea ua i ai.

**FOFOGA FETALAI:** Ua i ai se isi faaopoopoga o le afaigaluega. E manatu lelei o afaigaluega e fai o le siisii i luga a o le faaopoopo foi aua le faaleleia o le tatou galuega. O le sao lea lau afioga i le Minisita.

**Susuga Hon MULIPOLA ANAROSA ALE MOLIOO:** Lau Afioga i le Fofoga Fetalai, o lea e matau atu i le paketi lea a le tatou Matagaluega a le Palemia. O auaunaga e tali atu i faalavelave faale-natura. O le totogi o tagata faigaluega lea e i ai le \$232,000, ma tupe alu mo galuega faatino, ma galuega lagolago, lea e iai le \$385,921.

**Tofa LEALAILEPULE RIMONI AIAFI:** A fai o le Output fou e \$385,000 lea e alu ai. Ae pei ona ou talanoa atu, e \$2 miliona le tupe faaopoopo ma le \$8 miliona sa i ai, o lea ua siitai i le \$10 milion. O lona uiga la a aveese le \$385,00 lea. O lona uiga e \$1.7 miliona le faaopoopoga lea e i ai. Ua tele tele lena tupe.

**FOFOGA FETALAI:** E te silafia foi, o lea e agai i luga ia Matagaluega a le Malo, e tele foi a na auaunaga. E talitonu foi e lava foi lou silafia.

*Faamaonia le \$10,145,941 mo le Palemia.*

**TUPE MAUA** **-\$13,431,914.**

*Faamaonia.*

**TINA & TAMAITAI ATINAE** **\$24,984,980.**  
**O NUU MA AFIOAGA MA**  
**AGAFESOOTAI**

*Faamaonia.*

**GALUEGA FELAUAIGA** **\$68,153,268.**  
**& ATINAE ESEESE**

**FOFOGA FETALAI:** Saunoa mai le sui usufono mo Faleata Nu 3.

**Tofa Hon LEALAILEPULE RIMONI AIAFI:** Ou te alofa i le Minisita, e \$11 miliona lea ua faaititia ai lana paketi. I le LTA pe \$4 miliona le faaititiga. O mea ia o le CSO lea na matou talanoa atu ai, lea sa fesoasoasni tele i le tosoga o uaea moli, ma mea faapena. e \$4 miliona lea ua faaititia ai. O lea e fesili atu ai i le Afioga i le Minisita o tupe. Po o fea tonu lea e faapaleni mai ai mea ia. Ma le faaaloalo lava.

**Afioga Hon TAPUNUU NIKO LEE HANG:** Lau Afioga i le Fofoga Fetalai mo le faasaoina o le taimi o le tatou Palemene. O le fesili la, Olo, e lelei lava le fesili sao i lau afioga e sau ai le tala manino. O lea foi ou te vaai atu lau afioga i le Fofoga Fetalai, Output 2, o le totogi o tagata faigaluega. O lea ua siitia mai i le \$178...i lou taimi ae o lea ua \$386...i le taimi o Olo. O le isi mea lau afioga, ua ou faalogo ua le o toe i ai ni komiti a Olo. E tatau la ona laititi le tupe a o lea ua tele. O le fesili lena ma le faaaloalo lava.

**FOFOGA FETALAI:** Tulai mai lau afioga i le Minisita o Galuega. Ou te iloa o na e ia te oe le atoaga o nei mea uma.

**Tofa Hon OLO FITI AFOA VAAI:** O le a toe fesili foi, o na e te silafia. E pei ona ou fai atu i le taimi ua sola, e i ai au tagata faigaluega sa ou talosagaina i le Kapeneta. Ona o le tele foi o le portfolio lea ou te i ai. E i ai la failautusi faaopoopo aemaise ai la o le tulaga o le Policy Advisor, ia o le Policy Advisor e totogi i le totogi o le ACEO. O le tulaga o le mea lea, e faafetai lava i le sui usufono ia Lealailepule, o lea ua pau le tulaga o le vaega ia i le LTA. E manatua foi, e tele atu le tupe lea ua already ua faaoga mai i le taimi o le tatou SOE budget. O lea la ua pau mai lalo i i, i nai galuega ia e faasolosolo i le taimi lenei. O le ala lena, aua e te popole. E i ai sou auala e te manao e fai? O le tulaga moni lava lena.

**Tofa LEALAILEPULE RIMONI AIAFI:** E leai ou te alofa i le afioga i le Minisita, o le tagata foi ua leva...po o le a le mea ua manaomia ai nei advisors. O la e i ai le CEOs, o le CEOs o ana advisors na. Ma le faaaloalo lava.

**Tofa Hon OLO FITI AFOA VAAI:** O le tele ia o tulaga foi ia o eseese o manatu o CEOs i le aumai o le policy a lea. E manatua foi o au e eseese au SOEs. O le aoga lea o le Policy Advisor, o se tagata e matua lelei i mea tau policies. Ona sau lea advise mai au ia sao lau galuega e fai.

E pei o se faiga fou lea Leala ua ou faia. A o le mea lea sa fai e Tapunuu, ona alu pogisa ai lea e le i...

**Afioga Hon TAPUNUU NIKO LEE HANG:** Lau Afioga, ona o lea a taua fua au, ae o le la misa ma... Na ala ona ou le faia mea ia lau afioga. E lava le malamalama, e lava le poto masani. E ui ou te le inisia, a o lea ua saili a na policy advisor. O le a le vaivai, vaivai i le galuega?

**Afioga FUAAVA SULUIMALO AMATAGA:** Na taua i lau lauga, leaga o lea sa saunoa i ai le tamaitai Minisita o tupe. I le tulaga i le Pulega o Suavai e \$4 miliona lea ua faapau ai. Ae o lea sa tatalo atu lava o si o matou nuu lea i tua sa lavea i le tsunami, e oo mai lava i le taimi nei, e le i oo i ai se paipa. Pe o le uiga, o la ua faataatiaese nisi o fuafuaga sa fai mai talu ai mo nofoaga ia faamolemole.

**Tofa Hon OLO FITI AFOA VAAI:** O le mea lava e tasi, e pei o le tulaga i le faiga o tatou atinae i auala. O le sa faagasolo mai i masina ia ua totoe, sa faaoga lava tupe a lo tatou Malo i nisi o atinae o le vai. O lea foi la ua toe faapasiasia atu le mea ua tau pau mai i lalo, ua uma ona faaoga nai isi seleni. Ae aua e te popole e fai muamua lava lou suavai, ma le faaloalo.

**Susuga Hon TUILAEPa FATIALOFA AUELUA SAILELE MALIELEGAOI:** Lau afioga i le Fofoga Fetalai, e i ai lava si ou popole i mea nei o Polici Advisors. A fai o lea, o lona uiga e tofua lava i latou ma advisors. O a la a latou mea e fai, o lona uiga ua fai e advisors ia faaiuga a le Malo. Ae fia totogi o totogi ai. E matua matautia ia faiga faavae.

**FOFOGA FETALAI:** Atonu o lea ua saunoa le Minisita, ua fesoasoani ai i galuega fai ma galuega faatino.

**Tofa Hon OLO FITI AFOA VAAI:** Lau Afioga i le Fofoga Fetalai, o le sao lena. O le tele lava o galuega e tataua ona faatino i lalo, ua tele lava ina fai e Minisita faaiuga, e moni lava o latou e faia faaiuga, ae tataua lava ona amanaia tagata faigaluega ia e i lalo, e amata mea atu, i se mea e malamalama atili ai le Minisita.

**Susuga Hon TUILAEPa FATIALOFA AUELUA SAILELE MALIELEGAOI:** O lea e i ai ia Faatonu sili o Matagaluega. Lalo ifo o le Faatonu sili e faulalai ai le anoano o isi mau Faatonu. O lona uiga ua matua faulalai nei mau advisors, ae e leai ni mea a latou ia o fai. A o lea ua fai e i latou ia i lalo galuega, a minisita, ma tietie i totogi tetele.

**FOFOGA FETALAI:** O lea ua maua lou finagalo ma lau fautuaga.

**Tofa Hon OLO FITI AFOA VAAI:** E eseese tomiai, e i ai lava Ofisa sili o Pulega o Matagaluega e fitoitonu i le tomiai ma lona agavaa i le faatinoga o galuega. Ae o mea lava ia tau Policy Advisor, o le tagata ua matua lava lona tomiai i mea tau policies.

**Susuga Hon TUILAEPa FATIALOFA AUeLUa SAILELE MALIELEGAOI:** Lau Afioga e le faavalea le Palemene lenai, i ituaiga manatu faapea.

**Tofa Hon OLO FITI AFOA VAAI:** Ua uma foi a outou faiga faavae o lea ua taoto mai ia matou.

**Susuga Hon TUILAEPa FATIALOFA AUeLUa SAILELE MALIELEGAOI:** Se pepelo fuafua.

**FOFOGA FETALAI:** O lea ua maua mai finagalo, ma faasoa ma le fautuaga.

**Tofa Hon OLO FITI AFOA VAAI:** Ou te faamalulu atu lau afioga, taoto mai i le Faigamalo fou, e pule foi matou i le faiga o matou faiga faavae.

**FOFOGA FETALAI:** O le tali lena ua leva ona tatau ona sau analeila.

*Faamaonia le \$68,153,268 mo Galuega Felauaiga & Atinae Eeseese.*

**OFISA O LE LOIA SILI** **-\$5,367,508.**

*Faamaonia.*

**PULE MA SUETUSI AOAo:** **-\$4,107,9581.**

**Tofa Hon LAUOFO FONOTEo NUAFESILI PIERRE LAUOFO:** Lau Afioga i le Fofoga Fetalai, faamolemole mo se avanoa.

**FOFOGA FETALAI:** Tulai mai le sui mamalu mo Anoamaa Nu 2.

**Tofa Hon LAUOFO FONOTEO NUAFESILI PIERRE LAUOFO:** O le vaega tonu lea o le Ofisa o le Pule ma Suetusi sili. O lea e matauina e pei e i ai se vaegatupe e \$100,000, faatuina o se Ofisa Faapitoa e mataituina mataupu tau soligatulafono i totonu o le Malo. A faa-Peretania Anti Corruption Authority e masalo ai o se authority fou lea e faafesili atu ai. E \$300,000 lea e faaagaga mo le faatuina, po o se tagata faigaluega lea e faaagaga i ai le vaegatupe lea. O le a tonu le matafaioi o le Ofisa lea faamolemole.

**Susuga Hon MULIPOLA ANAROSA ALE MOLIOO:** Lau Afioga i le Fofoga Fetalai, e saolele lava le saunoaga, o le alagatupe lea o lo o i lalo o le Ofisa ma Suetusi sili, o se Ofisa faavae, e tutusa lava le Serious Fraud Office la e i Niu Sila. E tutoatasi le tatou ofisa lea, ma e taua o le Anti-Corruption. O le tilotilo lava i vaega uma ma le saogalemu o tatou tulaga tau tupe. Ae le tuua ai lava le tulaga o le Ofisa Suetusi sili, i lona tiute ma le matafaioi tauave.

*Faamaonia le \$4,107,581 mo le Pule ma Suetusi Aoa.*

**KOMESINA O FAIGA  
PALOTA:**

**\$3,192,963.**

*Faamaonia.*

**FONO AOA O FAITULAFONO:**

**-\$7,333,917.**

**Afioga LUPEMATASILA GALUMALEMANA TOLOGATA TOGIA TILE LEIA:** O le itulau e 254 o le tusi faa-Samoa. O lea e i ai le vaegatupe lea e \$200,000, mo Vaega Faaupufai. Ae o lea ou te manatuaina e tai \$200,000 a le Vaega. Pe o le mea e na o le HRPP e faaagaga i ai le \$200,000 lea?

**FOFOGA FETALAI:** O lona ua e toe tali lava e oe lau fesili. O mea e faatatau mo Vaega Faaupufai e masani lava i tausaga uma.

**Tofa LEALAILEPULE RIMONI AIAFI:** Lau Afioga i le Fofoga Fetalai, faamolemole e toe fia faamanino le vaegatupe lea e \$30,000 lea e ave i le tuueseina o le Ofisa o le Fono, pe o le a tonu le mea e faaoga i ai le \$30,000 lea. O le isi mea, o le tupe tele lea o le a alu i le iloiloaina o le

faavae. E manatua foi lau afioga, afai e 20 tausaga e le maua se 2/3 o le Palemene, e maumau le taimi e Iloilo ai, aua e le mafai ona lotea. Ae po o le a le mea ua mafua ai i lenei taimi le tulaga lea. E manatua o le Faavae, o la e i totonu o le Palemene ma tatou o faipule e suia ma vaavaaia. A o le mea lea e popole ai, a fai e uma lenei 5 tausaga e le maua se 2/3, uma le isi 5 tausaga e le maua lava, o a fea la... e Iloilo ma taatitia ai lea.

**Afioga Hon TOELUPE POUMULINUKU ONESEMO:** E momoli le faafetai i le sui usufono. O le \$30,000, e pei ona masani o faiga faavae a le Malo, e tapena ai sailiiliga, ina ia taoto i lagotonu se fuafuaga e faataatia, i le agai i luma. O le mataupu e pei ona saunoa i ai nisi o sui usufono i le taimi ua tuanai. O le silasila lena a lau afioga i le tele o suiga ua i ai i totonu o le tatou Faavae, ae toe silasila lelei i ai. A o mea uma, e agai ai i luma e tusa o faiga faavae ma fuafuaga e talafeagai mo le faatinoina o ia galuega.

**Tofa Hon LAUOFO FONOTOE NUA FESILI PIERRE LAUOFO:** Lau Afioga i le Fofoga Fetalai, e puupuu lava le fesili. O le vaegatupe lea e \$60,000, o meaalofa tupe mo maliu a sui usufono sa avea muamua ma sui usufono o le Palemene. E pei e foliga mai o le a i ai nisi o le a maliliu i nei tausaga faaletupe. E pei o le fautuaga, e lelei le tuu i lalo o le unforesen. O se mea e unforesen e le iloa. E le iloa pe i ai se mea e tupu, pe maliu se isi pe lea. E tau ina faapena atu.

**FOFOGA FETALAI:** O mea lava ia e masani ai. O lea o le a ou tali atu, aua o au lea ua ou Fofoga Fetalai, o lea e i i le tatou Ofisa o le Fono, e faasoaso ai e o le a maliliu, ma e ua latalata ona maliliu. O le uiga lena. E na ona faaleoleo lava, a leai e i ai le mea e ave agai i ai.

**Tofa LEALAILEPULE RIMONI AIAFI:** O lea ua ou toe tilotilo i le faapapalagi. E na ona fia manino lava, o le separation. O lea e fia iloa lau Afioga, o le separation from where. Aua o lea e tutoatasi le Ofisa o le Fono i le taimi nei. Ou te fia malamalama po o le a tonu lava le separation lea lau afioga.

**Afioga Hon TOELUPE POUMULINUKU ONESEMO:** Atonu o lea foi sa luga lalo aemaise lau afioga o le taimi nei, o lo o i le Minisita le tulaga foi lea o le Taitai o le Maota. Ae e i ai le naunautaiga o lau Afioga lava o le Taitai o le Maota.

Ma aemaise foi ia le tulaga lea o le faatuueseeseina o Tafatolu o le Faigamalo. I le taimi nei lau Afioga, e toe lava o le Budget lea e ala ai ona link ia le vaega lea. Ia e pei o le agaga lena lau Afioga.

**FOFOGA FETALAI:** Ou te iloa o lea ua malamalama.

*Faamaonia le -\$7,333,917 mo le Fono Aoaio Faitulaono.*

**KOMESINA O  
SULUFAIGA:** **-\$1,483,635.**

*Faamaonia.*

**KOMISI A LE  
AUFAGALUEGA O  
GALUEGA A LE MALO:** **-\$8,525,286.**

*Faamaonia.*

**GALUEGA TAU  
ALAMANUIA MA  
ATINAE A LE MALO:** **-\$3,158,808.**

*Faamaonia.*

**OFISA O  
FUAINUMERA  
FAAMAUINA:** **-\$6,064,345.**

**Afioga Hon LAUTAFI FIO SELAFI PURCELL:** Lau Afioga i le Fofoga Fetalai...

**FOFOGA FETALAI:** Ia tulai mai lau Afioga i le sui usufono mamalu o Satupaitea.

**Afioga Hon LAUTAFI FIO SELAFI PURCELL:** E tasi lava si mea sia, lea ou te tilotilo atu...

**FOFOGA FETALAI:** Le Ofisa lea o Fuainumera Faamauina? Saunoa lau Afioga.



**Afioga Hon LAUTAFI FIO SELAFI PURCELL:** Ioe lau Afioga, na e i ai le output 8, lea e tau sue atu i le Faa-Samoa.. Ua leva le afiafi ua oo mai le taimi e na o le nanu lava le mea ou te iloa.

Ae o le mea lea e tu mai i i, National Identification System, lea e i ai le vaega fou lea ua sii i ai le tupe lea \$451,766 mai i le \$154,000 sa i ai muamua. E pei o se mea fou atoa lava po o se division atoa pe sao au faamolemole.

O le output 8.

**FOFOGA FETALAI:** Ia tulai mai lau Afioga...

**Afioga Hon LEOTA LAKI LAMOSITELE:** E sao oe, o le vaega fou lea e faia ia le tatou National ID. E faaopoopo la i ai le Division lea i totonu o le Matagaluega lea ma le faaaloalo.

*Faamaonia le -\$6,064,345 mo Fuainumera Faamauina.*

**KOMISI O LE TOEFUATAIGA O TULAFONO A SAMOA:** **-\$1,499,474.**

*Faamaonia.*

**AOFAI O TUPE ALU AOA O FAATATAUINA A MATAGALUEGA 2021/2022:** **-\$700,213,021.**

*Faamaonia.*

**FAAMATALAGA:**

*Faamaonia.*

**FUAIUPU 2: Faamatuu atu ma le Faatatauina o le \$700,213,021 mai le Faaputugatupe a le Matagaluega o Tupe.**

*Faamaonia.*

**FUAIUPU 3: Faamatuu atu ma le faatatauina o le \$554,258 mai i le Teugatupe a le Tausi Mavaega a le Malo.**

*Faamaonia.*

**FUAIUPU 4: Faamatuu atu ma le Faatatauina o le \$21,006,391 mai i le Faaputugatupe a le Matagaluega o Tupe.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa Puupuu ma le Amataga.**

**IGOA: FAATATAUINA O TUPE 2021/2022.**

*Faamaonia.*

*Na faagasolo le Tulafono Tau Faaofi o le Faatatauina o Tupe 2021/2022 e aunoa ma se Teuteuga..*

**TULAFONO TAU FAAOFI O LE FAATATAUINA O TUPE  
2021/2022 – faitauga faatolu.**

**FOFOGA FETALAI:** Tulai mai lau Afioga i le Minisita o Tupe.

**Afioga Hon MULIPOLA ANAROSA ALE MOLIOO:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2021/2022 i lona faitauga faatolu.*

*Faaluaina e le Minisita mo Faatoaga ma Faigafaiva ma le Minisita mo Fesootaiga Televavave ma Tekolonosi.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**FOFOGA FETALAI:** Ua o tatou i ai i le taunuuga o le tatou galuega e tusa o le Lafo na faamaonia. Ua tuneva le po...ia saunoa mai ia lau Afioga i le Palemia...

### **LAFO TOE TEUTEU A LE PALEMIA**

**Afioga Hon FIAME NAOMI MATAAFA:** Faafetai i lau Afioga i le Fofoga Fetalai. O le Lafo e pei ona e toe faamanino mulimuli mai, e faamaea ia le faagasologa o le tatou Pepa Galuega. O lo o aofia ai la ia le Tulafoo o le toe Teuteuga o Faiga Palota.

Ia ae ua ou manatu lau Afioga i le Fofoga Fetalai, e faapea foi ia le mamalu o le Maota, ia ua tuneva foi le po. Ia ae momoli atu le faamalo ma le faafetai i lau Afioga mo le faatautaiga ma le faagasologa o le Tala o le Tupe faamalo i le Minisita.

Ia ou te faafetaia foi lena Itu o le malu, i lo outou finagalo malamalama, ia e pei lava ona talanoa atu, ia e fou foi le toatele o le Kapeneta, ia o le Tala o le Tupe foi lea a le Minisita, ia ae o lea lava ua mafai ona faamanino nisi o mataupu, e pei ona sa laga mai e sui usufono mamalu.

O lea la ou te toe teuteuina ia le Lafo, *Ina ia tatou malolo, ae taatia atu le tatou Tulafono o Teuteuga o Faiga Palota mo le aso Fono o le Aso Lua o le vaiaso fou lau Afioga.*

*Faaluaina e le Afioga i le Sui Palemia, Minisita mo Faatoaga ma Faigafaiva, ma le Minisita mo Galuega, Felauaiga ma Atinae Eseea a le Malo*

*Na faamaonia le Lafo.*

**FOFOGA FETALAI:** Ia, ua o tatou i ai i le taunuuga o tatou galuega e tusa ma le Lafo ua faamaonia. Ia ma ua tuneva foi le po, ua faaaaogagase foi le paia o le Palemene.

Ae tatou te le i tolopo, tau ia o se gagana a le Nofoa, e faaleo ai le agaga faafetai i le paia o le Maota, ona o lo outou logosaia o le faaumiumi o tatou Taulumaga. O lenei ua aulia le aso fou, ae molimauina lava le onosai o a outou afioga i sui usufono mamalu, le Afio o lau Afioga i le Palemia, lau Afioga i le Sui Palemia, Afifio le paia i Minisita o le Kapeneta faapea foi le Afifio o Minisita Lagolago.

O le gagana e masani ai, o le Tala o le Tupe o se tasi lea o Galuega Tutoa a le Pulega Faatonu. O lea ua faamaonia ia le Tala o le Tupe i lenei po, e momoli atu le faafetai ma le faamalo a le Nofoa i le tapenaina, le tuufaatasia ma le faamalamalamaina o lea galuega tele mo le silafia e le

Palemene. Sagai ane ai o le tai, ma ia to mai i le lagi manuia, mo le faatautaiga o le sa o le Malo o Samoa.

Ia le paia o lea foi Itu o le Maota, le Afio o lau Afioa i le Taitai o le Itu Agai, lau Afioa i le Sui Taitai ma le mamalu o sui usufono uma lava o le Palemene, e momoli atu le faafetai a le Fofoga Fetalai, e tusa o tuleiga ma saunoaga i le Tala o le Tupe, faamalo onosai. Faafetai mo lo outou finagalo faapalepale. Ou te talitonu ua tele ia lo outou sao mo le matimatiina o le tatou Tala o le Tupe, o le tino foi lea o se tou maa ua outou togi, mo le atinaeina o le tamaoaiga o Samoa.

E molimauina lava lo outou naunau mo ni avanoa mo saunoaga, ae faamalo le faapalepale mo le tausisiina o tatou Tulafono Tumau, ina ia sologa lelei ia le tatou galuega.

Faafetai i lo outou logosaia o se tautaualemau a le Fofoga Fetalai, e tua atu lava le Nofoa i le mamalu o sui usufono. Ana le seanoa lo tatou galulue faatasi, e le mafai ona tau ia le manuia o le tatou valaauina.

O le tapuaiga a Samoa vaeatu le Afioa i le Ao mamalu o le Malo o Samoa ma le masiofo, Afioa i le Sui a Fono Sui Tofia ma le faletua, lau Afioa i le Faamasino Sili ma le mamalu o le Faamasinoga. Afifio foi Aiga ma Tama Aiga foi ma Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti, le paia i Faauluuluga o Ekalesia Kerisiano i Samoa ma le afaigaluega tofofi o le Talalelei, faamalo tapuai faafetai tatalo mo lau Palemene. Ia saga faamanuia le Atua i aiga uma o si o tatou atunuu.

Ou te faamalulu atu foi i le Palemene, e talitonu, e poto lava le tautai ae e le atoa atu i le liu o lona sa. Afai foi ua i ai se upu ua sala i le faatautaiga o le tatou galuega, ia alofagia ma faamagalo. E malu atu le Nofoa i le tofa faatupu a le Palemene. Manuia tele ia faigamalologa o lenei po.

Ia talu ai ona o le tatou Tala o le Tupe, ia o le autu o lenei aso ma le tatou galuega mai lava ananafi ma lenei vaiaso, ia o lea o le a faia ai ia se tatou lotu faaii, ia ma o tatou tuua ai.

*Na tolopo Taualumaga a le Fono Aoao Faitulafono i le itula e 1.45 i le taeao Aso Tofi 23 Setema seia aulia le itula e 9:30 i le taeao o le Aso Lua, 28 Setema 2021.*